

國學基劇
本叢書

說

書叢本基學國

說劇

撰循蕉

行發館書印務商

引用書目

- 樂府雜錄『唐段安節』
輟耕錄『元陶宗儀』
猥談『明祝允明』
莊嶽委談『明胡應麟』
穀鹿山房筆塵『明于慎行』
雲麓漫鈔『宋趙彥衛』
暖姝由筆『明徐光』
紫桃軒雜綴『明李日華』
塵史『宋王得臣』
四朝聞見錄『宋葉紹翁』
癸辛雜誌『宋周密』
都城紀勝『宋耐得翁』
水東日記『明葉盛』
教坊記『唐崔令欽』
- 名義考『明周祈』
道聽錄
復齋漫談『明許浩』
近峯聞略『明皇甫錄』
應庵隨錄『明羅鶴』
國初事跡『明劉辰』
宋史新編『明柯維騏』
霏雪錄『明劉績』
說圃識餘『王元徵』
齊東野語『宋周密』
樂郊私語『元姚桐壽』
谿山餘話『明陸深』
彙苑詳註『明王世貞』
客座贅語『明顧起元』

警心錄

武林舊事『宋周密』

碧雞漫志『宋王灼』

嘉祐雜志『宋江休復』

懷鉛錄

聞見近錄『宋王鞏』

金樓子『梁孝元皇帝』

委巷叢談『明田汝成』

明史紀事本末『谷應泰』

河上楮談『明朱孟震』

筆談『明張元長』

曠園雜志『吳陳琰』

鷗亭雜訂『徐又陵』

眞珠船『明胡侍』

西河詞話『毛奇齡』

錄鬼簿『元鍾嗣成』

鐵圍山叢談『宋蔡絅』

知新錄『王棠』

古杭夢游錄『宋耐得翁』

唐闕史『唐高彥休』

清波雜誌『宋周輝』

閒燕常談『宋董弁』

宙載『明張合』

錢塘遺事『宋劉一清』

書影『周亮工』

詩辨坻

曲藻『明王世貞』

留青日札『明田藝衡』

集細錄

雕邱雜錄『梁青遠』

靜志居詩話『朱彝尊』

甌江逸志『勞大興』

冬夜牋記『王崇簡』

南窗閒筆

洛陽伽藍記『後魏楊衒之』

山居新話『元楊瑀』

春浮園偶錄『明蕭士瑋』

黎瀟雲語

邵氏聞見錄『宋邵伯溫』

隨事諷諫

南濠詩話『明都穆』

大圓索隱

閒中今古錄『明黃溥言』

在園雜志『劉廷璣』

茶餘客話『阮葵生』

聽雨筆記

天祿識餘『高士奇』

讀輅『明張鳳翼』

天香樓偶得『虞兆漋』

睽車志『宋郭象』

近事叢殘『明沈瓊』

芳菴詩話

堯山堂外紀『明蔣一葵』

香祖筆記『王士禛』

湧幢小品『明朱國楨』

歸潛志『元劉祁』

金陵瑣事『周暉』

古今女史『趙世杰』

玉臺清話『宋釋文瑩』

南園漫錄『明張志淳』

歸元鏡

詞苑叢談『徐鉉』

酒邊續語『王鐘炤』

古夫于亭雜錄『王士禛』

引用書目

- 亦巢偶記
曠園偶錄
四友齋叢說『明何良俊』
明史稿『王鴻緒』
游宦餘談『明朱孟震』
疑耀『明張萱』
貫餘齋筆記
西閣偶談『喬鐸』
藝苑卮言『明王世貞』
洞天元記『明楊慎』
聞見卮言
蘿囊閒話
蕉窗雜錄『宋稼軒居士』
桐下聽然『朱季美』
秋田聞見錄
越巢小識
弇州史料『明王世貞』
甬上詩傳『李景堂』
毛西河先生傳『盛唐』
程史『宋岳珂』
寄園寄所寄『趙吉士』
湖南搜奇
柳南隨筆『王應奎』
浣水續談『明朱孟震』
箬陂繼世紀聞
內省齋文集
明詩綜『朱彝尊』
讀書堂文集
續筆談『明胡應麟』
秦淮劇品『潘之恒』
西京雜記『晉葛洪』
邱氏遺珠

- 雙塵談『胡承譜』
智囊『明馮夢龍』
鮚埼亭續集『全祖望』
池北偶談『王士禛』
說桔『明焦周』
鶴林玉露『宋羅大經』
臺閣名言『明張合』
虎苔『明陳繼儒』
菽園雜記『明陸容』
綿繡萬花谷
詞旨『明梅鼎祚』
宣和遺事
江湖紀聞『郭霄鳳』
湖壩雜志『陸次雲』
雨村詩話『李調元』
流寇長編
- 筠廊偶筆『宋犖』
菊莊新話『史承讓』
蓴鄉贅筆『董含』
板橋雜記『余懷』
西橋野記『明侯甸』
嬌嬈記『元伊世珍』
丹鉛錄『明楊慎』
徐文長集『明徐渭』
已瘞編『明劉玉』
露書『明姚旅』
玉劍尊聞『梁維樞』
耳聞『明鄭仲夔』
此木軒雜著『焦袁熹』
珊瑚房蛾述堂閒筆
西陂類稿『宋犖』
極齋雜錄

引用書目

宦游紀聞『明張誼』

今世說『王晫』

邊州聞見錄『陳鼎恆』

見聞錄『徐晉』

閒居筆記

董航紀談『宋蔣津』

操觚十六觀『陳鑑』

諸史『明徐渭』

談芬『明徐渭』

夢蕉詩話『游潛』

劇說卷一

江都

乾隆壬子冬月於書肆破書中得一帙雜錄前人論曲論劇之語引輯詳博而無次

予嘉慶
穀雨日記

家居經史苦不能讀因取前帙參以舊聞凡論宮調音律者不錄名之以劇說云穀雨日記樂記云新樂進俯退俯姦聲以濫溺而不止及優侏儒優雜子女不知父子樂終不可以語不可以道古注云獮獮猴也言舞者如獮猴戲也亂男女之尊卑獮或爲優疏云漢書擅長卿爲獮猴舞是狀如獮猴左傳襄公二十八年慶氏以其甲環公宮陳氏鮑氏之圉人爲優慶氏之馬善驚士皆釋甲束馬而飲酒且觀優至于魚里正義云優者戲名也史游急就篇云倡優俳笑是優俳一物而二名今之散樂戲爲可笑之語而令人笑是也史記滑稽列傳優孟者故楚之樂人也爲孫叔敖衣冠抵掌談語歲餘像孫叔敖楚王及左右不能別也莊王置酒優孟前爲壽莊王大驚以爲孫叔敖復生也欲以爲相又優旃者秦倡侏儒也善爲笑言然合于大道然則優之爲技也善肖人之形容動人之歡笑與今無異耳

樂府雜錄云開元中黃幡綽張野狐弄參軍始自漢館陶令石耽耽有贓犯和帝惜其才免罪每宴樂卽令衣白夾衫命優伶戲弄辱之經年乃放後爲參軍誤也

教坊記云凡欲出戲所司先進曲名上以墨點者卽舞不點者卽否謂之進點按今演戲伶人呈戲目于

尊客以墨選之曰點戲仍古之遺稱。

教坊記又云大面出北齊蘭陵王長恭性膽勇而貌婦人自嫌不足以威敵乃刻木爲假面臨陣著之因爲此戲亦入歌曲按今淨稱大面其以粉墨丹黃塗于面以代刻木而有是稱耶然戲中亦間用假面輟耕錄云唐有傳奇宋有戲曲唱譁詞說金有院本雜劇其實一也國朝院本雜劇始釐爲二院本則五人一曰副淨古謂之參軍一曰副末古謂之蒼鶻鶻能擊禽鳥末可打副淨故云一曰引戲一曰末泥一曰孤裝又謂之五花爨弄或曰宋徽宗見爨國人來朝衣裝綵巾裹傅粉墨舉動如此使優人效之以爲戲又有餸段亦院本之意但差簡耳取其如火餸易明而易滅也其間副淨有散說有道念有筋斗有科汛教坊色長魏武劉三人鼎新編輯魏長于念誦武長于筋斗劉長于科汛至今樂人宗之名義考云今角戲有生旦淨丑之名嘗求其義而不得偶思樂記注如獮猴之說乃知生猶也猩猩也山海經猩猩人面豕聲似小兒啼旦猶也狃狃也莊子狡狃狃以爲雌淨猙也廣韻似豹一角五尾又云似狐有翼丑猶也廣韻犬性驕又狐狸等獸迹謂俳優之人如四獸也所謂狃雜子女也末猶末厥之末外猶員外之外猥談云生淨丑末等名有謂反其事而稱又或託之唐莊宗皆謬也此本金元閻閻談吐所謂鶻伶聲嗽今所謂市語也生卽男子旦曰妝旦色淨曰淨兒末曰末泥孤乃官人卽其土音何義理之有南戲出于宣和以後南渡時謂之溫州雜劇後漸轉爲餘姚海鹽弋陽崑山諸腔矣道德錄云元人院本打者一副淨一副末一引戲一末泥一孤裝猶梨園之有生旦外末淨丑貼七字之義或云反語生爲熟丑爲好旦爲夜貼爲幫淨爲鬧末爲始可也若外爲內則牽強矣

莊獻委談云。凡傳奇以戲文爲稱也。無往而非戲文也。故其事欲謬悠而無根也。其名欲顛倒而無實也。反是而求其當焉。非戲也。故曲欲熟而命以生也。婦宣夜而命以旦也。開場始事而命以末也。塗汙不潔而命以淨也。凡此咸以顛倒其名也。中郎之耳順而婿卓也。相國之絕交而娶崔也。荆釵之詭而夫也。香囊之詭而弟也。凡此皆以謬悠其事也。近爲傳奇者。若良史焉。古意微矣。古無外與丑。丑卽副淨。外卽副末也。又云。今優伶輩呼子弟。大率八人爲朋。生、旦、淨、丑、副亦如之。元院本止五人。故有五花之目。一曰副淨。古之參軍也。一曰副末。又名蒼鶻。可繫羣鳥。猶副末可打副淨。一曰末泥。一曰孤裝。而無所謂生旦者。蓋院本與雜劇不同也。元雜劇旦有數色。所謂裝旦。卽正旦也。小旦。卽今副旦也。以墨點破其面。謂之花旦。今惟淨丑爲之。

樂府雜錄云。蘇中郎後周士人蘇肥嗜酒落魄。自號中郎。每有歌場。輒入獨舞。今爲戲者。著緋戴帽面正赤。蓋狀其醉也。

復齋漫錄云。張景交通曹人趙諫。斥爲房州參軍。累爲屋壁記略曰。近制州縣參軍無員數。無職守。悉以曠官敗守。違戾政教者爲之。凡朔望饗宴使與焉。人一見之必指曰。此參軍也。當爲其罪矣。至于倡優爲戲。亦假爲之。以資玩笑。况真爲者乎。

穀城山房筆塵云。優人爲優。以一人幞頭衣綠。謂之參軍。以一人髽角敝衣如僮僕狀。謂之蒼鶻。參軍之法至宋。猶然似院本及戲文裝淨之狀。第不知其節奏耳。

近峯聞略云。參軍至唐爲故事名副淨。

雲麓漫抄云。近日優人作雜班似雜劇而簡略。金官制有文班、武班。若醫卜娼優謂之雜班。每宴集伶人進曰雜班上故流傳至此。

應菴隨錄云。古之優人于御前嘲笑。不但不避貴戚大臣。雖天子后妃亦無所諱。在唐中宗時。內宴唱回波詞是也。

煥姝由筆云。有白有唱者名雜劇。用弦索者名套數。扮演戲文跳而不唱名院本。

國初事蹟云。洪武時令樂人張良才說評話。良才因做場擅寫省委教坊司招子貼市門柱上有近侍言之太祖曰。賤人小輩不宜寵用。令小先鋒張煥縛投于水。

莊嶽委談云。古教坊有雜劇而無戲文者。每公家開宴。則百樂具陳。兩京六代不可備知。唐宋小說如樂府雜錄、教坊記、東京夢華錄、武林舊事等編錄頗詳。唐制自歌人之外。特重舞隊。歌舞之外。又有精樂器者。若琵琶、羯鼓之屬。此外俳優雜劇。不過以供一笑。其用蓋與傀儡不甚相遠。非雅士所留意也。宋世亦然。南渡稍見淨丑之目。其用無以大異。前朝浸淫勝國崔、蔡二傳奇迭出。才情既富。節奏彌工。演習梨園。幾半天下。雖有衆樂。無暇雜陳矣。

紫桃軒雜綴云。張鎡字功甫。循王之孫。豪侈而有清尚。嘗來吾郡海鹽。作園亭自恣。令歌兒衍曲。務爲新聲。所謂海鹽腔也。菽園雜記云。嘉興之海鹽。紹興之餘姚。寧波之慈谿。台州之黃巖。溫州之永嘉。皆有習爲倡優者。名曰戲文子弟。

宋史新編云。理宗在位久。董宋臣、盧允升作夫容閣、蘭香亭。宮中進倡優傀儡。以奉帝遊宴。

宋史樂志云女弟子隊六曰採蓮隊衣紅羅生色綽子繫裙戴雲鬟髻乘彩船執蓮花

塵史云衣冠之制上下混一嘗聞杜祁公欲令人吏技術等官少爲差別後韓康公又議改制如人吏公袍倍加綵俗所謂黃義襯者是也幞頭合帶牛耳者今之優人多爲此服

霏雪錄云宋高宗時羣人倫餛飩不熟下大理寺優人扮兩士人相貌各問其年一曰甲子生一曰丙子生優人曰此二人皆合下大理高宗問故對曰餃子餅子皆生與餛飩不熟者同罪耳上大笑赦原羣

人

四朝聞見錄云韓用兵旣敗須鬚皆白莫知所爲伶優因上賜宴設樊遲樊噲旁一人曰樊噲問樊遲誰與取名對以孔子所取又揖問樊噲曰爾誰取曰漢高所命又揖樊噲曰誰名汝對曰樊噲自取說圃識餘云一伶人作不識字官稱難做吏曰官不過判耳每判日當先書案上但依畫判之從一日至三日皆依畫判去至四日不能至五六日擲筆下走曰做不成一日難似一日矣

陸務觀云嘗記先人說紅鞋飾帶始唐莊宗施之優人

癸辛雜志云嘗聞梨園舊樂工云凡大燕集樂初作必先奏引子如大石調引子則自始至終凡絲竹歌舞皆爲大石調直至別奏引子方隨以改爲耳又云凡燕集初作或用上字或用工字然必須衆樂皆然是謂諧和或有一時煞尾參差不齊則謂之不和必有口舌不樂等事前後驗之無不然者以此推之則樂之關乎治亂爲不誣矣

齊東野語云女冠吳知古用事內宴演參軍教坊輩請簽文書參軍怒曰我方聽鶯粟

都城紀勝云。雜劇中先做熟事一段。名曰艷段。次做雜劇。或添二人。名曰裝孤老。凡影戲。乃京師人初以素紙雕鏤。後用裝色裝皮爲之。其話本與講史書者頗同。大抵真假相半。公忠者雕以正貌。奸邪者與之醜貌。蓋亦寓褒貶于世俗之眼戲也。

輟耕錄云。稗官廢而傳奇作。傳奇作而戲曲繼。金季國初。樂府猶宋詞之流。傳奇猶宋戲曲之變。世謂之雜劇。金章宗時。董解元所編西廂記。世代未遠。尙罕有人能解之者。况金雜劇中曲詞之冗乎。

筆塵云。杜佑曰。窟儡子亦曰傀儡子。本喪雅也。漢末始用之于嘉會。北齊高緯尤好之。今俗懸絲而戲。謂之偶人。亦傀儡之屬也。又有以手持其末。出之幃帳之上。則正謂之窟儡子矣。又云。漢有魚龍百戲。齊梁以來。謂之散樂。樂有舞盤伎、舞輪伎、長蹠伎、跳劍伎、吞劍伎、擲倒伎。今教坊百戲。大率有之。惟擲倒不知何法。疑卽翻金斗。翻金斗字義起于趙簡子之殺中山王。以頭委地。而翻身跳過。謂之金斗。按今之演劇者。以頭委地。用手代足。憑虛而行。或縱或跳。旋起旋側。其捷如猿。其疾如鳥。令見者目炫心驚。蓋卽古人擲倒伎也。

樂郊私語云。海鹽州少年多善樂府。其傳多出于澉川楊氏。當康惠公存時。節俠風流。善音律。與武林阿里海涯之子雲石交善。雲石翩翩公子。無論所制樂府。散套駿逸。爲當行之冠。卽歌聲高引。上澈雲漢。而康惠獨得其傳。今雜戲中有豫讓吞炭、霍光鬼諫、敬德不伏老。皆康惠自製第去其著作姓名。水東日記云。今書坊相傳。射利之徒。僞爲小說雜書。南人喜談。如漢小王光武、楊六使文廣。北人喜談。如繼母、大賢等事。甚多農工商販。抄寫繪畫。家畜而人有之。痴騃女婦尤所酷好。好事者因目爲女通鑑。

甚者呂文穆王龜齡諸名賢百態誣譟作爲戲劇以爲佐酒樂客之具士大夫不以爲非亦相率而推波助瀾遂汎濫而莫之救

谿山餘話云歌詞代各不同而聲亦易亡元人變爲曲子今世踵襲大抵分爲二調曰南曲曰北曲胡致堂所謂綺羅香澤之態綢繆宛轉之度正今日之南詞也登高望遠舉首高歌而逸懷浩氣超乎塵垢之表者近于今日之北詞也

彙苑詳注云曲者詞之變金元所用北樂緩急之間詞不能按乃更爲新聲以媚之而諸君如貫酸齋馬東籬輩咸富有才情兼善音律遂擅一代之長但大江以北漸染北語時時採入而沈約四聲遂闕其一東南之士未盡顧曲之周郎蓬萊之間又稀辨搃之王應稍稍復變新體號爲南曲高拭則誠遂掩前後大抵北主勁切雄麗南主清峭柔遠雖本才華務諳音律譬之同一師承頓漸分教俱爲國臣文武異科今談曲者往往合而舉之良可笑也

嘉隆間松江何元朗畜家僮習唱一時優伶俱避舍然所唱俱北詞尙得蒜酪遺風何又教女鬟數人俱善北曲爲南教坊頓仁所賞頓隨武宗入京盡傳北方遺音獨步東南暮年流落無復知其伎者其論曲謂南曲簫管謂之唱調不入弦索不可入譜沈吏部南九宮譜盛行而北九宮反無人問頓老又云弦索九宮或用滾弦或用花和大和鈺弦皆有定則若南九宮無定則可依且笛管稍長短其聲便可就板弦索若多一彈少一彈卽呆板矣吳下以三弦合南曲而又以簫管叶之此唐人所云錦襖上著囊衣也簫管可入北詞而弦索不入南詞蓋南曲不伏弦節奏也北詞中亦有不叶弦索者如鄭德輝

王實甫間亦不免。元人多嫋北調，而不及南音。成弘間沈青門、陳大聲輩，南詞宗匠。同時康對山、王漢陂俱以北擅場。王初學填詞，先延名師學唱三年，而後出手。章邱李太常中麓亦以填詞名，與康王交，而不嫋度曲。如所作寶劍記，生硬不諧，且不知南曲之有入聲，自以中原音韻叶之，以致見誚吳儂。同時惟馮海梓差爲當行。此外吳中詞人，如唐伯虎、祝枝山、梁伯龍、張伯起輩，縱有才情，俱非本色矣。今傳誦南曲，如東風轉歲華云是元人高則誠，不知乃陳大聲與徐鬚翁聯句也。陳名鐸，號秋碧，大聲其字也。金陵人官指揮使，節錄蝶亭雜記。

客座贅語云：萬歷以前，公侯與縉紳及富家，凡有燕會小集，多用散樂，或三四人，或多人，唱大套北曲。若大席，則用教坊打院本，乃北曲大四套者。中間錯以撮墊圈觀音舞，或百丈旗，或跳墜子，後乃變而盡用南唱歌者，止用一小拍板，或以扇子代之。間有用鼓板者，今則吳人益以洞簫及月琴，益爲悽慘。聽者殆欲墮淚。大會則用南戲，其始止二腔，較海鹽更爲清柔而婉折也。

眞珠船云：元曲如中原音韻、陽春白雪、太平樂府、天機餘錦等集，范張雞黍、王粲登樓、三氣張飛、趙禮讓肥單刀會、敬德不伏老、蘇子瞻貶黃州等傳奇，率音調悠揚氣魄雄壯。後有作者，鮮與爲京。蓋當時台省元臣郡邑正官及雄要之職，中州人多不得爲之。每沈抑下僚，志不得伸。如關漢卿乃太醫院尹，馬致遠省行務官，宮大用鈞台山長，鄭德輝杭州路吏，張小山首領官，其他屈在簿書，老于布素者，尙多有之。于是以其有用之才，而一寓之乎聲歌之末，以抒其拂鬱感慨之懷。所謂不得其平而鳴焉者也。又云：古之四方皆有音，今歌曲但統爲南北二音。如伊州、涼州、甘州、渭州，本是西音，今並爲北曲。由是

觀之則繁壤衢歌卿雲南風白雲黃澤之類詩之篇什漢之樂府下逮關鄭白馬之撰雖詞有雅鄭並北音也若南音則孺子接輿越人紫玉吳歛楚艷以及今之戲文皆是然三百篇無南音周南召南皆北方也

警心錄云陳淳祖爲賈似道之客守正爲諸客所疾內人亦惡之一日諸姬爭寵密竊一姬鞋藏淳祖牀下意欲並中二人賈入齋見之心疑夜驅此姬至齋門誘之淳祖不答繼以大怒賈乃知其無他遂勘諸姬得其情由是極契淳祖後遂有知南安軍之命金元院本演其事

楊用修云漢郊社志優人爲假飾伎女蓋後世裝旦之始也然未必如後世雜劇戲文之爲緣其時郊祀皆奏樂章未有歌曲耳

西河詩話云明玉照宮承應有御前王留子雜劇王留子見元曲或云天啓六年有鐘鼓司僉書王進朝綽號王瘤子善抹臉詼諧如舊時優伶留子卽瘤子

丹邱先生論曲云雜劇有正末副末狙狐靚搗猱捷譏引戲九色之名正末者當場男子能指事者也俗謂之末泥副末執磕瓜以扑靚卽古所謂蒼鵠是也當場之伎曰狙狙猱之雌者也其性好淫今俗謬爲旦狐當場裝官者也今俗謬爲孤靚傳粉墨戲笑供諧者也粉白黛綠古稱靚妝故謂之妝靚色今俗謬爲淨妓女之老者曰搗搗似雁而大無後趾虎文喜淫而無厭諸鳥求之卽就世呼獨豹者是也凡妓女總稱曰猱猱亦猿類喜食虎肝腦虎見而愛之輒負于背猱乃取蠱遺虎首虎卽死取其肝腦食焉以喻少年愛色者亦如遇猱然不至喪身不止也捷譏古謂之滑稽雜劇中取其便捷譏諷故云

引戲卽院本中之祖也。又云：拘肆中戲房出入之所謂之鬼門道。言其所扮者皆已往昔人出入于此。故云鬼門。愚俗無知以置鼓于門，改爲鼓門道。後又譌爲古皆非也。（元曲或言向古道，或言向古門道。）蘇東坡詩有云：搬演古人事，出入鬼門道。

周挺齋論曲云：良家子弟所扮雜劇謂之行家生活。倡優所扮謂之戔家把戲。蓋以雜劇出于鴻儒碩士，騷人墨客所作皆良家也。彼倡優豈能辦此。故關漢卿以爲非是他當行本事。我家生活他不過爲奴隸之役。供笑獻勤以奉我輩耳。子弟所扮是我一家風月。雖復戲言甚合于理。又云：院本中有娼夫之詞。名曰綠巾詞。雖有絕佳者。不得並稱樂府。如黃幡綽鏡新磨、雷海青輩皆古名娼。止以樂名呼之。瓦世無字。今趙明鏡譌傳趙文敬、張酷貧譌傳張國賓皆非也。

武林舊事所列官本雜劇段數曰六么。曰瀛府。曰梁州。曰伊州。曰新水。曰薄媚。曰大明樂。曰降黃龍。曰胡渭州。曰逍遙樂。曰石州。曰大聖樂。曰中和樂。曰萬年歡。曰熙州。曰道人歡。曰長壽仙。曰法曲。曰延壽樂。曰賀皇恩。曰採蓮。採蓮隊見宋史樂志。其餘可類推矣。又有所謂爨者。如鐘馗爨。天下太平爨之類。有所謂孤者。如思鄉早行孤迓鼓孤之類。有所謂姐者。如檻哮店休姐。老姑遣姐之類。有所謂酸者。如檻哮負酸、眼藥酸之類。輟耕錄所列院本名目。所謂法曲。伊州。新水。瀛府。逍遙樂。萬年歡。降黃龍屬和曲院本。所謂孤酸、旦等目爲諸雜大小院本。考元人劇中其題目正名。有云還牢末者。則正末當場也。有云貨郎旦者。則正旦當場也。錄鬼簿關漢卿有擔水澆花旦。中秋切鱠旦。吳昌齡有貨郎末泥。尙仲賢有沒興花前秉燭旦。楊顯之有跳神師婆旦。其義亦同。孤謂官酸謂秀士。凡稱酸謂正末扮秀士當場。

也。至有云酸孤旦者，則三色當場。有云雙旦降黃龍者，則兩旦當場。云旦判孤云老孤遺旦，皆可類推。莊嶽委談云：世謂秀才爲措大。元人以秀才爲細酸。倩女離魂首折末扮細酸爲王文舉是也。細酸字面僅見此。今俗尚有此稱。按今元曲倩女離魂雜劇中無細酸二字。

元曲皆四折。或加楔子。惟趙氏孤兒五折又有楔子。

生旦淨丑考元曲無生之稱。末卽生也。有正末又有冲末、副末、小末。任風子劇中冲末扮馬丹陽。正末扮任屠。碧桃花冲末扮張珪。副末扮張道南。貨郎兒冲末扮李彥和。小末扮李春郎是也。小末亦稱小末尼。東堂老正末同小末尼上是也。冲末又稱二末。神奴兒冲末扮李德義。後稱李德義爲二末是也。（今人名刺或稱晚生。或稱晚末。眷末或稱眷生。然則生與末通稱。尙爲元人之遺歟。）旦有正旦、老旦、大旦、小旦、貼旦、色旦、搽旦、外旦、且兒諸名。中秋切餚。正旦扮譚記兒。且兒扮白姑姑。碧桃花老旦扮張珪夫人。正旦扮碧桃貼旦扮徐端夫人。張天師夜斷辰旬月搽旦扮封姨。且兒扮桃花仙。正旦扮桂花仙。救風塵外旦扮宋引章。貨郎旦外旦扮張玉娥。玉壺春貼旦扮陳玉英。神奴兒大旦扮陳氏。陳搏高臥鄭恩引色旦上誤入桃源。小旦上云：小妾是桃源仙子侍從的是也。有單稱旦者。抱妝盒正旦扮李美人。旦扮劉皇后。旦兒扮寇承御。倩女離魂旦扮夫人。正旦扮倩女是也。丑淨外三色名與今同。乃碧桃花外扮薩真人外。又扮馬趙溫關天將是同場有五外。陳州糶米外扮韓魏公、呂夷簡爭報恩外扮趙通判外。又扮孤楚昭公疎者下船外扮孫武子伍子胥小尉遲認父歸朝外扮徐茂公房元齡皆同場有二外。謝金吾詐拆清風府外扮焦贊孟良岳勝是同場有三外。百花亭二淨扮雙解元柳殿試

鬧上舉案齊眉。二淨扮張小員外、馬舍上殺狗勸夫、東堂老並二淨扮柳隆卿、胡子傅合汗衫。淨扮卜兒淨扮陳虎。陳州糴米淨扮劉衙內。淨扮小衙內皆同場有二淨副淨之名。見竇娥冤之張驥兒牆頭馬上冲末扮裴尚書引老旦扮夫人上第二折夫人同老旦嬌嬈上是當場有二老旦蝴蝶夢外引冲末扮王大王二范張雞黍正末扮范巨卿同冲末扮孔仲仙張元伯是當場有二冲末桃花女小末扮石留住又小末扮增福第四折石留住增福同場是當場有二小末陳州糴米丑扮楊金吾又二丑扮二斗子是同場有三丑末旦淨丑之外又有孤俠兒李老邦老卜兒等目貨郎旦冲末扮孤殺狗勸夫外扮孤勘頭巾淨扮孤扮狐者無一定也金線池搽旦扮卜兒秋胡戲妻王粲登樓並老旦扮卜兒合汗衫淨扮卜兒是扮卜兒者無一定也貨郎旦淨扮李老瀟湘雨外扮李老薛仁貴榮歸故里正末扮李老硃砂擔冲末扮李老是扮李老者無一定也蓋孤者官也卜兒者婦人之老者也李老者男子之老者也俠兒多不言以何色扮之惟貨郎旦李春郎前稱俠兒後稱小末則前以小末扮俠兒蓋俠兒者扮爲兒童狀也春郎前幼當扮爲兒童故稱俠兒後已作官則稱小末耳邦老之稱一爲合汗衫之陳虎一爲盆兒鬼之盆罐趙一爲硃砂擔之鐵籜竿白正皆殺人賊皆以淨扮之然則邦老者蓋惡人之目也。

殺狗勸夫祇從取砌末上謂所埋之死狗也貨郎旦外旦取砌末付淨科謂金銀財寶也梧桐雨正末引宮娥挑燈拿砌末上謂七夕乞巧筵所設物也陳搏高臥外扮使臣引卒子捧砌末上謂詔書纏幣也冤家債主和尙交砌末科謂銀也誤入桃源正末扮劉晨外扮阮肇各帶砌末上謂行李包裹或採藥

器具也。又淨扮劉德引沙三王留等將砌末上謂春社中羊酒紙錢之屬也。

近安慶帮子腔劇中有桃花女與周公鬪法、沈香太子劈山救母等劇皆本元人。又義兒恩兒問罪在獄適兒教而盜殺母誤盜屍爲兒屍全本蝴蝶夢趙頑驢偷馬殘生送一折也。又有五雷轟者演孫臏事內有卜子夏此正本元人劇馬陵道中有卜商也。

裴少俊牆頭馬上白仁甫作錄鬼簿作鴛鴦簡牆頭馬上便宜行事虎頭牌李直夫作錄鬼簿作武元皇帝虎頭牌李素蘭風月玉壺春武漢臣作錄鬼簿有鄭瓊娥梅雪玉堂春無此目陶學士醉寫風光好戴善夫作錄鬼簿無此目翠紅鄉兒女兩團員楊文奎作錄鬼簿無此人半夜雷轟薦福碑馬致遠作錄鬼簿無此目包待制三勘蝴蝶夢關漢卿作錄鬼簿無此目河南府張鼎勘頭巾孫仲章作錄鬼簿陸登善有此目孫仲章無此目李太白匹配金錢記喬孟符作錄鬼簿題爲唐明皇御斷金錢記別有柳眉兒金錢記平陽人石君寶作楊氏女殺狗勸夫不傳作者名氏錄鬼簿題有王脩斷殺狗勸夫爲蕭德祥作今此劇孤自稱王脩然當卽蕭作張天師斷風花雪月吳昌齡作錄鬼簿作張天師夜祭辰鉤月趙盼兒風月救風塵關漢卿作錄鬼簿作烟月舊風塵舊蓋救之謠同樂院燕青博魚李文蔚作錄鬼簿題有報冤臺燕青撲魚及燕青射雁二目無燕青博魚。

元曲止正旦正末唱餘不唱其爲正旦正末者必取義夫貞婦忠臣孝子他宵小市井不得而干之余謂時文入口氣代其人論說實同于曲劇而如陽貨王驩等口氣之題宜斷作不宜代其口氣吾見近人作此種題文竟不啻身爲孤裝邦老甚至助爲訕謗口角以幅肖爲能是當以元曲之格度爲法。

虎頭牌且扮茶茶金元人多呼女爲茶。

西河詞話云古歌舞不相合歌者不舞舞者不歌卽舞曲中詞亦不必與舞者搬演照應自唐人作柘枝詞蓮花鏟歌則舞者所執與歌者所措詞稍稍相應然無事實也宋末有安定郡王趙令時者始作商調鼓子詞譜西廂傳奇則純以事實譜詞曲間然猶無演白也至金章宗朝董解元不知何人實作西廂擣彈詞則有自有曲專以一人擣彈并念唱之嗣後金作清樂仿遼時大樂之製有所謂連廂詞者則帶唱帶演以司唱一人琵琶一人笙一人笛一人列坐唱詞而復以男名末泥女名旦兒者并雜色人等入勾欄扮演隨唱詞作舉止如參了菩薩則末泥祇揖只將花笑撲則旦兒撲花類北人至今謂之連廂曰打連廂唱連廂又曰連廂搬演大抵連四廂舞人而演其曲故云然猶舞者不唱唱者不舞與古人舞法無以異也至元人造曲則歌舞合作一人使勾欄舞者自司歌唱而第設笙笛琵琶以和其曲每入場以四折爲度謂之雜劇其有連數雜劇而通譜一事或一劇或二劇或三四五劇名爲院本西廂者合五劇而譜一事者也然其時司唱猶屬一人仿連廂之法不能遽變往先司馬從寧庶人處得連廂詞例謂司唱一人代勾欄舞人執唱其曰代唱卽已逗勾欄舞人自唱之意但唱者止二人末泥主男唱且兒主女唱也若雜色入場第有白無唱謂之賓白賓與主對以說自在賓而唱者自有主也至元末明初改北曲爲南曲則雜色人皆唱不分賓主矣少時觀西廂記見一劇未必有絳絲娘煞尾一曲于演扮人下場後復唱且復念正名四句此是誰唱誰念至末劇扮演人唱清江引曲齊下場後復有隨煞一曲正名四句總目四句俱不能解唱者念者之人及得連廂詞例則司唱者在坐間

不在場上故雖變雜劇猶存坐間代唱之意。

王實甫西廂記不標淨旦丑之名曰紅曰鶯曰本曰惠曰夫曰杜曰飛然則曰生者謂張生非優人脚色之名爲生也琵琶記則生旦爲類矣乃西廂第一折末上云自家是狀元坊店小二哥以下但標小二末上二字自亂其例。

碧雞漫志云伊州見于世者凡七商曲大石調高大石調雙調小石調歇指調林鍾商越調六么行于世者四曰黃鍾羽卽般涉調曰夾鍾羽卽中呂調曰林鍾羽卽高平調曰夷則羽卽仙呂調元微之法曲詩云明皇度曲多新態宛轉浸淫易沈著赤白桃李取花名霓裳羽衣號天樂樂天亦云法曲法曲歌霓裳按明皇改婆羅門爲霓裳羽衣屬黃鍾商卽今之越調宮伎佩七寶瓔珞舞此曲曲終珠翠可掃歐陽永叔云人間有瀛府獻仙音二曲瀛府屬黃鍾宮（鐵圍山叢談云唐開元時有若望瀛法曲者傳于今實黃鍾之宮）嘉祐雜志云同州樂工翻河中黃幡綽霓裳譜鈞容樂工程士守別依法曲造成教坊伶人花日新見之題其後云法曲雖精莫近望瀛觀此則武林舊事輟耕錄所謂六么瀛府法曲伊州之類皆以音調分別之如今之崑腔弋腔及安慶湖廣秦腔京腔等也六么中有所謂孤奪且六么法曲中有孤和法曲則優伶色目各腔皆有也。

輟耕錄有邦老家門（邦老疑卽鮑老之謠聲相傳有詩云鮑老當年笑郭郎笑他舞袖太郎當若教鮑老當筵舞舞更郎當袖轉長）一曰脚言脚語一曰則是便是賊孤下家門一曰朕聞上古一曰刀包待制一曰絹兒來蹶俠家門一曰受胎成氣都子家門一曰後人收一曰桃李子一曰上一上

教坊記曲名有綠腰、涼州、薄媚、伊州、甘州、綠腰卽六么也。唐宋元相承尙可尋究。

知新錄云合生卽院本雜劇也。唐書武平一傳云中宗宴殿上胡人襪子何懿唱合生而歌言淺穢。平一上書曰比來妖伎胡人街童市子或言妃主情貌或列王公名賢歌詠舞踏號曰合生始自王公稍及閣巷按此則知唐明皇梨園之戲又本於此。又懷鉛錄云古梨園傳粉墨者謂之參軍亦謂之艷艷廣韻云妝飾也。今傳粉墨謂之淨蓋艷之譌也。扮婦人者謂之狃又與獮通莊子云狃狃以爲妻東廣微云狃以獮爲婦蓋喻婦人意遂省作旦也。蒼鶻謂之末者周禮四夷之樂有棘東都賦云儻侏兜離罔不畢集蓋優人作外國裝束者也。一曰末泥蓋倡家隱語如爆炭崖公之類省作末又云末泥色主張引戲分付副末色打譚又都城紀勝雜扮或名雜旺又名鈕元子又名拔和乃雜劇之散段多是借裝爲山東河北村人以資笑今之打和鼓撚梢子散耍皆是也。今之丑脚蓋鈕元子之省文古杭夢遊錄作雜班扭元子拔和又云演戲而以班名自宋雲韶班起考宋教坊外又有鈞容直雲韶班二樂宋太祖平嶺表得劉氏閻官聰慧者八十人使學于教坊初賜名簫韶部後改名雲韶班鈞容直軍樂也在軍中善樂者初名引龍直以備行幸騎導淳化中改爲鈞容直後世總稱爲班也。

聞見近錄云南京去汴河五里河次謂之河市凡郡有宴設必召河市樂人故至今俳優曰河市樂人者由此也。

唐闕史云咸通中優人李可及者滑稽諧戲獨出輩流嘗因延慶節縉黃講論畢次及倡優爲戲可及乃儒服斂巾褒衣博帶攝齊以升崇座自稱三教論衡其隅坐者問曰旣言博通三教釋迦如來是何人

對曰是婦人問者驚曰是何也對曰金剛經云敷座而坐或非婦人何煩夫坐然後兒坐也上爲之啓齒又問曰太上老君何人也對曰亦婦人也問者益所不喻乃曰道德經云吾有大患是吾有身倘非婦人何患於有娠乎上大悅又曰文宣王何人也對曰婦人也問者曰何以知之對曰論語云沾之哉我待價者也向非婦人待嫁奚爲上意極歡寵錫甚厚

金樓子云有人以優師周穆王甚巧能作木人趨走俯仰如人鎖其頤則可語捧其手則可舞王與盛姬共觀木人瞋其目招王左右侍者王大怒欲誅優師優師大怖乃剖木以示王皆附會革木所爲五臟完具王大悅乃廢其肝則目不能瞋廢其心則口不能語廢其脾則手不能運王厚賜之

清波雜志云宣和間鈞天樂部焦德者以諸謠被遇時借以諷諫蔡京以鄰地爲西園毀民屋數百間一日京在園中顧謂德曰西園與東園何如德曰東園嘉木繁蔭望之如雲西園人民起離淚下如雨可謂東園如雲西園如雨語聞抵罪

樂府雜錄云咸通以來有范傳康上官唐卿呂敬遷等三人弄假婦人案此優人作旦之始

委巷叢談云紹興間內宴有優人作善天文者云世間貴官人必應星象我悉能窺之法當用渾儀設玉衡若對其人窺之見星而不見其人玉衡不能猝辨用銅錢一文亦可乃令窺光堯云帝星也秦師垣曰相星也韓蘄王曰將星也張循王曰不見其星衆皆駭復令窺之曰中不見星只見張郡王在錢眼內坐殿上大笑俊最多賛故譏之

閒燕常談云政和中何執中爲首台廣殖貲產邸店之多甲於京師時有以舊印行吉觀國所試爲君難

小經義稱爲上皇御製者人競傳誦會大宴伶官爲優戲相謂曰官家萬機之暇何所爲曰不過燕樂爾曰不然亦如舉子作文義問何以知之遂舉爲君難義誦一過乃以手加額北鄉贊歎說聖意匪獨俯同韋布之士留神經術仰見兢兢圖治不安持守之深意天下幸甚又問宰相退朝之暇何所爲曰亦作文義問何義曰爲臣不易義乃批其頰曰日掠百二十貫房錢猶自不易裏蓋俚語以貧窶爲不易也

明史紀事本末云汪直用事久勢傾中外天下凜凜有中官阿丑善談諧于上前作院本頗有譖諫風一日丑作醉者酣酒狀前遣人佯曰某官至醜罵如故又曰駕至醜亦如故曰汪太監來醉者驚迫帖然旁一人曰駕至不懼而懼汪太監何也曰吾知有汪太監不知有天子又一日忽效直衣冠持雙斧趨踰而行或問故答曰吾將兵惟仗此兩鋸耳問鋸何名曰王越陳越也上微哂

劇說卷二

宙載云湖廣志安陸州董仲漢董永子母乃織女生仲而靈異數篆符鎮邪怪近日院本以董仲舒爲永子不知仲舒生于西漢永爲東漢末人不惟相隔遠甚亦且侮蔑先儒或以永子名仲遂以仲舒當之耶莊嶽委談云今傳奇有所謂董永者詞極鄙陋而其事實本搜神記非杜撰也又云連環亦本元曲或稱李長吉詩檣銀龜騎白馬傳粉美人大旗下以爲卽呂布美人殊不知傳粉自說呂貌非姬妾也按元曲呂布美人貂蟬小字紅昌河上楮談云世俗戲文小說有斬貂蟬關索鮑三娘等記流傳傅會真僞混淆然蜀有關索嶺又有鮑家莊不知何也

錄鬼簿載白仁甫所作劇目有祝英臺死嫁梁山伯宋人詞名亦有祝英臺近錢塘遺事云林鎮屬河間府有梁山伯祝英臺墓乾隆乙卯余在山左學使阮公修山左金石志州縣各以碑本來嘉祥縣有祝英臺墓碣文爲明人刻石丙辰客越至寧波聞其地亦有祝英臺墓載于志書者詳其事云梁山伯祝英臺墓在鄞西十里接待寺後舊稱義婦冢又云晉梁山伯字處仁家會稽少遊學道逢祝氏子同往肆業三年祝先返後山伯歸訪之上虞始知祝爲女子名曰英臺歸告父母求姻時已許鄧城馬氏山伯後爲縣令娶疾弗起遺命葬鄧城西清道原明年祝適馬氏舟經墓所風濤不能前英臺臨冢哀痛地裂而埋璧焉事聞于朝丞相謝安封義婦冢此說不知所本而詳載志書如此乃吾郡城北槐子河旁有高土俗亦呼爲祝英臺墳余入城必經此或曰此隋煬帝墓謬爲英臺也

鍾嗣成作錄鬼簿。以董解元居首。云以其創始故列諸首。又云胡正臣杭州人。董解元西廂記。自吾皇德化。至于終篇。悉能歌之。筆談云。董解元西廂記。曾見之盧兵部許。一人援絃。數十人合座。分諸色目而遞歌之。謂之磨唱。盧氏盛歌舞然。一見後無繼者。趙長白云。一人自唱非也。按今之馬上截本此。

輝縣褚邱去百泉四十里。有白馬將軍祠。土人多崔姓。而近又有鄭村。有演崔鄭傳奇者。土人以石擊之。見書影曠闊。雜志云。唐鄭太常恆暨崔夫人鴛鴦合祔墓。在淇水之西北五十里。曰舊魏縣。蓋古道澳也。明成化間。淇水橫溢。土崩石出。秦給事貫所撰志銘在焉。黎人得之。鬻諸崔氏。爲中亭香案石。久之尋得其家。有胥吏名吉者。識之。白于縣令邢某。置之邑治。志中盛傳夫人四德咸備。乃一辱于元微之會真記。再辱于關漢卿王實甫之西廂記。歷久而志銘顯出。爲崔氏洗冰玉之恥。亦奇矣。詩辨坻云。陳仲醇品外錄載唐府君夫人崔氏合祔墓志銘。秦貫所撰也。陳因據此辨會真之誣。用意可謂長者。後余見此搨本楷書。微兼隸體。筆意遒古。而詞亦質雅。第志稱府君諱遇。不諱恆。而眉山黃恪復以會真年月參之。此碑所謂崔氏者。其生平尙長雙文四歲。蓋榮陽博陵世通婚姻。誌中崔鄭不必便爲鴛恆。仲醇但欲爲雪崔之地。而弗深考耳。

西廂記始于董解元。固矣。乃武林舊事雜劇中。有鴛鴦六么。則在董解元之前。錄鬼簿。王實甫有崔鴛鴦待月西廂記。同時睢景臣有鴛鴦牡丹記。王實甫止有四卷。至草橋店夢鴛鴦而止。其後乃關漢卿所續。詳見曲藻及南濠詩話。李日華改實甫北曲爲南曲。所謂南西廂。今梨園演唱者是也。王實甫全依董解元。惟董以敵賊下書者爲法聰。實甫改爲惠明。關所續亦依于董。惟董以張珙用法聰之謀。攜鴛

奔于杜太守處關所續則杜來普救寺也日華南曲則一沿王關耳偷父漫譏漢卿所續之非蓋未見董詞也查伊璜以關所續未善更作續西廂四折大概仍用董關而增以應制賦詩卽用待月西廂之句又夫人欲以紅娘配鄭恆紅娘不許而欲自縊事皆蛇足曲亦村拙遠不及漢卿矣碧蕉軒主人作不了緣四折則本自從別後減容光一詩而作也崔已嫁鄭恆張生落魄歸來復尋蕭寺訪鶯鶯不可復見情詞悽楚意境蒼涼勝于查氏所續遠甚董關而外固不可少此別調也明人又有續西廂昇仙記序稱吁江韻客所撰謂紅娘成佛而寫鶯鶯之始鄭恆訴于陰官鬼使擒鶯紅來救之意在懲淫勸善但詞意未能雅妙耳

卓珂月有新西廂其自序云崔鶯鶯之事以悲終霍小玉之事以死終小說中如此者不可勝計乃何以王實甫湯若士不能脫傳奇之窠臼耶余讀其傳而慨然動世外之想讀其劇而靡然興俗內之懷其爲風與否可知也紫釵記猶與傳合其不合者止復甦一段耳然猶存其意西廂全不合傳若王實甫所作猶存其意至關漢卿續之則本意全失矣余所以更作新西廂也段落悉本會真而合之以崔鄭墓碣又旁證之以微之年譜不敢與董王陸李諸家爭衡亦不敢蹈襲諸家片字言之者無飾聞之者足以歎息蓋崔之自言曰始亂之終棄之固其宜也而微之自言曰天之尤物不妖其身必妖于人合二語可以蔽斯傳也

琵琶記說者各不同留青日札云高明溫州瑞安人以春秋中元至正四年乙酉第授處州錄事改調浙東閩幕都事轉江西行臺掾又轉福建行省都事方國珍留幕下不從旅寓明州櫟社以詞曲自娛因

感劉後村詩作琵琶記。有王四者。以學聞。則誠與友善。勸之仕。登第後。棄妻周氏。贅太師不花家。則誠作此以諷。取琵琶上四字爲王四云爾。元人呼牛爲不花。故謂牛太師。而伯喈曾附董卓。乃以之託名焉。高祖徵時。常奇此戲文。御極召則誠。以疾辭。使者以記上。於是捕王四置極刑。東嘉後卒于寧海。曲藻云。高則誠琵琶記。其意欲以譏當時一士大夫。而託名蔡伯喈。不知其說。偶閱說郛所載唐人小說。牛相國僧孺之子繁。與同人蔡生邂逅。文字交尋。同舉進士。才蔡生欲以女弟適之。蔡已有妻趙矣。力辭不得。後牛氏與趙處。能卑順自將。蔡仕至節度副使。其姓事相同。一至于此。則誠何不直舉其人。而顧誣鑲賢者。至此耶。毛德音評琵琶記。引大圓索隱云。高東嘉名則誠。元末人。與王四相友善。王四亦當時知名士。後以顯達改操。遂棄其妻周氏。而坦腹於時。相不花氏家。東嘉欲挽救不可得。乃作此書諷之。而託名蔡邕者。以王四少賤。嘗爲人傭菜。趙五娘者。以姓傳自趙至周而適五也。牛丞相者。以不花家居牛渚也。記以琵琶名。以有四王字也。所謂張太公者。東嘉自寓也。又真細錄云。明祖纂刪元人詞曲。偶見琵琶記。而異之。後廉知其爲王四而作。遂執王四付之法曹。二說與留青日札同。吾里徐坦庵。則主牛僧孺事。余按宋人詩云。斜陽古柳趙家莊。負鼓盲翁正作場。死後是非誰管得。滿村聽說蔡中郎。輟耕錄所列雜劇之目。亦有蔡伯喈。意者高則誠之作琵琶。當本于宋元以來所相承。如西廂之本于鶯鶯六么耳。僧孺之女。固爲適合。王四之諷。亦未足憑。閒中今古錄云。元末永嘉高明字則誠。登至正元年進士。歷任慶元路推官。文行之名重于時。見方谷珍來據慶元。避世于鄞之櫟社。以詞曲自娛。因劉後村有死後是非誰管得。滿村聽唱蔡中郎之句。因編琵琶記。用雪伯喈之恥。洪武中徵辟。辭

以心疾不就使復命上曰朕聞其名欲用之原來無福既卒有以其記進上覽畢曰五經四書如五穀家家不可缺高明琵琶記如珍羞百味富貴家豈可缺邪其見推許如此

雕邱雜錄云則誠琵琶記閉閣謝客極力苦心歌詠久則吐涎沫不絕按節拍則脚點樓板皆穿書影云虎林昭慶寺僧舍中有高則誠爲中郎傳奇時几案當拍處痕深寸許在園雜志云琵琶記高東嘉撰於處州郡城之西姜山上懸藜閣中靜志居詩話云則誠填詞燒雙燭至喫糠一酌句云糠和米本一處飛雙燭花交爲一道聽錄云琵琶乃詞曲之祖嘗見李中麓寶劍記序云永嘉高明初編琵琶時坐高樓中每夜秉二絳燭于前詐云神助以冀其傳曲成自歌疊足爲節樓板至有足痕

茶餘客話云蔣仲舒堯山堂外紀言撰琵琶者乃高拭字則成別是一人按涵虛子曲譜有高拭無高明蔣氏或別有據

歐江逸志云王十朋字龜齡年四十七魁天下以書報其弟夢齡昌齡曰今日唱名蒙恩賜進士及第惜二親不見痛不可言嫂及聞詩問禮可以此示之詩禮其二子也此二語者上念二親而不以科名爲喜特報二弟而不以妻子爲先孝弟之意可見矣爲御史首彈丞相史浩今世所傳荆釵記玉蓮乃梅溪女孫汝權乃梅溪同榜進士史客故謬其說耳又一說玉蓮實錢氏本倡家女初王與之狎錢心許嫁後王狀元及第歸不復顧錢憤投江死聽雨筆記云孫汝權乃宋朝名進士有文集行世玉蓮則王十朋女也十朋劾史浩八罪乃汝權嗾之理宗雖不聽而史氏子姓怨兩人刺骨遂作荆釵記以玉蓮爲十朋妻而汝權有奪配之事其實不根之謗也冬夜牋記天祿識餘與此略同按史載陳之茂嘗毀

史浩浩擬之茂進職上曰卿以德報怨邪曰臣不知有怨若以爲怨而以德報之是有心也莫濟詆浩尤甚浩薦濟掌內制上曰濟非議卿者乎浩曰臣不敢以私害人浩寬厚如此何其客獨惡于龜齡而見諸詞曲耶書影亦辨之云荆釵後人謂史之黨爲之以詈王者宋時安得有傳奇也南窗閒筆云錢玉蓮宋名妓從孫汝權某寺殿成梁上題信士孫汝權同妻錢玉蓮喜捨此亦以玉蓮爲妓而前則以爲王不顧而投江此則以爲從孫而施寺恐皆緣傳奇而傳會耳河上楮談云或謂高作琵琶陳留人多病之乃作荆釵蓋王梅溪孫汝權皆永嘉人故欲以報也升菴集云潛說友宋之安撫使今傳奇王十朋有此人譌爲錢

宋楊文公才思敏給北朝致祭皇后文楊捧讀空紙無一字隨自撰曰惟靈巫山一朵雲閨苑一團雪桃源一枝花秋空一輪月豈期雲散雪消花殘月缺仁宗大喜此數語謂之一時敏給則可謂之是祭皇后文輕穉失體矣柯丹邱荆釵記曲中用之作梅溪祭玉蓮確當不可易(今坊本荆釵記無此祭文)荆劉拜殺爲劇中四大家荆釵柯丹邱作白兔卽劉也拜月施君美作君美名惠元武林人今名幽閨記殺狗俗名玉環徐晤仲由作仲由淳安人洪武中徵秀才至藩省辭歸有巢雲集自稱曰吾詩文未足品藻惟傳奇詞曲不多讓古人

譚輅云荆釵相會處不佳後人改婦姑遇于舟中愈于原本

河上楮談云高則誠琵琶止于書館相逢賞月掃松爲朱教諭所補
莊嶽委談云琵琶記崑山有良璧詩黃允何其愚說者以漢末有二王允一誅董卓一乃棄妻再娶非也

蓋謂黃允非王也黃允黜遣其妻見後漢書黨錫傳今本多誤又正是此曲才堪聽又被風吹別調間用高騁詩曰正是者其引用古人也

新唐書張士貴虢州盧氏人本名忽嶧彎弓百五十斤左右射無空發降唐從征伐有功又從平洛封虢國公右屯衛大將軍貞觀七年爲冀州道行軍總管破反獠還太宗聞冒矢石先登勞之曰嘗聞以忠報國者不顧身於公見之累遷左領軍大將軍然則士貴者唐之良將也元張國賓作薛仁貴榮歸故里雜劇乃謂張士貴冒薛之功經保勸辨明斥士貴爲民吏又稱薛仁貴絳州龍門人少貧賤以田爲業其妻柳以天子自征遼東求猛將勸仁貴圖功名仁貴乃往見將軍張士貴應募至安地雜劇言仁貴妻柳氏本莊農人與史合而士貴之冒功則謬悠其說也潘美宋之功臣也宋史楊業傳云雍熙三年大兵北征以潘美爲雲應路都部署命業副之以西上閭門使王侁軍器庫使劉文裕護其軍師次桑乾河會曹彬敗績諸路班師契丹國母蕭氏與耶律漢寧等領衆十萬陷寰州業言不可與戰侁斥其懦令其直趨雁門北川中業泣謂美曰此行必不利因指陳家谷口曰諸軍于此張步兵強弩爲左右翼以待俟業轉戰至此卽以步兵夾擊援之不然無遺類矣美與侁領麾下兵陣于谷口自寅至巳侁使人登托邏臺望之以爲契丹敗走欲爭其功領兵離谷口美不能制業力戰自午至暮至谷口見無人拊膺大慟率帳下士再戰身被數十創士卒殆盡業手刃數十百人馬傷不能進遂被擒其子延玉亦沒焉業不食三日死帝聞之痛惜甚贈太尉錄其諸子潘美降三官王侁劉文裕除名是役也王侁爭功以致業敗美之罪在不能制侁耳元人朱凱作孟良盜骨殖則云業與北番交戰被圍虎口交

牙谷命第七兒楊延嗣乞師于潘。潘攢箭射死業，因不能脫。夫同沒者延玉，此名延嗣，果乞師而潘射之，則潘之惡甚矣。至今婦人孺子無不唾罵張士貴、潘美爲奸者，而史之所書則如此。若近來所演，則爲業報恨者，正爲王侁尤與正史相反矣。然則殺業父子者果侁不用命也？抑美殺之而移禍于侁耶？張士貴、潘美皆一代勳臣，史官爲之粉飾，未必不有之。則傳奇之事，故老相傳，或轉有如洛中隱士趙逸者耶？（洛陽伽藍記載趙逸，晉武時人。晉朝舊事多所記錄，云自永嘉以來二百餘年，建國稱王者十六君，皆遊其都邑，目見其事。國滅之後，觀其史書，皆非實錄，莫不推過于人。引善自向，符生雖好勇嗜酒，亦仁而不殺。觀其治典，未爲兇報，及詳其史，天下之惡皆歸焉。）夫以潘美之才，豈不能制侁者？且侁與業之言成敗顯然，美何聽侁而不聽業耶？業死時大呼爲奸臣所害，謂侁耶？謂美耶？吾詳錄史文，以證雜劇之誣，而不能無疑焉。

元人樂府有村裏迓鼓之名。琵琶記中有此曲。琵琶白有打十三之說。元人常用之。本宋制徒刑有五徒一年者杖脊十三，杖刑有五杖六十者折臂杖十三。

知新錄釋西廂疑義云：文魔秀士風欠酸丁。元人蕭淑蘭劇云：改不了強文撇醋饑寒臉，斷不了詩云子曰酸風欠欠作欠伸之欠亦可。張生寄書有云：途易前因，因與姻通。南史王元規傳：姻不失親，古人所重，豈敢輒婚非類。量著這大小車如何載得起，大小謂多少也。藍采和劇出來的偌大小年紀，北人鄉語盡然。邵康節云：程明道兄弟大小聰明是也。顛不刺的見萬千不刺，北人襯語顛卽顛倒，猶言沒頭緒也。不刺二字隨字可襯，如舉案齊眉劇，破不刺碗兒是也。萬歷四年張江陵當國，將太祖南京所藏

寶玩取上京師中有顛不刺寶石一塊重七分老米色若照日只見石光所以爲寶也著西廂劇文以顛不刺爲美女不知何據見金陵瑣事惹的心漾心蕩也元詞花柳中使人心漾旣不沙猶云若不然如勘頭巾劇旣不沙怎無個收拾慈悲黃梁夢劇旣不沙可怎生蝶翅舞飄飄湯他一湯湯去聲金線池劇休想我指尖兒湯著你皮肉今俗亦有此語今夜淒涼有四星徐天池云製秤之法末梢存四星隱語下梢也兩世姻緣劇我比卓文君有了上梢沒有四星可證鵠伶滌老不尋常北詞伶俐謂之鵠伶或作胡伶或作鵠鵠滌老謂眼也亦作睞老老是覩字如身爲驅老手爲爪老是也鵠伶二字不專指眼隨在可用如宋方壺詞鵠伶惜惺惺王和卿詞假聰明逞胡伶是也

天香樓偶得云兀刺赤元人掌車馬者之稱故拜月有云兀刺赤兀刺門外等多時山居新話云中途有酒車百餘乘其回車之兀刺赤多無禦寒之衣此掌車馬者稱兀刺赤之證

靜志居詩話云何元朗臧晉叔皆精音律元朗評拜月出琵琶上王元美目爲好奇之過晉叔謂琵琶梁州序念奴嬌序二曲不類高則誠口吻當是後人竄入元美大不以爲然津津稱訛不置晉叔歎曰是烏知所謂幽閨者哉嘗從黃州劉延伯借元人雜劇二百五十種又購得楊廉夫仙遊夢遊俠遊冥遊彈詞悉鏤板以行序言鄭若庸玉玦張伯起紅拂等記以類書爲傳奇屠長卿曇花道白終折無一曲染伯龍浣紗梅禹金玉合道白終本無一散語均非是且言汪伯玉南曲失之靡徐文長北曲失之鄙惟湯義仍庶幾近之而失于疏其持論斷斷不爽如是

明人南曲多本元人雜劇如殺狗八義之類則直用其事玉茗之還魂記亦本碧桃花倩女離魂而爲之

者也。又睽車志載士人寓三衢佛寺。有女子與合。其後發棺復生遁去。達書于父母。父以涉怪忌見之。柳生杜女始末全與此合。知玉茗四夢皆非空撰而有所本也。（齊東野語言嘉熙間有宰宜興者。縣齋前紅梅一樹極美。廉華粲。一夕酒散。見紅裳女子。自此恍然若有所遇。有老卒頗知其事。白曰。昔聞某知縣之女有殊色。及笄未適而殂。其家遠在湖湘。因藁葬于此。樹梅以識之。遂發之。其棺正蟠絡老梅根下。兩和微蝕。一竅如錢。若蛇鼠出入者。啓而視之。顏貌如玉。妝飾衣衾。略不少損。真國色也。令見爲之心醉。昇至密室。加以茵藉。而四體亦和柔。非尋常僵屍之比。于是每夕與之接。既而氣息惙然。瘦恭不可治文書。其家憂之。乃乘間穴壁取焚之。令遂屬疾而殂。）靜志居詩話云。義仍填詞妙絕一時。牡丹亭曲尤極情摯。世或相傳云刺曇陽子而作。然太倉相君實先令家樂演之。且云吾老年人近頗爲此曲惆悵。相君雖盛德有容。必不反演之于家也。按弇州史料云。女曇陽子以貞節得仙。自日昇舉。未必如俗所傳也。王師事仙子湯或卽以此詬王耶。春浮園偶錄載婁江王相國偶出家樂演牡丹亭。周明行中丞曰。吾老矣。近頗爲此曲惆悵。則非相君語也。吳江沈瓊近事叢殘一書。載曇陽事甚詳。謂太倉王學憲鼎爵于瓜洲。娶一婢。名曰瓜秀。學憲卒後。其家人某者。托他人名。轉娶爲己妾。深藏于鄉莊。遂屋中久之。漸傳播于外。恐主知之。乃轉售于人。遂爲娼于浙中。有浙狂生某者。與之狎。問知其鄉里。又能言相公家事。異之。曰。子莫非卽往年所稱曇陽乎。曰。是也。于是狂生揚言于人。自稱爲王壻。且爲詩歌以彰之。遂有流言于世。可恨哉。又云。曇陽仙太倉王相公之次女也。產時無血。少許聘徐少參廷課子。方相公在朝時。時當乙亥丙子間。徐氏子卒于家。未有信至。女已先知。取白衣服之。父母問其

故曰徐氏子某日死矣未幾書至大驗因謂父母曰女欲學道求仙不復從人間事矣父母聽之每日有雲衣鶴駕諸仙真從窗櫺中入與聚談倏忽不見能書蟲魚禽鳥諸篆文相公有所疑從之質問女爲開示出人意表公大信服亦稱爲師江陵公問之公述其概江陵公曰果爾不特爲仙且近佛矣公恐在京日久宮中聞之或有宣召乃遣與母先歸而次年丁丑公忤江陵公亦歸女漸能出陽神隨意所往又有一蛇在旁仙所至蛇必與俱以護龍呼之一日至郡城南濠陸某家謂爲可度收爲弟子其人市井又行使僞銀無他可取後亦迄無所成又一日遣人持一縑送弇州公曰公可學道弇州公欣然事爲師久之及門者漸衆且欲翀舉以去其父謂之曰汝爲女子須留蛻以解人疑至庚辰九月重陽日化去送者萬人挂劍瞑目而逝年二十餘耳龕隨槧鍵迎置城隅立菴尊奉之號曇陽菴蓋自謂薰梁時曇鬱菩薩後身也又先剪一鬢以殉徐氏子之葬故自稱左髻曇陽子云傳有八戒二歌弇州公爲立傳傳于世

黎瀟雲語云內江一女子自矜才色不輕許人讀還魂而悅之逕造西湖訪焉願奉箕帚湯若士以年老辭女不信一日若士湖上宴客女往觀之見若士皤然一翁偃僵扶杖而行女歎曰吾生平慕才將托終身今老醜若此命也因投于水張某愈娘傳云婁江愈娘麗人也行二幼婉慧體弱常不勝衣迎風輒頓十三疽苦左脇彌連數月小差而神愈不支媚婉之容不可逼視年十七天當愈娘之在牀褥也好觀文史父憐而授且讀且疏多父所未解一日授還魂記凝睇良久情色黯然曰書以達意古來作者多不盡意而出如生不可死死不可生皆非情之至斯真達意之作矣飽研砂丹密圈旁注往往自

寫所見出人意表如感夢一齣注曰吾每喜睡睡必有夢夢則耳目未經涉者皆能及之杜女故先我著鞭耳愈娘有妹落風塵中一時稱仙子靜志居詩話云婁江女子愈二娘酷嗜牡丹亭曲斷腸而死故義仍作詩哀之云畫燭搖金閣真珠泣繡窗如何傷此曲偏只在婁江此三說蓋一事而傳聞異詞也又相傳張江陵欲以鼎甲畀其子羅海內名士以張之令諸郎因其叔延致湯沈兩生湯臨川獨不往而宣城沈君典遂與江陵子懋修偕及弟邯鄲夢中字文卽指江陵也兩夢中吊打欽定諸劇皆極詆訕至云狀元能值幾文來憤悵極矣蔣心餘太史本此諸事作臨川夢傳奇

明武宗幸太原取晉府樂工楊騰妻劉良女大喜之攜以遊幸江彬及八黨輩皆以母事之及南征劉氏以一簪贈武宗爲信馳馬失去比至臨清召劉氏劉氏以無信不肯行輕舸疾至潞河挾以俱往笠翁玉搔頭傳奇本此胡纘宗亦有詩詠其事驚喜君王至西華夜啓扉後車三十乘載得美人歸

筆談云魏良輔別號尙泉居太倉南關能諳聲律若張小泉季敬坡戴梅川之類爭師事之梁伯龍起而效之考訂元劇自翻新調作江東白紵浣紗諸曲又與鄭思笠精研音理唐小虞鄭梅泉五七輩雜轉之金石鏗然譜傳藩邸戚晚金紫熠爚之家取聲心宗伯龍氏謂之崑腔張進士新勿善也乃取良輔校本出青于藍偕趙瞻雲雷勇民與其叔小泉翁踏月郵亭往來倡和號南馬頭曲其實稟律于梁而自以其意稍爲韻節崑腔之用不能易也蝸亭雜訂云梁伯龍風流自賞修髯美姿容身長八尺爲一時詞家所宗艷歌清引傳播感里間白金文綺異香名馬奇技淫巧之贈絡繹于道歌兒舞女不見伯龍自以爲不詳也其教人度曲設大案西向坐序列左右遞傳疊和所作浣紗記至傳海外然止此不

復續筆。浣紗初出。梁遊青浦。時屠隆爲令。以上客禮之。卽命優人演其新劇爲壽。每遇佳句。輒浮大白。梁亦豪飲自快。演至出獵。有所謂擺開擺開者。屠厲聲曰。此惡語。當受罰。蓋已預儲汙水。以酒海灌三
大孟。梁氣索強盡之。吐委頓。次日不別竟去。靜志居詩話云。梁大伯龍填浣紗記。王元美詩所云。吳闔
白面治遊兒。爭唱梁郎雪艷詞。是也。又有陸九疇、鄭思笠、包郎郎、戴梅川輩。更唱迭和。清詞艷曲。流播
人間。今已百年。傳奇家別本弋陽子弟可以改調歌之。惟浣紗不能。固是詞家老手。芳菴詩話云。梁辰
魚字伯龍。以例貢爲太學生。虬鬚虎額。好輕俠。善度曲。世所謂崑山腔。自良輔始。而伯龍獨得其傳。著
浣紗傳奇。梨園子弟多歌之。同里王伯稠贈詩云。彩毫吐艷曲。粲若春花開。斗酒清夜歌。白頭擁吳姬。
家無擔石儲。出多年少隨。

審影云。呂文穆公父龜圖與母不相能。并文穆逐出之。羈流於外。衣食殆不給。龍門寺利涉院僧識其爲
貴人。延至寺中。爲鑿山岩爲龕居之。文穆處其間九年。出而廷試第一。七年爲參知政事。其後諸子卽
石龕爲祠堂。名曰肄業。富韓公爲作記。公旣登第。攜其母見父。雖許納之。終不與相見。乃同堂異室而
居。今所傳文穆傳奇似影響於此。且以母事爲妻事。大可噴飯矣。譚輅云。呂蒙正母劉氏。與父不睦。其
妻自姓宋氏。莊獻委談。邵氏見聞錄並載。呂蒙正微時。于洛陽龍門利涉院土室中。與溫仲舒讀書。一
日行伊水上。見賣瓜者。意欲得之。無錢可買。其人偶遺一枚于地。公悵然取食之後。作相。買園洛城東
南。下臨伊水。設亭以餧瓜名焉。考宋史。呂實起寒微。土室餧瓜多有之。堯山堂外紀云。呂蒙正朝罷歸
衙。偶片雪沾衣。欲斬執役人。夫人因舉撥灰詩諷之。乃已。又隨事諫諷。嘗題鵝吻云。獸頭原是一團泥。

做盡辛勤人不知。如今撞在青雲裏。忘却當年窖內時。香祖筆記云。避暑錄言。父逐蒙正。龍門僧鑒龕以居。今傳奇有破窯之說。亦沿俗論。但言窯而不言龕。

譚輅云。紅線一傳。雖虞初之談。其說本于淮南楚將子發事。友人梁伯龍據其傳作院本。湧幢小品云。紅線雜劇。乃梁伯龍所著。今時所用。不知胡懋禮已先之。更勝于梁客座贅語云。胡秋宇先生在翰林日。以言忤政府。出爲藩參先生文雅風流。不操常律。所著小說書數種。多奇葩異。間亦有閨閣之靡。人所不忍言。如蘭芽等傳者。今皆祕不傳。所著紅線雜劇。大勝梁辰魚所作。

張鳳翼伯起。長洲人。與其弟獻翼幼于并有才名。吳人語曰。前有三皇。後有三張。伯起老于公車。好度爲新聲。所著紅拂記。梨園子弟皆歌之。游宦餘談云。虬髯客傳。紀遇李衛公于靈石旅店。約往太原見州子于汾陽橋候之。余入太原。初過靈石縣次汾陽橋。無所謂靈石者。意傳奇中所云者。乃抄錄相傳之誤。而張伯起紅拂記因之。曲藻云。張伯起紅拂記一佳句云。愛他風雪耐他寒。不知爲朱希眞詞也。其起句云。檢盡曆頭冬又殘。愛他風雪耐他寒。拖條竹杖家家酒。上個籃輿處處山。亦自瀟灑。

蝶亭雜訂云。張伯起少時作紅拂記。演習之者遍國中。丙戌上太夫人壽。作祝髮記。則年六十矣。播事奏效。大將楚人李應祥者。以金求作傳奇。以侈太其勳利。其潤筆而誇之過當。未免蛇足。今其曲亦不行。麒麟閣中換簡一折。亦有所本。秦瓊本傳云。從秦王夾擊美良川。破尉遲敬德。功最居多。蓋鄂公之驍勇。惟胡公能埒之。其後多病。常自云。吾生平苦戰。出血不下數斗。焉能不病乎。瓊善銳。銳音簡。短兵也。形似小鑿。歐公桑擇傳云。擇善劍及鐵簡力過數人。歸潛志言。王副樞晦以鐵簡迎擊。僧腦出而斃。山居

新話云有以馬鞭獻文貞王者製作精最技艱取之一鐵簡在焉胡氏筆叢辨鞭簡之說絕爲不根。曲藻云明珠卽無雙傳陸天池采所成乃兄浚明給事助之亦未盡善南音三籟云陸天池作南西廂悉以己意自創不襲北劇一語志可謂悍矣然元調在前豈易角勝耶其所爲明珠尖俊宛轉處在當時固爲獨勝非梁梅派頭故南西廂不及遠甚芳菴詩話云陸采字子元年十九作王仙客無雙傳奇疑耀云今俗演繡襦鄭元和殺駿馬奉伎人李亞仙乃元翰林學士王元鼎與妓人順時秀事也莊岳委談云繡襦記事出唐人李娃傳皆據舊聞第傳止稱其父滎陽公而鄭子無名字後人增益之耳靜志居詩話云鄭若庸字中伯崑山人曳裾王門妙擅樂府嘗填玉琰詞以訕院妓一時白門楊柳少年無繫馬者羣妓患之乃醵金數百行薛生近堯作繡襦記以雪之秦淮花月頓復舊觀金陵瑣事云徐霖填金南北詞大有才情余所見戲文繡襦諸本行世然則鄭元和李亞仙事自元人石君寶作曲江池雜劇外徐與薛兩人各有繡襦記矣

鷄亭雜訂云鄭之文字應尼南城人公車下第薄遊長干曲中馬湘蘭負盛名與王百穀諸公爲文字飲不禮應尼應尼恨之與吳非熊輩作白練裙雜劇極爲譏訕聚子弟演唱召湘蘭觀之湘蘭微笑而已定湘傅司業清嚴訓士一日召應尼跪東廂下數之曰舉子當爲輕蝶耶收以檟楚後應尼舉進士官南部郎遷某郡太守貫餘齋筆記云馮開之爲南祭酒東南名士雲集金陵屠長卿新奉恩詔復冠帶亦作寓公慕狹邪寇四兒之名先以纏頭往至日具袍服頭踏呵殿而至踞廳事南面呼姬出拜令寇姬旁侍行酒六院喧傳以爲談柄江右孝廉鄭豹先名之文者素以才自命遂作一傳奇名曰白練

祖墓寫屠慾狀曲盡時吳下王百穀亦在留都曾召名妓馬湘蘭馬已年將耳順王則望七矣兩人尙講衾綢之好鄭亦串入其中備列醜態一時爲之紙貴按屠令青浦時上海孝廉俞顯卿以事干謁之屠不聽且加侮慢愈心恨甚及爲刑部主事論劾長卿云日中爲市交易而退翠館侯門青樓郎署上覽之大怒得旨兩人俱革職此言其詔復冠帶後仍有寇四兒之事

張孝祥于湖宋紹興甲戌狀元高宗謂爲謫仙人天性倜儻勇于爲義每作詩文輒問門人視東坡何如謝堯仁謂以先生筆力讀書十年看東坡有餘矣高深甫作玉簪假于湖以資談笑當亦如琵琶之蔡邕荆釵之王十朋耳古今女史云宋女貞觀陳妙常尼年二十餘姿色出衆詩文俊雅工音律張于湖授臨江令宿女貞觀見妙常以詞調之妙常亦以詞拒之詞載名媛璣囊後與于湖故人潘法成通潘密告于湖以計斷爲夫婦卽今所傳玉簪也此言陳爲尼而玉簪作道姑蓋以尼必削髮于當場爲不雅本元人鄭彩鶯作道姑耳乃其曲云從今孽債繙衣又云姑娘在禪堂打坐則隱寓其爲尼也笠翁譏之非是西閣偶談云涇陽有潘必正墓

斷殺狗勸夫之王翛然歸潛志云金朝士大夫以政事著名者曰王翛然嘗同知咸平府攝府事時遼東路多世襲猛安謀克居焉其人皆功臣子驚亢奢縱不法公思有以治之會郡民負一世襲猛安者錢貧不能償猛安者大怒率家僮強入其家牽牛以去公得其情令一吏呼猛安者猛安盛陳騎從以來公朝服召至廳事前詰其事趨左右械繫之乃以強盜論杖殺於市一路悚然後知大興府素察僧徒多游貴戚家作過乃下令午後僧不得出寺街中不得見一僧有一長老犯禁公械之長老者素爲貴

唐明和皇帝姑蘇國公主使人詣公請焉。公曰：奉王命卽令出立召僧杖一百死。自是京輦肅清。世宗深見知，故公得行其志也。至今人云過宋包拯遠甚。

玉壺清話云：樊知古江南人，無鄉里之愛，舉于鄉，不獲第。因謀北歸，以釣竿漁于采石江。凡數年，橫長組量江水之廣深，短或中沈陰，有物波底助起，心知其國之亡，遂仗策謁太祖，送學士院本科及第，遣湖南督匠造黃黑龍船于荆南，破竹爲索，數千艦由荆南而下。舟旣集，就采石磯試焉，密若胼脣，不差尺寸。池陽聿雲氏作《量江記》，傳奇于量江一酌，用龍王鬼卒助之，本此非他。傳奇假借鬼神之例也。史稱李後主送知古家口于樊，傳奇言後主執之用爲劇中波瀾耳，然而誣後主矣。

藝苑卮言云：正德間有妓女失其名，于客所分詠，以骰子爲題云：一片寒微骨，翻成面面心。自從遭點汚，拋擲到如今。元人關漢卿雜劇載錢可謝天香事亦有之，特後人稍易其語耳。

南園漫錄云：予郡有符丁二姓，相友善。丁後病，而有子支漫不事生產。丁乃以白金若干託符曰：子支漫不事生產，恐身後卽耗，煩爲密收，而訓使治生。改則畀之，不可改則君之物矣。符許諾。日過其子，告以其父命之篤。子稍感悟，曰：恨無資以營生計。符許借之，借而叩之，果不費，則易之焉。踰時再詢而叩之，曰：恨少耳。若多假焉，生彌遂矣。則再借之。如是者三。子曰：若得若干業可成矣。符知其可也，則曰：汝當具牲醴來。吾爲汝轉假其子，如命往。符則以其牲醴置丁之靈前，爲文告曰：君不鄙予，托予以子，而委我以財。今君之子克家矣。財凡若干兩，盡以付君之子。君可以無慮矣。遂歸。時丁頗裕，而符更富。財不相負，而又能忠誨其子，俾可成，可謂難矣。郡人盡能道其事。按是書爲嘉靖間雲南永昌張志淳所

撰其事頗似元人秦簡夫東堂老雜劇。

洞天元記寫形山道人收崑侖六賊事所以闡明老氏之旨歸元鏡寫沈蓮池爲僧事所以發撝禪氏之談于傳奇中別一谿徑（洞天元記楊慎作）

茶餘客話云元人尙仲賢真定人工詞曲嘗作海神廟王魁負桂英曲所演焚香記蓋藍本於此

茶餘客話又云石崇明君詞敍昔公主嫁烏孫令琵琶馬上作樂以慰其道路之思其送明君用琵琶不過爾爾觀此則琵琶自是烏孫公主事今人作詩專以昭君爲故實豈非雜劇誤之耶又云大業間杜寶常修水飾圖經十五卷煬帝觀於曲水有神龜負八卦進伏羲黃龍負圖元龜銜符大鱸銜籜授黃帝丹甲靈龜銜書獻蒼頡鳳皇負圖赤龍載籜授堯龍馬銜中赤文授舜舜觀河渚五老人來告帝期陶河濱黃龍負黃文符璽之圖禹濟江而黃龍負舟元夷蒼水使者以山海經來其類七十有二以七十二航貯之此水戲之始元人關漢卿有隋煬帝牽龍舟樂府卽此

今村中演劇有清風亭認子爲張繼保忘義父之恩爲雷殛按此事本之北夢瑣言張裼尙書典晉州外貯所愛營妓生一子其內子妬忌不敢取歸乃與所善張處士爲子居江津間常致書題問其存亡及漸成長教其讀書有人告以非處士之子爾父在朝官高因竊其父與處士縑劄不告而遁歸京國名仁龜有文性好學脩詞應進士舉及第歷侍御史因奉使江浙於候館自經而死莫知所爲先是張處士悵恨而終必有冥訴罹此禍也

演小青故事爲傳奇者有療姑羹風流院兩種當以徐野君春波影爲最聞見巵言云馮千秋浙中名士崇正乙亥拔貢頗以詩文擅名家素封因無子買妾維揚小青後以妻妬置之別室似亦處之得當不意小青才雋而年夭時人□□傳奇詩歌贊歎而吳石渠炳之療姑羹朱介人京藩之風流院易千秋爲馮致虛以千秋之才因小青而反沒不亦冤哉松陵徐電發載酒放鶴亭求小青墓不得作詩云青青芳草塗紅顏愁對雙峯似翠鬟多少西陵松柏路銷魂一半是孤山注云小青廣陵人爲虎林某生妾早卒羹羹居士爲之作傳而所錄天仙子南鄉子詞多不可考所謂某生卽馮千秋也千秋名延年能詩有文譽名列復社粲花主人演作褚大郎吳某紫雲歌小序云馮紫雲爲維揚小青女弟歸會稽馬髦伯諸所謂小青者歷歷可據惟姓馮則與千秋爲同姓矣書影云昔在秣陵見支小白如增以所刻小青傳徧貽同人鍾陵支長卿語余曰實無其人家小白戲爲之耳後王勝時語余小青之夫馮某尙在虎林則實有其人矣或云小青本無其人其邑子譚生造傳及詩爲戲或曰小青者離情字也或言姓鍾合成鍾情字也予意當時或有其人以夫在故諱其姓字其詩文或亦有一二流傳者衆爲緣飾之耳但以爲出譚生手而余適見小白持以貽人其譚生爲之小白梓之耶抑竟出小白手耶卓人月字珂月作小青雜劇序云天下女子飲恨有如小青者乎小青之死未幾天下無不知有小青者而見之於聲歌則有若徐野君之春波影陳季方之情生文斯豈非命耶傳小青之事者始於羹羹居

士居士之文淋漓宛轉已屬妙手而野君復從而填北劇焉季方復從而填南曲焉詞苑叢談云吳玉川夫人龐小曉蕙纓詩詞書法擅絕當時片紙隻字莫不珍惜有青蓮女伎小青者色藝皆精嘗演劇入後堂持扇叩睡香閣乞書夫人卽調桂枝香一闋有浪萍飛絮前生果別是傷心一小青之句

蘭甕聞話云琥珀匙吳門葉稚斐作變名陶佛奴卽傳奇中翠翹故事中有句云廟堂中有衣冠禽獸綠林內有救世菩提爲有司所恚下獄幾死酒邊贊語云琥珀匙五般宜云我的老骨頭應該作賤他的嫩皮肉何堪拋閃又會河陽云叮寧聲到我喉間哽灰心血到我胸前冷又越恁好云眼觀眼三兩兩相看定手扣手一雙雙相持緊本色處綺語艷詞退避三舍又云後西廂葉稚斐作八折而病朱雲從補成稚斐所作傳奇尚有七種三擊節英雄概開口笑女開科遜國疑八翼飛人中人

邱文莊濬作五倫全備傳奇王端毅謂理學大儒不宜留心詞曲邱大恨之因南太宰王僕爲端毅作大司馬生傳稱許太過遂云若有豪傑駁之禍且不測又端毅所刻疏稿凡成化間留中疏俱書不報邱又謂王故彰先帝拒諫之失御醫劉文泰得邱語因挾仇特疏而王遂去位所以報五倫之怨也南園漫錄云邱文莊所著鍾情麗集雖以所私擬元稹而浮猥鄙亵尤倍於稹所撰五倫記雖法高明而謔浪戲笑尤甚高明

蘇州知府况鍾字伯律南昌靖安人始由小吏事呂尙書震呂薦其才授禮部主事進郎中時仁廟初政令在京五品以上舉所知鍾舉左春坊左中允張宗璉召問楊文貞公士奇曰人皆薦外任下僚鍾何

乃舉朕宮官楊對曰臣與王直方欲擬薦宗璉不意遂爲鍾所先耳仁廟大喜曰鍾知宗璉亦可謂賢矣卽日擢宗璉大理寺丞蓋已有用鍾意宣廟卽位大臣奏蘇州等九大郡繁劇難治遂擢鍾等九人爲知府皆授璽書以行公至蘇廉察官吏去太甚者四五人嚴禁狡猾者惠愛窮弱執勢家侈恣不法者立杖殺之吏民大驚奉行惟謹又表除京運米二十餘萬儒生孤寒者多有所給于是爭獻詩頌鄒亮獻二十詩鍾獨稱賞欲薦其才于朝會有匿名書數亮過失潛揭于府治大門者鍾得書笑曰彼欲阻吾薦正速成亮名耳遂奏亮才學可用召試有驗授吏刑二部司務轉監察御史其勇于爲義類如此歲滿去吏民叩闕請留者八萬人有儒生爲歌曰况太守民父母早歸來慰童叟又曰况青天朝命宣早歸來在明年時已有代鍾者竟易去文貞公贈以詩云十年不媿趙清獻七邑重迎張益州又數年鍾卒吏民多垂泣送柩歸其政績具見張修撰洪所著傳及楊穆西墅雜記今所演雙熊夢劇雜見稗官小說而况青天實本於此賓白詞曲俱極當行一名十五貫

朱素臣文星現傳奇中事多有據唱蓮花落乞酒本堯山堂外紀挾伎調文衡山本說圃識餘備書宦家本蕉牕雜錄

山陰孟稱舜字子若其柳枝集有花前一笑雜劇卽唐伯虎遇侍婢事卓珂月本其事作花舫緣改華爲沈改秋香爲申備來古夫于亭雜錄又謂係江陰吉道人非伯虎秋香乃上海大家非吳興華學士桐下聽然云華學士鴻山察艤舟吳門見鄰舟一人獨設酒一壺斟以巨觥科頭向之極罵旣而奮袂舉觴作欲吸之狀輒攢眉置之狂叫拍案因中酒欲飲不能故也鴻山注目良久曰此定名士詢之乃唐

解元子畏喜甚。肅衣冠往謁。子畏科頭相竊。談謔方洽。學士浮白屬之。不覺盡一觴。因大笑極歡。日暮復大醉矣。當談笑之際。華有小姬。隔簾窺之。子畏作嬌女篇。貽鴻山。鴻山作中酒歌答之。後人遂有傭書配秋香之誣。小說傳奇。竟成佳話。

茶餘客話云。雜劇中唐解元三笑姻緣故事。王阮亭嘗辨爲江陰吉道人。非伯虎也。吉父爲御史。以建言譴謫。道人于洞庭遇異人。得幻術。游虎邱時。有兄喪。上襲麻衣。內著紫綾襪。適上海某。攜宅眷遊山。有小婢秋香。見吉衣紫笑而顧。吉以爲悅已。變姓投爲僕。久之。竟得婢爲室。一日遯去。某知爲吉。認爲翁婿。

卓珂月花舫緣、春波影二劇序云。友人有唐解元雜劇。易奴爲傭書。易婢爲養女。余以爲反失英雄本色。戲爲改正。野君見獵心喜。遂作小青雜劇。以見幸不幸事。天地懸隔若此。

譚元春序想當然云。盧楠字次楩。作想當然。而託名于陸尙書。尙書始治濬令。出次楩于嘉肺中。陸歸。盧隨之。客于吳。書成得名。不復自珍。旋又棄去。次楩生平倚酒謾罵。無故人知己。遺文散而不收。至今始流傳。余見之。吳人客楚者。篋中或曰。此陸少年所爲。以其官久而高不便。以詞曲傳得意之文。又不忍廢。詭云次楩耳。書影云。元人作劇。專尚規格。長短既有定數。牌名亦有次第。今人任意增加。前後互換。多則連篇。少惟數闋。古法蕩然矣。惟余刊江門人王漢恭光魯所作。想當然。猶有元人體裁。其曲分視之。則小令。合視之。則大套。插入賓白。則成劇。離賓白。亦成雅曲。不似今人全賴賓白敷衍。想當然。托盧次楩之名。以傳實出漢恭手。

宋杜默下第夜歸就項羽廟宿以其文質神前痛哭大呼曰千古如大王不能得天下有才如杜默而見放于有司豈非命哉神像淚出泥界于面瀟亭秋雜劇演其實也見和州志尤展成鈞天樂亦有哭廟一折則易其名矣詞苑叢談云吳江張倩倩適同邑沈自徵沈負才任俠所著霸亭秋鞭歌伎簪花髻名漁陽三弄與徐文長並傳古夫子亭雜錄云吳江沈君庸自徵作瀟亭秋鞭歌伎二劇瀟灑悲壯其才不在徐文長下靜志居詩話云吳江沈氏多才詞隱生訂正九宮譜爲審音者所宗副使玩子自徵字君庸亦善詞曲所撰瀟亭秋鞭歌伎諸雜劇慨當以慷世有續錄鬼簿者當目之爲第一流

王辰玉鬱輪袍劇考官故折摩詰詩曰香烟豈有情想萬國定何名目維歎曰詩豈如是論者毛大可譏東坡鶴先知之句正不啻試官語

亦巢偶記云張元鑒名國經嘉定婁塘人少任俠好拳勇皆稱婁塘張二偶爲青衿所斥遂專心時藝得補弟子員與少年名士交仍以俠氣著名西樓記中胥長公卽其人也所云談笑起風波者指趙鳴陽也秋田閒見錄載鳴陽江南吳江人明時孝廉能文以救隣鋪獲罪戍雲南明亡遁迹桂嶺孫延齡逆命召之堅辭不赴與渾融性因爲方外交據此則鳴陽人品豈籜庵所可及相傳西樓記初成就正馮猶龍馮不置可否袁卽席餽百金爲入錯夢一折乃西樓爲馮所改之本名楚江情刻墨憨齋諸劇中凡改處皆自標于闌上如胥長公之妾輕鴻改爲伎女鴻寶兒本識池生遂歸于池又趙不將聞于叔夜登第卽至父處爲之作伐娶素徽爲室以贖前愆皆勝籜庵原作至錯夢一齣極口贊其神化不可思議未嘗有改易之說則錯夢正出袁手不可誣也穆素徽相傳姓木本名白美有故址在吳門秀野

園旁貌不甚美特工于韻語。

曠園偶錄云袁于令生平得意在金鎖而今人盛行西樓文詞甚平但叶調當行當時無兩按籜庵製四

折雜劇如戰荆軻之類杜茶村慧之云舌本生硬江郎才盡耶。

袁籜庵作瑞玉傳奇描寫逆璫魏忠賢私人巡撫毛一鷺及織局太監李實構陷周忠介公事甚悉甫脫稿卽授優伶唱演是日諸公畢集而袁尙未至優人請曰李實登場尙少一引子于是諸公各擬一調俄而袁至告以優人所請袁笑曰幾忘之卽素筆書卜算子云局勢趨東廠人面翻新樣織造頻添一段忙待織造迷天網語不多而句句雙關巧妙諸公歎服遂各毀其所作一鷺聞之持厚幣情人求袁改易袁易一鷺曰春鋤。

曹銀臺子清撰表忠記載明季忠烈及卑汙諸臣極詳備填詞五十餘韵游戲皆示勸懲以邊長白大綏爲終始開場卽演掘鬪賊祖墳掘墳事人皆知長白所爲不知寶賈煥成之也當鬪賊猖獗其兄李自祥改姓張仍爲米脂縣役時長白爲令一日方視事有一人赴訴賣蒜爲兵所搶當堂窮究其人匍匐膝前陽作哀訴陰以手按令足令解其意呼至後堂賣蒜者請屏左右乃脫帽裂縫出封函曰吾實內監此密旨也令拜讀乃命掘鬪賊祖墳之詔旨隨揮之出升堂僞償其價而遣之然鬪賊祖墳實難尋問又係密旨不敢聲張其時鬪賊逆燄已熾令憂形于色寢食俱廢門子賈煥素所親信乘間請曰竊見日來形色舉止大異往常似有大憂鬱而不能解者曷不見告或可效犬馬乎令察其辭色懇篤且自念舍此無可告遂詳吐前事煥曰事未可驟圖也今在官捕快張自祥者本李姓關賊親兄而縣役

某某等二十人皆歃血結盟共約賊兵一至卽爲內應煥實二十人之一也令欲知彼祖墳須與自祥
結納可徐察之詰旦傳自祥入笑問曰爾本姓李何以易張彼方置辯煥出謂曰吾已細陳底裏不必
遮掩令曳之起曰時事已不可爲天意有在爾輩皆應時豪傑予身家方賴保全何必相隱遂偕煥結
拜入則弟兄出則官役久之乘醉托言素曉堪輿叩其墓所形勢自祥乃以出獵爲名邀之同往盡知
其所越數日聞賊將犯潼關令出七千金付自祥先行投款軍前吾俟入關後卽至復遣其黨十餘人
衛其輜重自祥去偕煥並家人潛往伐墓墓上有大樹一株紫藤垂滿掘至棺藤根包裹千而以巨斧
斫斷其藤棺開有小白蛇一頭角已成龍形止一眼其身尙未變遍屍皆生黃毛二三寸不等枯骨血
潤如生隨并蛇斫碎焚之揚灰訖考剖棺之日適聞賊兵敗河南一目爲流矢所中掘畢煥曰此地不
可久居乘今聞賊新敗縱有報聞亦不暇及今已爲朝廷立此大功何不挂印歸山遂棄官煥亦他適
越數年長白閒居京邸絨線術術一老僧叩門求見長白出僧卽跪哭長白訝其爲誰僧曰公忘賈煥
耶乃相持而泣固留之不可與之金亦不受爲製衣裝一痛而別不知所終出在園雜誌言親得之長
白姪桂岩別駕聲威者較長白自記虎口餘生更爲詳備吾郡郭子宮觀演表忠記詩云碧血餘威照
管弦忠臣劇賊兩流傳笑他江左夷吾輩一卷陰符燕子箋

相傳阮圓海作燕子箋是刺倪鴻寶

越巢小識云棟翁七子緣傳奇亦名詩緣記關白甚整通部不用且色自是高手七子謂弘治時北地李
夢陽信陽何景明武功康海鄆杜王九思吳郡徐徵卿儀封王廷相濟南邊貢其間串合以對山救空

同爲主而楊文襄與張永謀誅劉瑾亦與其中。

茶餘客話云東林點將錄乃吏部尙書陝人王紹徽所輯魏忠賢乾兒也當時稱爲王媳婦都人撰百子圖傳奇刺之。

彙苑詳注云劉瑾以擴清政務名諸翰林悉出補部屬鄂杜王敬夫其鄉人也獨爲吏部郎不數月掌文選會瑾敗謫同知壽州敬夫有雋才尤長于詞曲而傲睨多疎脫人或讒李文正謂敬夫嘗譏其詩御史追論敬夫褫其官敬夫編杜少陵遊春傳奇以譏文正李聞之益大恚雖館閣諸公亦謂敬夫輕薄遂不復用蝸亭雜訂云長沙當國時王九思以少年屏斥永錮不用無所發怒作杜甫遊春雜劇力詆西涯流傳關隴羣相和附嘉靖初纂修實錄議起用九思有言于朝曰遊春記李林甫固指西涯楊國忠得非石齋賈婆婆得非南塢耶吏部聞之縮舌而止或謂馮汝行梁狀元不服老雜劇當在王渼陂杜甫遊春之上四友齋叢說云渼陂杜甫遊春雜劇雖金元人猶當北面何況近代按文人之意往往托之填詞王九思杜甫遊春指李西涯楊石齋賈南塢三相康對山之中山狼則指李空同李中麓之寶劍記則指分宜父子王辰玉之哭倒長安街則指建言諸公相傳湯若士之紫簫亦指當時秉國首揆纔成其半卽爲人所議因改爲紫簫。

康山在吾郡城內相傳對山遊揚州時于此地彈琵琶數曲後人因壘土成山種黃楊三五株今尙存董元宰書康山草堂扁對山性孝友親族待而舉火者不可勝數因救李空同與劉瑾酬酢遂擢清議被放後肆意詞曲有沈醉東風曰裝幾車兒羊毛筆管載幾車兒各樣花牋鳳陽墨三兩房天來大三台

硯。請孔門弟子三千一夜離情寫半年。添硯水盡都是離情淚點。讀之可傷。呂柟作對山墓表。張治道作對山行狀。俱載對山救空同事。薛應旂憲章錄。黃佐作董大埋傳亦載之。而說多異同。何元朗云。李空同爲韓道貫草疏。極爲切直。劉瑾切齒。必欲置之于死。賴康滸西營救而脫。後滸西得罪。空同議論嚴刻。馬中錫作中山狼以詆之。戒庵云。中山狼傳馬左都中錫撰。刺李空同悖德。康對山脫劉瑾之害耳。刻者雜之唐宋稗官諸傳之列。讀者豈了其意之所屬哉。朱竹垞云。中山狼乃東田馬中錫作。今載其集中。世傳訾獻吉者數其負德涵也。考之康李未嘗隙末。黃才伯有讀林見素救空同奏疏詩云。憐才不是雲莊老。愁殺中山獵。後狼然則當日所訾。乃負見素耳。王阮亭云。中山狼傳見馬中錫東田集。東田河間故城人。正德間空同對山皆其門生也。按對山集有讀中山狼傳詩云。平生愛物未籌量。那記當年救此狼。則此傳爲刺空同無疑。其說之不同如此。大抵對山意氣高邁。救李一事尤爲獨絕。故士君子樂道之。小說載對山奔喪過內邱。盜劫其資。劉瑾聞之。責捕甚急。詭言劫者瑾所寄橐也。有司懼。斂民財償之。此事亦見弇州史料。明史稿載入寧果傳。貧士被盜。有司往往視之漠然。至假權勢以致償。亦可慨矣。弇州謂其累有司。何哉。靜志居詩話云。德涵坐援獻吉。遂挂清議。歸田之後。耽心詞曲。其小令云。真个是不精不細。醜行藏。怪不得沒頭沒腦受災殃。從今後花底朝朝醉。人間事事忘。剛方。篤落了膺和滂。荒唐周旋了籍與康。論者原其心而悲之。歿時家無長物。腰鼓多至三百副。藝苑卮言云。王敬夫將填詞以厚貲。慕國工杜門學。按琵琶三弦。習諸伎藝。而後出之。康德涵于歌彈尤妙。每敬失曲成。德涵爲奏之。卽老樂師無不擊節歎賞。又康德涵旣罷官居鄂杜。葛巾野服。自隱聲酒。時有楊

侍郎廷儀者少師之弟以使事過康康故契分不薄大喜置酒至醉自彈琵琶唱新詞爲壽楊徐謂家兄居恆相念君但得一書吾爲道地史局語未畢康大怒罵若伶人我耶手琵琶擊之胡牀迸碎楊踰蹠走免康遂入口咄咄更不相見蝸亭雜記云康德涵旣罷免以山水聲伎自娛間作樂府小令使二青衣歌以侑觴遊于四方停駕命酒自歌其曲嘗生日邀名伎百人爲百年會酒闌各書小令一闋命送諸王邸曰此差勝錦纏頭也四友齋叢說云對山嘗與伎女同跨一蹇驢令從人賣琵琶自隨遊行道中傲然不屑敬夫德涵同里同官以瑾黨放逐汎東鄂杜之間相與過從談讌徵歌度曲以相娛樂萬曆中廣陵顧小侯所建遊長安訪求曲中七十老妓令歌康王樂府其流風遺韻關西人猶能道之弇州史料中楊忠愍公傳略與傳奇不合相傳鳴鳳傳奇弇州門人作惟法場一折是弇州自填詞初成時命優人演之邀縣令同觀令變色起謝欲亟去弇州徐出邸抄示之曰嵩父子已敗矣乃終宴分宜在相位江右士大夫往往號之爲父外省亦稍有效之者趙文華其最也文華旣以父分宜位至尙書得上寵眷乃稍欲結知人主不稟其命一日密進藥酒方言授之仙飲可不死獨臣與嵩知之上曰嵩有此方不奏文華奏我分宜聞之大懼且恨立召文華問之曰若何所獻對曰無有分宜取進酒疏示之文華長跽頓首分宜怒叱之不起呼左右拽出命門者無敢爲文華通當時分宜一睡毗者立族矣文華日夜憂懼不知所出從世蕃乞哀世蕃憐之爲白夫人夫人以其兒也殊不忍其觳觫一日相君洗浴諸義子皆來起居置酒堂上相君夫人上座義子及世蕃列侍惟文華不得入乃曲賂左右伏于軒櫺之間酒中夫人曰今日一家皆在目中何少文華相君曰嘻阿奴負人那得在此夫人因宛轉

白相君色微和文華遲走入伏席前涕泣相君不得已遂留侍飲盡歡而出見于文定公筆塵鳴鳳記上壽一折本此

秦檜擅權久大誅殺以脅善類末年因趙忠簡之子汾以起獄謀盡覆張忠獻胡文定諸族棘寺奏牘上矣檜時已病坐格天閣下吏以牘進欲落筆手顫而汗亟命易之至再竟不能字其妻在屏後搖手曰勿勞太師見岳珂程史今傳奇精忠記有奏本一折本此

傳奇中有雙忠廟係男生乳女生鬚事爲保孤佳話雲間周冰持稧廉作其男扮女女扮男大略與贈書記相似

甬上詩傳云周朝俊字夷玉工填詞所撰有詞曲十餘種惟紅梅花最傳

毛西河先生傳云崇禎末士林好爲社每社必集數百人考鍾伐鼓入社者爲名士出則否先生品目過嚴峻人忌之至是編輯郡人詩作越郡詩選會稽王庶常自超從賊中歸投以詩先生選其四中有鄆城夜走及哭周介生赴西市題因以右丞司戶評其篇實惜之庶常父大恚聚諸出社者歃血首先生抗命今又抗試且以頭陀居士林骯壞名教罪當死讞者察其妄不坐順治八年浙三舉鄉試同社章貞登賢書偕同籍舉人昌言毛生在江東抗命時義不受職故當時奪其籍今是非已白便當還其舊籍以旌之使仍爲諸生辯頂候試提學翟君是其言而怨家洶洶會布政司使張君以從賊歸命爲今官構者謂先生評文時曾及其六等定罪狀授僞朝典例君大恨提學張君阿伺君意旨仍奪其籍先生工爲詞取元人無名氏所傳賣嫁放偷二劇而反之曰不賣嫁不放偷作連廂詞改其事謂庶幾可

正風俗有裨于名教提學購得之誣謂放偷縱從賊賣嫁者歸命本朝不待聘而自呈其身也反之者我不然也狂生失志訃上官不敬上之制府下寧紹分巡王君籍捕之制府以爲冤釋置不理

隻塵談云芙蓉劍傳奇汪子雲樵作也汪名禮江寧人精研聲律之學

隻塵談又云徽歙間某年月嫁娶日適兩新婦輿同憇周道一極貧女一極富女始而皆哭久而貧女哭獨哀富女曰遠父母哭固當若是其哀歟命伴嫗輿側叩之貧女曰聞良人饑餓莫保今將同併命耳奚而不哀富女心惻解荷包贈之蓋上輿時祖母遺嫁物也貧女止哭未及道姓氏各散以去抵門景況蕭索新郎掩歎迎婦人忍淚告曰吾家固貧填溝壑分也今以累君奈何婦以荷包付之開視則黃金二錠重四兩許易銀三十餘兩以其零市錢米酒饌行合巹禮問金之所來婦語以故乃合夥經商一歲中獲利數倍凡貿遷無不如志不十年成巨富苦不知贈金者何人心懷歎恨于宅後起樓供荷包祀之以誌不忘顧富家女子歸後夫家父家連被回祿繼以疾疫屢遭破敗十年以內如水刷沙費財立盡貧女財既豐又得男謀所以乳之者徧覓無當意者媒嫗以富家女薦之甚合兩婦相見彼此敬愛誼如姊妹都不知途中曩日事越一歲乳娘抱兒往後樓禮拜見荷包視之所繡花物類已針法忽念舊事不覺淚下婢詞之告主婦問哭之故則曰記嫁時途中曾以此物贈貧女不料吾今日之貧感慨今昔故酸心耳主婦語其夫明日請族長四鄰及乳嫗之翁奉酒安位肅若上賓夫婦再拜曰愚夫婦以待填溝壑之身藉此享有今日日思報德靡道之從今天誘其衷幸賜識認賞財若干物皆荷包中物也物歸原主宜也乳嫗曰是何言歟發富是君家大福分我何與焉荷包倘在我家亦同盡耳

必欲成君高誼還荷包原贈物倍之足矣衆賓曰前茲道旁之贈仁也今茲傾家之還義也仁至義盡
加以辭讓德之美也衆賓與有光寵焉願居間剖分之俾仁義各不相傷可乎乃依衆賓剖分之而世
爲婚姻以仁義世其家朱青川云此事若付洪昉思孔云亭諸君佐以曲子賓白竟是一本絕好傳奇
矣余嘗閱程史中望江二翁事及輟耕錄所載釋怨結婚事及此思爲三院本付之伶人以竈鄙而敦
薄錄二事于左以待暇時獲此願也望江二翁事云舒之望江有富翁曰陳國瑞以鐵冶却家資爲其
母卜地青烏之徒輻集莫適其意有建寧王生也以術聞延之踰年始得吉于近村爲張翁者之業國
瑞治家未嘗問有無一以諉其子王生乃與其子計所以得地且曰陳氏卜葬環數百里莫不聞若以
實言則壘斷取資未易厭也于是僞使其治之隸如張翁家議圈冢若以禱者因眺其山木之美而譽
之曰吾治方乏炭此可鑿以得賞翁許之乎張翁固弗疑也曰諾居數日復來遂以三萬錢成約國瑞
始來相其山大喜築垣繕廬三閱月而大備遂葬之明年清明拜墓上王與子偕忽顧其子曰此山得
之何人厥直凡幾予以實告又顧王曰使不以計勝則爲直當幾何曰以時價商之雖廉猶三十萬也
國瑞亟歸命治具鞍馬謁張翁而邀之至則館焉盛殽醴相與款洽者幾月語不及他翁旣久留將告
歸復張正堂而讌之酒五行董錢緡三百置之阼實縑于篚酌酒于斝而告之曰余葬余母人謂其直
之腹請以此爲翁壽翁錯愕曰吾他日伐山而薪不盈千焉三萬過矣此惡敢當國瑞曰不然葬而買
地宜也詭以爲治則非也余子利一時之微以是給翁人皆曰直實至是用敢以爲請凡余之爲將以
愧吾子之見利忘義者翁卒辭曰當時固已許之實又過值子欲爲君子老夫雖賤可強以非義之財

耶。固授之。往反擰拒。詰旦拂衣去。國瑞乃怒其子曰。汝實爲是。必爲我致之。不得已。密召其子畀焉。曰。是猶翁也。翁竟不知。釋怨結姻事云。揚州泰興縣馬駝沙農夫司大者。其里中富人陳氏之佃家也。家貧。不能出租以輸主。乃將以所佃田轉質于他姓。陳氏田傍有李慶四者。亦業佃種。潛賂主家兒。約能奪田與我。而不以與司氏者。以所酬錢十倍之一分之家兒素用事。因以利昭其主。主聽奪田歸李氏。司固無可奈何。旣以穀田不相侔。輕其直十之一。司愈不平。會歸而李與嘗所用力及爲券者。殺雞飲酒。因隨所之。李欲卻司。輒先將一卮酒飲之。司忿恨去。對妻語。所以與李怨仇之故。妻苦口諫曰。吾之窮命也。奈何仇人哉。不聽。夜持炬火。往燒其家。忽聞得內有人婉。司竊念吾所讎者。其家公也。何故殺其母子。遂棄火溝中而歸。司無以爲養生計。卽所償錢爲豆乳。釀酒貨賣以給食。久之不復乏絕。更自有餘。而李日益貧。更十年。李復出所佃田質陳氏。司還用李計。復其田過種之錢。比前又損其一爲券。悉值前人。相視驚歎。司計爲李所辱時。今幸可一報復。遂具雞酒。亦如之。李忘前過。不自責。反怨薄己。怒甚。歸積膏火破壺中。夜抵司家。司妻方就蓐。李猶豫間。聞人啓戶。懼事覺。遺火亟走。而司家實不有人。且得火器場中。驗器底有李字。因悟昔我焚彼家。以其家人產子。不欲焚。今彼焚我家。而我之妻亦產子。而不被焚。此天也。非人也。持錢五千往李。曰。昨日小人無狀。失禮。義不得共飲。茲願少伸謝意。幸毋督過。李疑。給以疾臥不起。強請不已。遂同之酒家。邀酣兒與飲酒半。自起酌酒。勸李。曰。子之孫某年月日。夜子時生。而吾子亦夜者。子時生。怨仇之事。慎勿復爲。具白前所仇事。瀝酒爲誓。語酣兒曰。子識之。試用此警世間人。不善慎勿爲也。劇飲盡歡。乃更約爲婚姻。自是李亦不貧。兩家至今豐給。

自有西廂續者不一而足矣然關漢卿之續乃補其未完之書如琵琶拜月續者皆然若尋親記又有續尋親記必言張員外之發配亦到金山而爲其子誤殺一捧雪又有後一捧雪必言莫成、雪艷之登仙莫昊之婚于戚少保牡丹亭又有後牡丹亭必說癩頭龜之爲官清正柳夢梅以理學與考亭同貶凡此者果不可以已乎乃余則欲爲續邯鄲夢以寫宋天保事相傳宋天保者紹興人罷官過邯鄲謁盧生廟以詩題壁有要與先生借枕頭之句時年羹堯征青海出都亦過此見詩曰吾當借以枕頭卽檄浙撫徵宋至軍前閉局一寺中一軍將伴之時其飲食不容出闈如是數年憂疑已甚問軍將則不答一日忽啓門言已得知府卽委署令走馬卽之任至任所則妻女奴婢先在詭甚問之曰自君出門後不時有家信寄銀歸頗賴以溫飽今又得君書言接來此上任宋益詫異姑理知府事署事數月又置他所凡三任公廉辦事甚得民譽忽有摘印者至鎖拿不容與妻子別執至軍前有訊之者責以誤軍事當斬宋茫然不知所措亦不容辨囚諸獄凡數月向者相伴之軍將來放之使歸有一字札封錮屬其至家開視先開視恐得禍宋乃歸紹興則妻子奴婢已在家問之對曰自君被執去一家倉皇無措有持君書言事已白但罷官令我等先歸也宋開札視之則向年邯鄲題壁之詩耳方恍然十餘年真不啻身在夢中

余嘗憾元人曲不及東方曼倩事或有之而不傳也明楊升庵有割肉遺細君一折又茅孝若撰辟戟諫董偃事皆本正史演之唯笨庵孫原文餓方朔四齣以西王母爲主宰以司馬遷卜式李陵終軍李夫人等串入悲歌慷慨之氣寓于俳諧戲幻之中最爲本色

明張佳允令滑有巨盜任敬、高章僞稱錦衣使來謁。延入後堂。敬拉公左手。章擁背。同入室坐炕上。敬掀鬚笑曰：「我灞上來聞公帑有萬金。願以相借。」遂出匕首。置公頸。不爲動。從容語曰：「卽不匕首。吾書生能奈爾何？」且旣稱朝使。奈何自露本相？賊以爲然。遂袖匕首。公曰：「爾兩人橐金何策出此？」舍賊曰：「械公如逮。故事俟吾躍馬去乃釋公。」公曰：「逮我晝行人必困爾。不若夜行使。」又曰：「帑金易辨識。非爾利。願貸之富民。旣不累吾官爾亦安枕。」二賊益善。公計公屬章傳語。召吏劉相來。相者心計人也。相至。公謬語曰：「吾不幸遭意外事。若逮去死無日矣。今錦衣公有大氣力。能免我。吾欲以五千金爲壽。吾令汝爲貸。」遂取紙筆書某上戶若干。某中戶若干。共九人。九人素善捕盜者也。又語相曰：「天使在此。宜使盛服謁見。」相會意去。公以酒食酬酢。先自飲啖。以示不疑。酒半。九人各鮮衣爲富客。以紙裹鐵器。手捧之。陸續門外公呼天平來。又嫌凡小。索庫中長兒。橫之後堂。二僚亦至。公與敬隔兒爲賓主。而章不離公左右。公乃持法馬語章曰：「汝不當代較。視輕重耶？」章稍稍就兒。而九人者競前。公乘間脫走。大呼擒賊。敬起撲公不及。自到樹下。生縛章。又得王保等三賊主名。爲上狀。緹帥陸炳盡捕誅之事。詳見智囊。永園圓劇中設謀擒賊一齣。全本此。而以蔡文英當張佳允。以張千當劉相。以任金剛當任敬。

香祖筆記云：順治初。京師有賣水人趙遜者。未有室。同輩醵金謀爲娶婦。一日于市中買一婦人歸去。其帕則髮藐藐白。居然嫗也。遜曰：「嫗長我且倍。何敢犯非禮。請母事之。居數日。嫗感其忠厚。曰：『醵錢本欲得婦耳。今若此。反爲君累。且奈何。』吾幸有藏珠一囊。紉衣中。當易金爲君娶婦。以報德。越數日。于市中買一少女子。入門見嫗。相抱痛哭。則嫗之女也。蓋母子俱爲旗丁所掠而相失者。至是皆歸遜所。嫗卽

爲之合巹成禮。姻又自言洪洞人家有二子。令尙存珠數顆。可鬻之爲歸計。乃攜帶及女俱歸。二子者固無恙。一家大喜過望。嫗乃三分其產。同居終其身。李笠翁演此事爲奇團圓。

寄園寄所寄載耳。談云。王生世名武義人。父良爲其族俊歿死。已成訟。而傷暴殘父屍。從族尊者之議。割畝以謝。則受之。而歲必封識其畝。值藏之人不知也。仇以好來。亦好接之。不廢禮也。而已陰鑄劍鏤曰報仇。自佩矣。其繪父像亦繪持劍者在側。則己也。人問之。曰。古人出必佩也。凡四五載。得遊泮而兼抱子矣。始謂婦曰。有此呱呱。王氏之先不餒。所以隱忍至此者。正有需也。今固死日。上有太夫人。下有嬰兒。責在汝。遂仗劍出。斬仇頭于蝴蝶山下。歸拜母曰。兒死父不得侍母膝下矣。盡出其所封識之值及劍。自造縣請罪。是日邑中無不人人髮竖者。尹陳君傷之。令且就閑室。以聞于諸大吏。諸大吏以屬金華尹。汪君大受決之。汪君廉得其狀。益用惋悼。曰。法必觀其父屍。父傷重則子罪緩。蓋欲生之也。生曰。始惟不忍殘暴父屍。故自死。不然仇死耳。豈有造罪彌天。而復失初志者。何愚也。今日宜自殺。造邑庭來受法耳。但母恩未斷。斬歸別母。汪君縱之歸。而身隨之。猶欲伸法如前議。生友兩邑諸生數百人。皆憲憲之曰。必如議。乃生已不食觸階死矣。兩尹皆爲下泣。諸生哭聲震天。當生之飲恨于嘻笑而誓必報也。他人不知。婦愈氏獨知之。曰。君能爲孝子。妾能爲節婦。生曰。汝何易其言耶。婦曰。安見女子而非男子者。及生且死。已欲從地下生曰。已屬汝堂上裹中矣。何死爲。婦曰。爲君忍三歲。逾三年。非君所能禁也。逾三歲。婦果絕食死。直指馬君。以其事聞于朝。至下旌門之詔曰。孝烈夏惺齋。本此爲杏花村傳奇。而以汪大受出生之罪爲收場。亦傳奇家之恆事也。乃於婦之節轉未克彰。予欲依此本事寫之。而

以其子作團圓收場。當更生雄快耳。

毛西河作擬元兩劇序云。蕭山王叔盧會譜唐人事。擬元詞兩劇。一傷蓮勺棄故劍。一慨武成主者並不識司空。世族皆有爲。而發原非汎汎。西河又有何孝子傳奇引言謝氏所作。馬玉起云。舊有傳奇名湘湖記者。卽此也。西河作何孝子傳云。孝子名競。蕭山人。父舜賓。成化己丑進士。擢南京湖廣道監察御史。嘗理幾甸渠道。與權有力忤。謫戍廣西慶遠衛。遼赦還里。邑有湘湖。宋縣令楊時爲溉田作也。歲久浸湮。前此魏文靖驥已經擴復。而豪家不法。仍肆牟食。舜賓故文靖門下士也。至是慨然曰。吾不能治渠。吾當治湖。遂發湖民私占者。揭縣具奏。當塗鄒魯以御史謫宰蕭山。湖民憾者。爭賂魯謀變其事。舜賓語侵魯。魯恨誣以盜署事官印。妄奏不經。由署事宜。且身結成逃。無遇赦牒。冒濫冠帶。應抑解原衛廉理。揭下所司治。所司不可。魯念舜賓終害已。且宿驕悍。惡舜賓敢枝柱。又調舜賓陰具實封。將入奏。會舜賓門下士憂居訓導童君顯章知魯陰事。魯陷以他罪論絞獄上。憲司疑之。更下府覆驗。道舜賓家。魯嗾解人押顯章過舜賓。隨遣里老阜隸蒯捕等五百餘人尾而逮。執器圍其家。曰。舜賓篡取重囚。毀門而入。剽所其實封。并成化二十三年原給赦牒。及緣例冠帶憑照。縛舜賓、顯章去各篋四十下。顯章獄立爲文解舜賓原衛廉理。不俟詳核。摹械舜賓狼狽。督蒯捕任觀等十一人執器押就道。魯必欲置之死。續遣田敏胡紀等十三人。諭意追之三衢。屏去服食驅侵之。過玉山。屏舟押之步至餘干。宿昌國寺。反禿袖蒙面氣絕。乃故爲白官相視。揭置而歸。此弘治十一年戊午七月日也。先是舜賓就道時。魯捕其家人者四出。孝子方患癰。力疾負母。朱提其妻。虞入夜伏莽中。凡三夜。達其女兒夫福建僉事。

縣長山當弦家，既而捕者危及之。孝子仰天者再，念其父爲御史時，有同年友常熟王鼎爲南京刑曹相親重，嘗于廣坐中指語人曰：「吾生平交滿天下，所可托妻孥寄死生者，吾元勳一人而已。」元勳，鼎字也。至是已爲廣東布政司參政歸里。孝子由龕山渡江，凡五日達王鼎家。方是時，孝子思安置母妻，跳身扞父，及餘干問至。孝子乃擗踊頓絕。鼎號泣而讓之曰：「競爾既死，如狗豕耳，誰爲汝復讎者耶？」孝子甦，旣而孝子跪辭曰：「請歸復讎。」鼎曰：「孺子何言之易也。方翼虎而思批其爪，大難且爾。須其人也，居久之。察孝子鷙可用。」孝子晝侍母坦坦，夜閉一室，繞牀周遭，行床匏冕蘆，雖就寢未嘗寐。第寐從外呼之，未嘗不應。如是者數月。一日，孝子曰：「如競者，斯可以報仇矣乎？」鼎曰：「殆可也。願有母在，爾兄懦，存亡未可知。壁中婦雖有娠，尙未分也。念誰爲何氏後者，且聖天子方在上，詎無國法乎？待之旣而魯選山西按察司僉事，鼎乃曰：「可矣。」顧孝子曰：「交友之讎，視從父昆弟，吾當執兵以從爾。」顧爾能不煩吾行也。餞于庭，豫爲圓紺散投之，得六紺，遂行。弘治十二年四月二日，魯旣已禪印，詣省取憑，藩輿而西。孝子先一日歸，匿族父何寧家，假族父命召故人，親晤飲之酒。酒行，謂曰：「魯酒將行，而御史獨飲恨未泄。」邦植流落報無所奈何，皆曰：「豈無共酬之者乎？」因相顧泣，再行。又曰：「酒至，則令行。」脫邦植在必欲甘心此魯酒，將誰應之？皆曰：「有令而爲之應。」誰辭三行，主者出席跪，衆皆跪，遍酌以觴。旣坐，又曰：「事急矣！」吾與諸公決。脫邦植果在云中，曰：「在卽從之。」孝子躍出叩頭曰：「競在也。」于是除二室，請曰：「願從者左，否者右。」幸勿歸，皆左。至是魯出伏道傍園導盡，將過輿。孝子手鐵尺直前，衆二十人白衣手杖皆前，驕從分散，馳掀魯仆輿，保之杖一齊下，呼號震天地，矚其目，剔其鬚髮，相更濶之。取食櫻盛溲灌中，偃箋登舟。孝子

拔佩刀呼曰殺吾父者賊耶斫其左股衆止之抵渡用鹹水灌其血孝子與魯並項鎧預令族父何澤二負黃袱赴闕訟冤度出關鳴鼓控按察司時鎮守司設監中監巡按御史及布政分守諸司咸聞變昭愕不知所爲而按察司判狀發分巡僉事蕭翀簡閱翀故黨魯至是乃刑孝子令其誣服孝子不堪蹶起大言曰必欲殺競競固非畏死者也顧人孰無父母耶且競旣已訟于朝恐非爾所得擅殺者噬臂肉擲案上魯引手摩案若將厭肉孝子乃大呼含血噀翀面一堂皆驚翀亦拂拭動容顧念魯已盲廢絕助者望而孝子氣直不可詘乃視魯曰是肉非爾所能食矣遽起于是鎮監御史各委司道等會質孝子與魯各執詞不相下審者不得決獨布政司楊峻慨然具由略曰伏讀律例部民毆本屬長官杖且徒傷而後流折傷而後絞若毆非本管則三品以上傷者徒折傷而後絞其五品以上減二等矣今鄒魯久禪印何競之毆乃遲之給憑之際非本管也且魯聞遷後競母及競各出籲詞籲守巡所特未理耳則兩造而已此非平人毆五品官也所爭者施讎之由耳時鎮巡以下聞者憮動然終忌之日參論斷斷不已而何澤二訟闕下者遣郎中李時給事中李舉會巡按治之審者旣各持兩端而胡等亦私念罪重隱其實乃擬魯故屏人服食至死競部民毆本屬長官篤疾俱絞孝子不伏其母朱赴鼓院搗鼓復命大理寺寺正曹廉會巡按覆治廉曰爾奈何毆縣官孝子曰競知父讎不知縣官况去任者也但恨毆之勿殺之耳言畢涕淚俱下廉爲之惻然乃曰獨念致死無所蹤如何遣州前衛指揮僉事同本縣知縣就揭牘驗孝子故疑牘有詐將易棺已具斂具至是啓牘孝子號呼嚙指血瀝骨驗其真觀者皆哭然後藉仵易衣斂報傷而解人任觀慷慨檢實具言其狀且出舜賓臨命所付血書若

于字于事衆皆伏。左驗無異，乃改擬魯造意謀殺人斬競毆傷五品以上官加凡人二等徒三年。田敏胡紀絞其助魯爲惡及競親黨當充軍者十人擺站六人贖徒杖及枷號五十人餘所逮二百餘人准徒贖杖有差。獄上上令法司議刑部尙書閔珪等議魯罪當獨競宜仿唐孝子梁悅例充軍。其前審官舉時等審勘不詳各罰俸准擬于是辟魯戍孝子福建福建衛或曰凡孝子所爲一稟王鼎如素定者正德改元赦歸又九年甲戌卒孝子自復讎至是凡十六年服喪終其身。

明末嵩明州牧錢房仲卒于滇。叔子美恭奉母居鄞。日夜號咷告母欲求其父而家無一錢。奮是出門適有伶人演院本所云尋親記者。孝子曰：「是我也。」乃習之業成。買鼓板一副。每逢市鎮輒唱之。宛轉哀動。行路稍稍得錢。則又前行錢罄復住。望門唱記數日。則又得錢。聽者訝其度曲之神。不知其爲寫心也。遂展轉依人。得入粵中。而一病于廣東。再病于廣南。瀕于死者數矣。及至滇。蹤跡茫然。遇土人之知者。始得使君死問。及其葬地。而眷屬不知流落何所。哀哭無措。又遇土人之知者。得導至其舊僕所居。得展使君墓下。并求庶母仲弟而見之。展轉乞哀告貸。又求爲人記室。以得傭值。凡閱七年。始得歸骨嗣。是以後寧人演院本者。不忍復奏尋親之曲。比之王裒門下之廢蓼莪。事見全榭山鮚埼亭續集。

勸說卷四

近伶人所演陳仲子一折向疑出東郭記乃檢之實無是也今得楊升菴所撰太和記是折乃出其中甚矣博物之難也

輟耕錄云千夫長李某戍天台縣日一部卒妻郭氏有令姿見之者無不啧啧稱賞李心慕焉去縣七八十里有私盜出沒處李分兵往成卒遂在行既而日至卒家百計調之郭氏毅然莫犯經半載夫歸具以白爲屬所轄罔敢誰何一日李過卒門卒邀入治茶忽憶得前事怒形于色亟轉身持刀出而李幸脫走訴于縣縣捕繫窮竟案議持刀殺本部官罪死桎梏囹圄中從而邑之惡少年與官之吏胥皂隸輩無不起覬覦之心者郭氏躬餽食于卒外閉戶業紡績以資衣食人不敢一至其家久之府檄調黃巖州一獄卒葉其姓者至尤有意于郭氏乃顧視其卒日飲食之情若手足卒感激入骨髓忽傳有五府官出五府之官所以斬決罪囚者葉報卒知且謂曰汝或可活我與爲義兄弟萬一不保汝之妻尙少汝之子若女纔八九歲耳奚以依顧我尙未娶寧肯俾爲我室乎若然我之視汝子女猶我子女也卒喜諾葉遂令郭氏私見卒卒謂曰我死有日此葉抑獄性柔善未有妻汝可嫁郭氏曰汝之死以我之色我又能貳道以求生乎旣歸持二幼痛泣而言曰汝爹行且死娘死亦在旦夕我兒無所怙恃終必死于飢寒我今賣汝與人娘豈忍哉蓋勢不容已將復奈何汝在他人家非若父母膝下比母仍如是嬌癡爲也天苟有知使汝成立歲時能以卮酒奠父母則是我有後矣其子女頗聰慧解母語意抱

母而號引裾不肯釋手遂攜二兒出市召人與之行路亦爲之墮淚邑人有憐之者納其子女贈錢三十緡郭氏以三之一具酒饌攜至獄門謂葉曰願與夫一再見葉聽入哽咽不能語既而曰君擾抑獄多矣可用此少禮答之又有錢若干可收取自給我去一富家執作爲口食計恐旬日不及看君故也相別垂泣而出走至仙人渡溪水中危坐而死此處水極險惡竟不爲衝激倒仆人有見者報之縣縣官往驗視得實皆驚異失色爲具棺斂葬于死所之側山下又爲申達上司仍表其墓曰貞烈郭氏之墓大書刻石墓上至正丙戌朝廷遣奉使宣撫循行列郡廉得其事原卒之情釋之人遂付還子女終身誓不再娶此事描摹令人欲泣雙珠記本此

村中演劇每演包待制勘雙釘事一名釣金龜此事亦見輟耕錄姚忠肅爲遼東按察使武平縣民劉義訟其嫂與其所私同殺其兄成縣尹丁欽以成屍無傷憂憊不食妻韓問之欽語其故韓曰恐頂頸有釘塗其迹耳驗之果然獄定上讞公召欽諦詢之欽因矜其妻之能公曰若妻處子耶曰再醮令有司開其夫棺毒與成類並正其辜欽憐卒時比公爲宋包孝肅公拯云

萊州閻瀾與柳某善有腹昏之約及誕閻得男曰自珍柳得女曰鸞英遂結夙契柳登進士仕至布政而瀾止歲貢得教職以死家貧不能娶柳欲背盟鸞英泣告其母曰身雖未往心已相諾他適之事有死而已鸞英度父終渝此盟乃密懇鄰嫗往告自珍妻有私蓄請以某日至後圃持歸姻事可成遲則爲他人先矣自珍與其師之子劉江劉海言之江海設酒賀自珍醉于學舍如期詣柳氏鸞英倚圃以望以物付之而小婢識非自珍曰此劉氏子也鸞英詈曰狗奴何以詐吾財速還則已否則告官江海恐

事洩，遂殺鸞英及婢而去。自珍夜半醉醒，悔失約，黑夜直入圃中，踐血屍而蹠，嗅之腥氣，懼而歸。衣履沾血，達曙。柳氏覺女被殺，而不知主名。官爲遍詢，鄰媼遂首女約。自珍至，血衣尚在，不容置辯，論死。會御史許公出巡，至郡，夢一無首女子泣曰：「妾鸞英，身爲賊劉江、劉海所殺，反坐吾夫。幸公哀憐，此獄死且不朽。」明日召問，自珍具述江、海留飲事，許捕二兇訊之，具服。誅于市，而釋自珍，爲女建坊以表之。敘鉗傳奇所由作也。此見渤海搜奇，乃敘鉗記以閣爲皇甫，以劉爲韓，以許御史爲李若水，轉令本事姓氏不彰，每爲之憾。

閩中洛陽橋圮，發石有刻文云：「石頭若開，蔡公再來。」鄞人蔡錫者，永樂癸丑鄉試中式，仁廟時以學行授兵科給事中，陞泉州知府。錫至，欲修橋，橋跨海，工難施。錫無可爲計，欲以文檄海神，一醉卒趨而前曰：「我能齎檄往，復乞酒飲大醉，自投于海。若有神擎捧之者，俄而以醋字出，錫意必八月二十一日酉時也。」遂于是在日舉工，潮旬餘不至，工遂成。載錫本傳，此實事也。人不知而以事附蔡端明，且以爲傳奇中戲妄之語，非也。

冬夜牋記云：王曾少孤，鞠于叔氏，無子。以弟之子澤爲後，而百順記傳奇則載其具慶生子事。

王阮亭奉命祭江瀆，方伯熊公設宴餞之。弋陽腔演擢花張四姐問所本，阮亭默然。公語人曰：「誰謂王阮亭博雅？」今日爲我難倒。

稗畦居士洪昉思昇仁和人，工詞曲，撰長生殿雜劇，薈萃唐人諸說，部中事及李杜元白溫李數家詩句，又刺取古今劇部中繁麗色段以潤色之，遂爲近代曲家第一。在京師填詞初畢，選名優譜之，大集賓

客是日國忌爲臺垣所論與會凡數人皆落職趙秋谷時官贊善亦罷去秋谷年二十三典試山西回時驛車中惟攜元人百種曲一部日夜吟諷至都門值長生殿初成因爲點定數折防思跌宕孤逸無俗情年五十餘墮水死毛西河長生殿院本序云洪君昉思好爲詞以四門弟子遨遊京師初爲西蜀吟旣而爲大晟樂府又旣而爲金元間人曲子自散套雅劇以至院本每用作長安往來歌詠酬贈之具嘗以不得事父母作天涯淚劇以寓其思親之旨應莊親王世子之請取唐人長恨歌事作長生殿院本一時句樞多演之越一年有言日下新聞者謂長安邸第每以演長生殿曲爲見者所惡會國恤止樂其在京朝官大紅小紅已浹日而纖練未除言官謂遏密讀曲大不敬賴聖明寬之第褫其四門之員而不予以罪然而京朝諸官則從此有罷去者

通州張孝廉異資擢士康熙初爲崖州知州有感于寇萊公事作崖州路傳奇詞甚奇崛賓白整齊又作麒麟夢鴛鴦榜黃金盆三種

元人吳昌齡西遊詞與俗所傳西遊記小說小異曹棟亭曰吾作曲多效昌齡比于臨川之學董解元也興化李吉四名棟有續鼻祖曲

池北偶談云袁崇冕字西野工金元詞曲所著春遊秋懷諸曲足參康王之座同時有高應玘者能工詞曲其北門鎖鑰雜劇論者以爲詞人之雄又有張國壽者善金元詞曲所著有脫穎茅廬章臺柳韋蘇州申包胥等劇在袁西野李中麓伯仲間皆章邱人又有張自慎者字敬叔商河人著金元樂府三十餘種太原萬伯修曰北曲一派海內索解人眼中不得獨見張就山耳就山自慎別號也

香祖筆記云吾宗鶴尹兄朴工于詞曲作籌邊樓傳奇一褒一貶字挾風霜至于維州一案捕摹情狀可泣鬼神傳奇小技足以正史家論斷之謬誣也鶴尹大父維山先生作鬱輪袍及裴湛和合二曲詞曲家稱爲本色當行

周冰持雲間才士狂誕不羈善填詞時最稱其珊瑚玦開場西江月云秀才之苦苦無加黃蘖黃連之下作者偶然寄託看官切莫疑嗟周郎亦是秀才家肯減了自家聲價茶餘客話云華亭周綸字膺垂才士不偶有子名稚廉字冰持少年以錢塘觀潮賦知名除夕署門云論家世如閣帖官窑可云舊矣問文章似談箋顧綉換得錢無二物皆松江產稚廉好食生蝸牛

曠園雜誌云錢塘沈孚中有宰戌記傳奇直逼元人爲明曲第一陸次雲作沈孚中傳云沈暎字孚中居武陵北墅填詞奪元人席所存者獨息宰河綰春園傳奇尤爲詞場稱翫

柳南隨筆云予所居徐市徐大司空聚族處也前明之季其族有二人並擅高賞一最豪奢一最慳嗇者則爲諸生啓新其族人陽初爲作一文錢傳奇以謂之所謂廬止員外者指啓新也又云徐復祚字陽初大司空栻之孫工詞曲若紅梨投梭祝髮宵光劍一文錢梧桐雨至今流傳于世按祝髮見張伯起陽春六集非陽初作南音三籟云紅梨逸其名

酒邊瓊語云顧大典字道行吳江人著清音閣傳奇四種青衫葛衣義乳風教編而葛衣最傳知新錄云覆水事乃姜太公少婿馬氏已離矣見太公封齊妻拜求合公取覆水云云故戰國策姚賈對秦王曰太公望齊之逐夫今以覆水爲買臣事非也

吾邑鄭超宗鴛鴦棒題詞云。香令先生遺書。以夢花酣、鴛鴦棒、二劇屬予序。一爲至情者。一爲不及情者。嗟乎。人情百端俱假。閨房之愛獨真。至此愛復移。無復有性情者矣。覽薛季衡錢媚珠事。使人恨男子不如婦人。達官不如乞兒。文人不如武弁。其重有感也。夫又夢花酣題詞云。夢花酣與牡丹亭情景略同。而詭異過之。如蕭斗南者。從無名無象中結就幻緣。安如是。危如是。生如是。死如是。受欺受謗如是。能便無端而生者死。死者生。又無端而彼代此死。此代彼生。榆柳一詩千吟百諷。蛋和尚提放傀儡。碧桃花喬作轉輪。所謂思之思之。鬼神通之。未有如斯之如意者也。嗚呼。湯比部之傳牡丹亭。范駕部之傳夢花酣。皆以不合時宜。而所謂寓言十九者。非耶。

滿牀笏。一名十酷記。合肥龔司寇門客作。中入龔節度十折。于本文無關。蓋爲橫波出色煊染也。

明祁參政承燦集元明傳奇八百餘部。益以本朝。則益多矣。其中三家所撰最多。朱良卿三十三本。太極奏。四奇觀。五代榮。雙和合。九蓮燈。蓮花筏。快活三。玉數珠。青風寨。飛龍鳳。虎囊彈。建皇圖。黨人碑。龍燈賺。萬壽冠。照膽鏡。瑞霓羅。元霄鬧。御雪豹。石麟鏡。吉慶圖。漁家樂。乾坤嘯。寶曇月。纓絡會。牡丹圖。奪秋魁。血影石。一捧花。餘四本未詳。李元玉一笠菴二十九本。一捧雪。人獸關。永圓圓。占花魁。五高風。雙龍鳳。昊天塔。兩鬚眉。三生果。牛頭山。武當山。麒麟閣。虎邱山。長生像。千里舟。眉山秀。連城璧。千忠會。掛玉帶。意中緣。鳳雲翹。洛陽橋。太平錢。萬里圓。風雲會。羅天醮。麒麟種。萬民安。禪真會。元玉係申相國家人。爲申公子所抑。不得應科試。因著傳奇。以抒其憤。而一人永占。尤盛傳于時。其一捧雪。極爲奴婢吐氣。而開首即云。裘馬豪華恥爭呼貴家子。意固有在也。沈寧菴屬玉堂二十本。紅渠埋劍。十孝分錢。雙魚。

合衫義俠鴛衾挑符分柑四異鑿井珠串奇節結髮墮釵博笑翠屏山望湖亭著英會寧菴字伯英號詞隱生吳江人

說楷云邵宏治荆溪人作香囊傳奇至落日下平川不能續其弟應聲曰何不云歸人爭渡喧乎時邵方與弟爭田因大喜割畀之今名渡喧田

說楷又云玉簫傳奇有云眼波眉黛不分明今教坊多作眼皮眉黛何元朗嘗正之矣而不知所謂按南宋張泌江城子云浣花溪上見卿卿眼波明眉黛輕始知元人雜劇無一字無來處也

南音三籟云玉環記隔紗牕日高花弄影改元劇喬夢符筆也喬煞尾末句云比及你見我那負心薄倖多管我一靈先到雒陽城此等語不但慘戚抑且以之作收力有萬鈞今以混入貓兒墜中急腔唱過

大減分數矣

浣水續談云今傳奇有三元記載馮當世父商還妾歸生當世將誕閭里皆夢鼓吹迎狀元然考之方輿勝覽馬涓南部人父從政歸妾感上帝得子而當世父名式爲左侍禁以終非商也然則因馬氏事而誤以爲馮也事載鶴林玉露似爲失實按鶴林玉露云馮京字當世鄂州咸寧人其父商也壯年無子將如京師其妻授以白金京師買一妾立券償錢矣問妾所自來泣涕言父有官因綱欠折鬻以爲賠償之計遂不忍犯遺還其父不索其錢及歸妻問買妾安在具告以故妻曰君用心如此何患無子果生京

金陵瑣事云段炳字虎臣秀才和元人馬東籬百歲光陰一套足以壓倒東籬又云張四維字治卿號五

山秀才有溪上閒情藏于家友人刊其雙烈記、章臺柳兩種。箬陂繼世紀聞云劉瑾奸險素疾文臣與同類屢在上前言弘治年間朝權俱爲內閣文臣所掌朝廷虛名而已每形諸戲劇臺閣名言云嘉靖甲辰給事中呂時中劾順天鄉試主考浦應麒通賄至形諸戲劇。

譚輅云姜詩傳奇相傳是學究陳罷齊所作雖粗淺然填詞亦親切有味且甚能感動人似有裨于風化不可以其膚淺而棄之。

錢塘女史梁夷素字孟昭工詩畫嘗作相思硯傳奇行世錢御史石城芙蓉峽傳奇亦其夫人林亞清作婦人填曲前代未有林名以寧有集詩極工。

湯來賀云先年樂府如五福百順四德十義躍鯉臥冰之類皆取古人之善行譜爲傳奇播諸聲容使兒童婦女見而樂之皆有所向慕而思爲善事則是飲食歌舞俱有益于風化古人之用心如此何其厚也自元人王實甫關漢卿作俑爲西廂其字句音節足以動人而後世淫詞紛紛繼作然聞萬歷中年家庭之間猶相戒演此近日若紅梅桃花玉簪綠袍等記不啻百種皆杜撰詭名絕無古事可考且意俱相同毫無可喜徒創此以導邪子不識其何心也說見內省齋文集。

顧景星虎媒劇序云封邵宣城太守不仁則化虎左飛龍編工曹不職則化虎鄭襄爲門下鶴無狀則化虎游章范端爲里役等人受錢則化虎譙平不孝則化虎牛哀不弟則化虎蘭庭妹袁州僧好竊盜則化虎李積私婦殺命則化虎人之不忠孝詐僞無厭者往往形未化而心已獸矣至於本虎也反若知

仁義邑有賈吏則渡江出境有高土則負篋受騎啣鹿供食襄陽秦孝子病則往乳之今黔峽間虎媒神祠者相傳乾元初張鎬尙書女事也又天寶末漳浦勤自勵妻杜氏大歷中鄭元方妻盧氏亳州人聘舅氏女皆父母奪志磨笄待死向非虎駄必至玉碎而鎬女不過遠謫愆期何勞於菟惟是時豬龍作禍士女仳離墮虎狼之口不可枚舉而神靈變化使人知虎狼中猶有仁義者此造化之用心而吾友卜子傳奇所由作也按虎薈載張鎬事云唐乾元初吏部尙書張鎬貶辰州司戶先是鎬在京以次女德容與僕射裴冕第三子前藍田尉越客結婚已歛迎日而鎬左遷遂改期來歲之春季其年越客速裝南邁距辰百里鎬喜越客遵約而至因命家族宴于花園德容亦隨姑姊妹遊焉山郡蕭條竹樹荒密忽有猛虎出自竹間遂擒德容跳入羈薈衆驚駭奔告張夜色已昏計力俱盡舉家號哭莫知所爲及曉大發人徒求骸骨山野是夕之夜越客行舟去郡三十二里尙未知妻爲虎暴召僕夫十餘輩登岸徐行其船亦隨焉不二三里遇水次板屋屋內有榻因憩焉俄聞有物來自林木之間微月之下見猛虎負一物至衆皆惶撓共闕喝之其虎徐行俯于板屋側留下所負物共闕是人尙有餘喘昇之登船列燭熟視乃十六七美女也越客深異之遣羣婢看診雖髻髮披散衣服破裂而身膚無少損以湯飲灌之卽微微入口久之神爽安集俄復開目與之言語莫有應夜久卽有自郡至者皆云張尙書次女昨夜春園爲暴虎所食至今求其殘骸未獲聞者遽以之告于越客卽遣羣婢具詢然而德容因啼號不止越客卽具以其事告于鎬鎬凌晨躍馬而至旣悲且喜則與同歸而婚媾果尅其期自是黔峽往往建立虎媒之祠焉又白茅堂集有虎媒歌贈張子一首云張郎感激何爲乎燈前夜語長歎歎

新翻樂府調吳歎

明詩綜云梅鼎祚宣城人周見洽聞兼精傳奇所填韓君平玉合記爲詞家所賞有云風中絮陌上塵嘆韶光何曾戀人人盛稱之又云王翊介人嘉興布衣能詩沈山子云介人所居止破屋一間種牽牛花小庭中曉露未晞對花吟詠日課數詩旁精詞曲有紅情言榴巾怨詞苑春秋博浪沙諸傳奇

明詩綜又云黃孔昭字含美吳縣人舉崇禎癸酉鄉試選授大挑知縣仳離天末久不得還其子向堅字端木有懷二人眼枯足繭蹈白刃尋之卒御以歸吳中好事者編萬里圓傳奇演之按黃端木有尋親紀程演還紀程今刻知不足齋叢書中崑山歸元恭節錄其紀行爲黃孝子傳余苦其尙繁冗更節之于左順治八年辛卯十二月朔擔一囊一蓋一草屨從吳江入浙歷嚴衢入江西至湖廣武岡州觸冰雪風雨陷泥淖涉深溪峻嶺手常擎蓋酸楚不能舉足重繭痛不可忍或血瘀赤腫則刺血出之復行往往僵臥道旁壬辰二月由楚入黔黔自丁亥以後境內殘破其地苗獠雜處耕者皆持矛負弩矢自衛荒茅漲沙之中每得虎跡次平溪有關帥府在焉以孝子短髮吳音疑爲奸細執之涕泣以情告得免以後凡遇官吏無不盤詰江南風俗變革六七載忽睹此如異國焉自平溪一路險如鬼窟土人云往時苗常出爲行旅害今十里立一塘而塘兵又多爲虎所食孝子惴惴至貴陽遇徽州人程姓者得知父無恙已掛冠五年矣程姓導孝子至王府給令票復前途中兵馬紛擁驗票或擊破其蓋自是不能蔽雨登關索嶺至半喘甚力盡而仆有老僧飲以茶久之強起踰嶺而西旣下則人馬旌旗徧野一騎執之入營驗票爲設食問之曰安西前營也行數里復遇後營如前遂入雲南之平夷衛遇故陽宗

知縣浙東錢士驥于是知父在白鹽井五月望日至白鹽井拜見父母時所攜弟之子從外負薪歸兄弟相拜泣昔日童僕無復存矣久之孝子啓父母作還家記父曰乙酉秋滇中猶鄉試我分房得十八人當累之爲行資孝子持父書詣諸門生家歷楚雄遇地震幾不免奔走四月遇者三人皆贍贈而未足詣府遞告歸文書具籃輿二親乘己與弟步從至黑鹽井詣門生家得資斧時南北戰爭不息坐旅中度歲詣將軍府得給票出歸化關黔中雨雪四十日雪深至馬腹樹介如刀劍已而雪消流潦瘴霧蔽天及平壩有騎兵擄婦女數百千從廣西來又敗兵數千擁一象蹤跡散走無復部伍從四川來蓋是時安西戰勝于桂林撫南敗于保寧皆道黔中也孝子慮貴陽有阻乃迂道從龍場驛而北渡烏江入四川及清浪入湖廣界所在潰兵暴掠從間道行及新化方脫險爲父改易服色舍陸從水而歸爲六月十八日自始出門至是越三年計五百三十餘日歷京省七府三十有三州縣計行二萬五千里有奇

屠長卿作彩毫記以李太白自命沈景倩譏之

如皋黃振字瘦石自號柴澗村農以張幼謙閩報捷事演爲石榴記

王龍光跋雙報應傳奇云吾友抱犢山農（抱犢山農無錫嵇留山也名永仁從范忠貞公死于難詳見余道聽錄中）著作甚富尤留心經濟與余同罹于難慷慨狂狷之中豪氣未除文采散于筆墨嘗作續離騷四折以破千古未破之牢騷同難林翁因備述建寧城隍揭公建寧郡守孫公判斷貧生錢可貴奸淫王文用二案陰陽互理靈爽顯赫此殆得之目覩不可不亟爲表章之山農曰此固余之素志

也。吾聞揭公節義昭著，英英千古。亡友袁參嵐受其國士之遇，曾託吾表著其事，而碌碌未能。今藉此以畢其素志可乎？乃援筆而敷陳其大概曰：雙報應。今按劇中孫名裔昌，字鹿園，山東沾化人。揭卽揭公重熙，錢生以逋欠官銀賣妻得銀三十兩，失于縣堂，爲皂隸陳黑所拾，生禱于城隍，復訴于府。孫正持茗有塵落椀中，茗爲之黑檢縣中值日花名簿，得陳黑名，訊之，供拾銀狀。生妻賣張貢生家，張知爲錢生妻，不敢與宿，願還婦而不索其金。王文用者，以所私婦謀鳩其夫者也。城隍神示夢于孫，而冤賴以理。孫公真不愧爲民牧者矣。跋中言得之目覩，蓋非幻設，爲撮其大略以俟考。

鈕玉樵記吳六奇將軍事云：海寧查孝廉培繼，字伊璜，家居歲暮，命酒獨酌。一丐者避雪廡下，強直而立。孝廉異之，呼入坐而問曰：我聞街市間有手不曳杖，口若銜枚，敝衣楞腹，而無寒餓之色者，人皆稱爲鐵丐者，是汝耶？曰：是也。能飲乎？曰：能。傾甌與飲，立盡，又盡三十餘甌，無醉容。查醉丐出，仍宿廡下。孝廉酒醒，謂家人曰：鐵丐衣藍縷，何以禦寒？亟以我絮袍與之，丐披袍去，亦不求見致謝。明年，孝廉寄寓杭之長明寺，遇前丐于放鶴亭側，露肘跣足，昂首獨行，詢以舊袍，曰：已質付酒家矣。孝廉奇其言，問曾讀書識字否，曰：不讀書，識字不至爲丐也。孝廉悚然心動，薰沐而衣履之，詒其姓氏里居，丐曰：僕系出延陵，心儀曲逆，家居粵海，名曰六奇。祇以早失父兄，性好博進，遂致落拓江湖，流轉至此。因念叩門乞食，昔賢不免，僕何人斯，敢以爲汚？不謂獲遇明公，賞于風塵之外。僕雖非淮陰少年，然一飯之惠，其敢忘乎？孝廉亟起而捉其臂，曰：吳生海內奇傑，以酒友目吳生，失吳生矣。盤桓累月，贈以資，遣歸粵東。六奇世居潮州，爲吳觀察道夫之後，略涉詩書，寄身郵卒於關河形勝，無不諳熟。維時天下初定，王師由浙入

廣六奇請見主帥備陳粵中形勢傳檄可定奇有義結兄弟三十人擁衆據土請假游劄三十道先往馳諭近降遠應不踰月而破竹之形成矣如其言行之粵地悉平由是征閩討蜀屢立奇功數年之間位至通省水陸提督康熙初開府循州卽遣牙將持三千金存孝廉家奉書幣致孝廉來粵供帳舟輿俱極腴備將度梅嶺吳公子已迎候道左執禮甚恭樓船簫鼓由胥江順流而南凡轄下文武僚屬無不願見查先生去州城二十里吳躬自出迎至府則蒲伏泥首自稱昔年賤丐非遇先生何有今日居一載軍事旁午凡得查先生一言無不立應義取之費幾至鉅萬先是茗中富人莊廷鉞購得朱相國史概博求三吳名士增益修飾刊行于世前列參閱姓氏十餘人以孝廉夙負重名亦借列焉未幾私史禍發凡有事于是書者俱置極典吳力爲孝廉奏辨得免孝廉嗣後益放情詩酒盡出橐中金買美鬢十二教之歌舞夫人亦妙解音律親爲家伎拍板正其曲誤以此查氏女樂遂爲浙中名部孝廉之在幕府也園林極勝中有英石峯一座高可二丈許嵌空玲瓏若出鬼製孝廉極所心賞題曰縹雲閣句往視從失此石則已命載巨艦送至孝廉家矣鉛山蔣清容太史本此作雪中人傳奇江都張山來云聞將軍乞食時好以荻莖于地上判某日及草封字雪中人第二齣吳云幾日不曾演習判字待我在雪地上試寫一回本此蔣太史又有桂林霜空谷香香祖樓四弦秋一片石第二碑冬青樹臨川夢諸劇

菽園雜記云高公穀無子置一妾夫人素悍每間之不得近一日陳學士循過焉留酌聚話及此夫人于屏後聞之卽出詬罵陳公掀案作怒而起以一棒撲夫人至不能興且數之曰汝無子法當棄汝今置

妾汝復聞之是欲絕夫後也汝不改吾當奏聞置汝于法自是妬少衰生中書舍人烜乃陳公一怒之力也馮猶龍本此作萬事足傳奇余嘗謂萬事足之陳循卽瑞筠圖之陳循一人而生淨各判閱者參觀之可以自警然萬事足之未繫以周約文一札云友生周禮拜上德遵賢契閣下古云器滿則欹月盈則虧閣下位登首輔恩寵已極值此太平無事之時久踞高巍即使無忝其職亦乖知足知止之義老夫年踰八旬足力未衰尙冀閣下急流勇退同尋山中之盟伏爲熟思陳唱云知幾久讀疏生傳但君恩未報暫流連按清波雜志載蔡京云京衰老宜去而不忍違乞身者以上恩未報也此曲本之蓋隱隱以蔡京比陳循矣陳苟明知足之義何至以粉面登場如瑞筠圖之遺臭耶

夏惺齋取忠孝節義事爲六種曲無瑕璧寫鐵氏二女事杏花村寫王世名報父仇事見明史瑞筠圖寫章綸母守節及綸直諫事南陽樂言武侯相北地王諶滅魏吳復興漢祚蓋寓言也花萼吟寫鄭虎臣殺賈似道亦本宋史廣寒梯則言科場事謂一生行善一生行不善善者夢中五名語不善者不善者訴于監臨發榜時監臨以所訴令抽去五名而別以一卷補之抽者正不善生補者則行善生也此事亦有所本然章綸母金節婦誰云妾無夫一詩或謂爲高季迪作鐵司馬二女入教坊其長女詩（鐵氏二女詩見王鏊震澤紀聞）乃吳人范昌期題老伎卷作見張士淪國朝文纂同時杜瓊用嘉亦有次韻詩

新齊諧有醫妬一則云軒轅孝廉常州人年三十無子妻張氏奇妬其座主馬學士贈以一姬張怒會學士喪偶張訪某村女世以悍聞賄媒姬說馬娶爲夫人馬知其意欣然往娶合巹畢羣姬拜見夫人問

何人曰妾也叱曰安有堂堂學士而置妾者乎卽棒羣姬馬命羣姬奪而毆之夫人力不勝罵且哭羣姬各擊銚鼓亂之夫人不得已揚言將自盡則侍者以一刀一繩進羣姬各敲木魚念往生呪嘈嘈然夫人故女豪自分虛疑恫喝計已盡乃轉作善正色曰君真丈夫我服矣請改事君君亦宜待我以禮學士命羣姬謝罪叩頭以家事託夫人主之一月之間家政肅雍內外無間言居無何學士手百金贈軒轅生曰明春將會試宜早入都生然之甫登舟馬遣人迎至家屬後園中而陰遣媒說張氏乘軒轅生外出賣其妾張曰此吾心也須賣之遠方有陝西布客負三百金以姬去姬大呼投水中學士早備小舟迎至園與軒轅生同室矣張聞姬投河方驚疑而西客已罵于門索原銀三百去一日有白髮藍縷男婦兩老人哭來稱爲女之父母與張索女命隣佑勸解去一日武進縣捕役持牌來言姬之父母告于縣張愈恐忽有白帽踉蹌奔呼至者曰軒轅生死于路矣我驟夫也來報氏大慟成服治喪且招訟師謀緩其獄訟事小停而家已蕩然日食不周矣前媒姐又來勸其改嫁引一美少年盛飾與觀張大喜卽嫁少年方合卺房內一醜婦持大杖出罵曰我正妻也何處賤婢敢來爲妾痛毆之張悔被媒給飲泣不能聲諸賓朋勸醜婦去秉花燭引張氏入臥室甫揭簾見軒轅生坐牀上大駭以爲鬼絕于地軒轅生笑語以故張大悟慚且恨于是修德改行卒與某村女同爲賢妻按此卽伏虎韜傳奇也文人詭筆非實有其事簡齋得諸傳聞未悉其所本耳槐西雜志所載囊家誘少年賭勒書鬻宇之券其父償金焚券發篋得紙錠金事此亦李笠翁無聲戲中一則非實事也

今戲劇演時遷偷雞科譚有皮包骨頭人之語按宋張元嘗與客飲驛中一客邂逅至顧元曰彼何人斯

元厲聲曰皮裹骨頭肉人斯應聲以鐵鞭鞭之而死見王定國聞見近錄

萬樹字紅友爲葵花主人之甥其所作傳奇詳山陰吳秉鈞所作風流棒序云余從紅友山翁遊由閩而粵耳其緒論與家小阮雪舫共以學填詞請探其篋得觀所譜諸劇幽秀若空青石俊爽若錦塵帆奇橫若念八翻新穎若十串珠翦裁點綴若黃金甕金神鳳最後讀資齊鑑以卷帙大重急難開演已請山翁節而傳之其他小劇若珊瑚毬舞霓裳藐姑仙青錢賺焚書鬧罵東風三茅宴玉山庵俱令家優試之匪能上余因操觚爲電目書一種雪舫亦作赤豆軍美人丹惟時藥庵呂君亦有回頭寶狀元符雙猿幻寶鏡緣藥庵令叔守齋亦攜金馬門曲出示丙寅春客有言某閨詞之僞者余謂此可入劇索山翁填之不半月而風流棒曲成茶郎之顛林風之韻菊人之摯及連霍之周圓童賴之醜報刻畫畢肖可稱觀止矣

劇中演趙太祖每持棒或侍臣持棒從之按鐵圍山叢談云太上以政和六七年間始講漢武帝期門故事初出侍左右官者必攜從二物以備不虞其一玉拳一則鐵棒也鐵棒者藝祖仄微時以至受命後所持鐵桿也棒純鐵耳生平持握既久而爪痕宛然

相傳有訟棍戴興邦者年六十止一子適有諸少年殺姦婦死而姦夫逸去謀于戴戴曰何不靜守村口候孤身男子過執而殺之以姦報諸惡少大喜挽入室酬以酒肉已而果有孤身者過衆殺之則正戴之子也惺齋杏花村傳奇中訟棍單興邦卽戴興邦單音丹與戴正爲轉音耳按元人曲中如良吏必包拯公人用董超薛霸惡人用柳隆卿胡子轉伎女用王蠟梅兒女用賽娘僧住蓋必實有其人杏花

村用單興邦尙其遺意也。

劇之有所原本名手所不禁也。王實甫之本董解元尙矣。他如本竇娥冤而作金鎖。本翠鸞女而作桃符。本曲江池而作繡襦。本合汗衫而作破羅衫。本張生煮海、柳毅傳書而作蜃中樓。本劉晨阮肇而作長生樂。他如本元人而故變化出之者。則如黃粱夢之呂岩化爲盧生。麗春堂之四丞相化爲尉遲敬德。或有用其一節者。若龐居士之羅和長生殿之唐明皇。雖不能青勝于藍。然亦各有所見。惟夢釵緣一劇。直襲西廂、西樓而合之。已爲偷父可笑。又有玉劍緣者。亦有彈詞一齣。夫洪昉思襲元人貨郎旦之九轉貨郎兒。其末云。名喚春郎身姓李。洪云。名喚春郎身姓李。至玉劍緣又云。名喚珠娘身姓李。生吞活剝。可稱笑柄。近則有爲富貴神仙者。竟至襲玉劍緣與夢釵緣之襲西廂、西樓同。若此又何必爲之。聊舉一二于此。以爲之戒。

泰州張良御太史作陸吳州墓碑云。公以餘力。作爲詞曲。一帆雙燕。流傳名部。皆取辦于杯茗立談之間。卓珂月作孟子塞殘唐再創雜劇小引云。作近體難於古詩。作詩餘難於近體。作南曲難於詩餘。作北曲難於南曲。總之音調法律之間。愈嚴則愈苦耳。北如馬、白、關、鄭、南如荆、劉、拜、殺。無論矣。入我明來。填詞者比比。大才大情之人。則大愆大謬之所集也。湯若士、徐文長兩君子。其不免乎。減一分才情。則減一分愆謬。張伯起、梁伯龍、梅禹金、斯誠第二流之佳者。乃若彈駁愆謬。不遺鎗鉢。而無才無情諸醜畢見。如臧顧渚者。可勝笑哉。必也具十分才情。無一分愆謬。可與馬、白、關、鄭、荆、劉、拜、殺、頡之頑之者。而後可以言曲。夫豈不大難乎。求之近日。則袁鼎公之珍珠衫、西樓夢、竇娥冤、鶯鶯記、陳廣楚之麒麟劇、靈寶

刀、鸚鵡洲、櫻桃夢。斯爲南曲之最。沈君庸之霸亭秋、鞭歌伎、簪花髻。孟子塞之花前笑、桃源訪、眼兒媚。斯爲北曲之最。余平時定論蓋如此。今冬造鳧公子塞於西湖，則鳧公復示我玉符南劇。子塞復示我殘唐再瓶北劇。要皆感憤時事而立言者。鳧公之作直陳崔魏事，而子塞則假借黃巢田令孜一案，刺譏當世。夫北曲之道聲止於三韻，止於四音，必分陰陽喉，必用旦末。他如楔子、務頭、襯字、打科、鄉談、俚諺之類，其難百倍於南。而子塞研討數年，其謹嚴又百倍於昔。至若釀禍之權璫，倡亂之書生，兩俱磔裂於片楮之中，使人讀之，忽焉驚噓，忽焉號呶，忽焉纏綿而悱惻，則又極其才情之所之矣。於我所陳諸公十餘本之內，豈不又居第一哉？子塞將還會稽，別我於桃花巷中，酒杯在手，輿夫在旁，匆匆書此。卓珂月又有百寶箱傳奇引云：昔者玉玦之曲，風刺寓焉，刻畫青樓，殆無人色。嗣賴汧國一事，差爲解嘲。然後漸出墨池而登雪嶺，乃余覽白行簡所述李娃始末，頗多微詞者，何歟？歸自竹林，憩于姨宅，目笑手揮，以他語對。蟬蛻之局，娃與聞之矣。迨夫雪中抱頸，擁入西廂，懼禍及身，非得已也。必可以生青樓之色，睡白面之郎者，其杜十娘乎？此事不知誰所覩記，而潘景升錄之於亘史。宋秋士採之于情種，今郭彥深復演之爲百寶箱傳奇，蓋皆傷之甚也。

詹允龍雷岸有瓊花夢雜劇，河陽趙士麟爲之序。見讀書堂文集，又作詹允詩序云：雷岸未顯時，著有瓊花夢傳奇劇本，予早年讀之，訝曰：此言夢也，而非夢者能言之也。旣而雷岸以博學宏詞薦，由檢討而宮允，文章詞賦冠絕一時。

尤西堂鈞天樂自記云：丁酉之秋，薄游太末，主人謝客，阻兵未得歸，逆旅無聊，追尋往事，忽忽不樂，漫填

詞爲傳奇，率日一齣，齣成則以酒澆之，歌呼自若。閱月而竣，題曰鈞天樂。家有梨園，歸則授使演焉。明年科場弊發，有無名子編爲萬金記，制府以聞，詔命進覽。其人匿弗出。臬司某大索江南，諸伶雜治之。遁山陰，姜侍御還朝，過吳門，亟徵予劇，同人宴之申氏堂中。樂既作，觀者如堵牆，靡不咋舌駭歎。而遷者亦雜其中，疑其事類馳白臬司。臬司以爲奇貨，卽檄捕優人，拷掠誣服，既得主名，將窮其獄，且徵賄焉。會有從中解之者，而予已入都，事得寢。己亥大計，臬司以貪墨亡命，寘極典籍其家，聞者快之。西堂又有讀離騷、弔琵琶、桃花源、黑白衛、李白登科記五種。李白登科記白狀元，杜甫榜眼，孟浩然探花，立格最奇。

西堂題北紅拂記云：愚謂元人北曲，若以南詞關目參之，亦可兩人接唱。合場和歌中間，間以蘇白，插科打諱，無施不可。又爲梨園子弟別闢蠶叢，此意無人解者。今于荔軒先生遇之，唐人小說傳衛公、紅拂、虬髯客故事，吾吳張伯起新婚，伴房一月而成紅拂記，風流自許。浙中凌初成更爲北劇，筆墨排奡，頗欲睥睨前人。但一事分爲三記，有疊牀架屋之病。荔軒復取而合之，大約撮其所長，決其所短，又添徐洪客採藥一折，得史家附傳之法。

玉鏡臺演溫太真事，投梭記演謝幼輿事，花筵賺合太真、幼輿，而演之。投梭筆墨雅潔，情詞婉妙，爲勝偶。于市間得一寫本，種鱗書屋外集兩劇，一蓬島瓊瑤，爲余本忠收服海寇事，一花目題名，則品題花目。以郁李爲狀元，海桐爲榜眼，紅梅爲探花，木樨爲傳臚。杜鵑下第，而以丁香配郁李，卷首題田民撰。孫僕，字商聲，詩古文簡潔，有法度，性孤冷，不喜諧俗，每就研席，輒怒其館主，不合而去。所著海棠緣傳奇。

痛詆偷父。蓋以此也。
劇說卷四

劇說卷五

戰國策云齊軍破淖齒殺閔王于鼓里太子乃解衣免服逃太史氏家爲溉園君王后太史氏之女知其貴人善事之田單復齊遽迎太子于莒立之以爲王君王后以爲后史記田敬仲世家云樂毅出臨淄湣王出亡之衛衛君辟宮舍之稱臣而共具湣王不遜衛人侵之湣王去走鄒魯有驕色鄒魯君弗內遂走莒楚使淖齒將兵救齊遂殺湣王而與燕共分齊之侵地湣王之遇殺其子法章變名姓爲莒太史敫家庸太史敫女奇法章狀貌以爲非恆人憐而嘗竊衣食之而與私通焉襄王旣立立太史氏女爲王后太史敫曰女不取媒因自嫁非吾種也汙吾世終身不覩君王后君王后賢不以不覩故失人子之禮張伯起全本此以作灌園記馮猶龍刪改正之序云奇如灌園何可無傳而傳奇如世所傳之灌園則吾謂其無可傳且憂其終不傳也法章以亡國之餘父死人手身爲人奴此正孝子枕戈志士臥薪之日不務憤悱憂思而汲汲焉一婦人之是獲少有心肝必不乃爾且五六年間音耗隔絕驟爾黃袍加身而父仇未報也父骨未收也都不一置問而惄惄焉訊所思得之太傅又謂有心肝乎君王后千古女俠一再見而遂失身卽史所稱陰與之私談何容易而王孫賈子母忠義爲嗣君報終天之恨者乃棄不錄若是則灌園而已私偶而已灌園私偶何奇乎而何傳乎伯起先生云吾率吾兒試玉峯舟中無聊率爾弄筆遂不暇致詳誠然歟誠然歟自余加改竄而忠孝志節種種具備庶幾有關風化而奇可傳矣馮氏此言可爲傳奇之式故錄之然太史敫可稱潔士故迎后登車一折寫君王后別

母而敷不與見。曲云：只得遙拜著鐵錚錚的家主，恕饒了癡騃的女娃，以腳色不足，故太史敷以淨扮之耳。

知新錄云：元曲有呂布貂蟬及奪戟爭鬪事。按呂布傳言：布小失意，卓拔手戟擲布，布奉捷避之。又言布與卓侍婢私通，恐事發覺，心不自安。布因朝會，手刃刺卓，想侍婢當卽貂蟬也。元曲所云必有所據。呂翁祠在鄖鄆縣北二十里黃粱店。李長沙詩云：舉世空中夢一場，功名無地不黃粱。馮君莫向癡人說，說與癡人夢轉長。端溪王崇慶詩云：曾聞世有盧生夢，只恐人傳夢未真。一笑乾坤終有歇。呂翁亦是夢中人，乃元人馬致遠黃粱夢雜劇爲鍾離度呂洞賓事。夢中呂作元帥征吳元濟，則憲宗時事矣。湯若士本之作鄖鄆夢，則爲呂度盧生而爲開元時事。按呂洞賓，關右人。唐咸通中舉進士不第，值巢賊爲梗，攜家隱終南山。錦繡萬花谷引此言云：見雅言雜載，則憲宗時已非開元時尤非。真仙通鑑有盧生事，恐未然耳。

鄭庭玉作後庭花雜劇，只是本色處不可及。沈寧庵演爲桃符排場賓白，用意遜鄭遠矣。

宮大用范張雞黍第一折，乃一篇經史道德大論，抵多少宋人語錄。曲中用遂邪二字，乃玉茗所本。西河詞話云：宋孫明復鬱白，李文定請以弟之女妻之。孫曰：相女不以嫁公侯，乃以嫁山谷衰老。古無有之，其曰相女者，相門之女，正以李復古曾爲相故也。西廂末劇有自古相女配夫，世多不解。烏知實本諸此。又云：西廂久爲人更竄。予求其原本正之，逐字核實，其書頗行，其中尙有不能詳處，如第四折內有和尙們回施些幽期密約句，予向所釋，但曰施僧曰布施，反乞僧施曰回施。後友人有論及者，堅謂

回作曲解。是委曲周旋意。雜引回曲二字作證。曾記北史北齊李庶無鬚。人謂天閻。崔謐嘗戲庶曰。教弟種鬚法。取錐刺面爲竅。而插以馬尾。當效。是時崔族多惡疾。庶因答曰。請先以方回施貴族。藝眉有效。然後種鬚。然則回施反施矣。蔡子伯曰。施音賜。今俗稱回賜者。卽回施之謂。尤較直捷。

喬夢符兩世姻緣曲中云。俺主人酒盃。賺煞春風回。從唐人酒回蠱心翻出。

程史云。秦檜以紹興十五年四月丙子朔賜第望仙橋。丁丑賜銀絹萬匹兩錢千萬綵千縷。有詔就第賜宴。假以教坊優伶。宰執咸與。中席優長誦致語退。有參軍者。前褒檜功德。一伶以荷葉交椅從之。談語雜至。賓歡既洽。參軍方拱揖謝。將就椅。忽墜其幞頭。乃總髮爲髻。如行伍之巾。後有大巾環爲雙盤勝。伶指而問曰。此何環。曰。二勝環。遽以朴擊其首。曰。爾但坐太師交椅。取銀絹例物。此環掉腦後可也。一座失色。檜怒。明日下伶于獄。有死者。又云。胡給事旣新貢院嗣歲庚子適大比。乃侈其事。命供帳。考校者悉倍前規。鵠袍入試。茗卒饋漿。公庖繼肉。坐案寬潔。執事恪敬。闇闇于于。以鬯于文。士論大憮。會初場賦題出孟子舜聞善若決江河。而以聞善而行。沛然莫禦爲韻。士旣就案矣。蜀俗敬長而尚先達。每在廣場。不廢請益焉。晡後。忽一老儒摘禮部韻示諸生。謂沛字惟十四泰有之一。爲顛沛。一爲沛邑。注無沛決之義。惟它有濡字。乃從雨爲可疑。衆曰。是閼然叩簾請出題者偶假寐。有少年出酬之。漫不經意。亶云。禮部韻注義旣非。增一雨頭無害也。揖而退。如言以登于卷。坐遠于簾者。或不聞知。乃仍用前字。于是試者用濡沛各半。明日將試論語籍籍傳。凡用沛字者皆窘。復扣簾出題者。初不知昨日之對。應曰。如字。庭中大譁。浸不可制。譟而入曰。試官誤我三年。利害不細。簾前闇木如拱。皆折或入于房。執

考校者一人殿之。考校者惶遽急曰：有雨頭也得，無雨頭也得。或又咎其誤曰：第二場更不敢也。蓋一時祈脫之詞。移時稍定。試司中鼓譟場屋。胡以不稱于禮遇也。怒物色爲首者盡繫獄。章布益不平。旣拆號例。宴主司以勞還畢。三爵優伶序進。有儒服立于前者一人。旁揖之相與詫博洽辯古今。岸然不相下。因各求挑試所誦。憶其一問漢四百載名宰相凡幾。儒服以蕭曹而下枚數之無遺。羣優咸贊其能。乃曰：漢相吾能言之矣。敢問唐三百載名將帥何人也。旁揖者亦詬指英衛以及季葉。曰：張巡、許遠、田萬春。儒服奮起爭曰：巡遠是也。萬春姓雷。考史牒未有以雷爲田者。揖者不服。撲拒騰口。俄一綠衣參軍自稱教授。前据几二人敬質疑曰：是故雷姓。揖者大詬。袒裼奮拳。教授遽作恐懼狀曰：有雨頭也得。無雨頭也得。坐中方失色。知其風已也。忽優有黃衣者持令旗躍出稠人中。曰：制置太學給事台旨。試官在坐。爾輩安得無禮。羣優亟斂容趨下。喏曰：第二場更不敢也。夾所皆笑。席客大慚。明日遁去。遂釋擊者。胡意其爲郡士所使。錄優而詰之。杖而出諸境。然其語盛傳迄今。

續筆談云：元人女狀元黃崇嘏春桃記今不傳。僅輟耕錄有其目。大抵如琵琶等記。

詩辨坻云：北西廂古本陳實庵點定者爲佳。別本多所改竄。如東閣玳筵開爲帶烟開。馬兒迹迹行爲逆逆行。穿鑿可笑。請字兒不會出聲。去字兒連忙答應。或謂請未出聲。如何答應。改作請字兒方才出聲。索然無味矣。楚王宮殿夜撞鐘。撞平聲。田水月改作聲鐘。聲鐘是何等語。

詞旨載西廂警策不下百十條。如竹索纜浮橋。檀口搘香腮等語。不知皆撰自董解元西廂。竹索上有寸金二字。檀口句則曰檀口微微笑吐丁香舌。被郎輕噉卻更增人劣。較漢卿奇麗精采十倍。見黃嘉惠

董解元西廂記序案王實甫長亭送別一折稱絕調矣董云莫道男兒心如鐵君不見滿川紅葉盡是離人眼中血實甫則云曉來誰染霜林醉總是離人淚淚與霜林不及血字之貫矣又董云且休上馬苦無多淚與君垂此條情緒你爭知王云閣淚汪汪不敢垂恐怕人知董云馬兒登程坐車兒歸舍馬兒往西行坐車兒往東拽兩口兒一步兒離得遠如一步也王云車兒投東馬兒向西兩處徘徊落日山橫翠董云我郎休怪強牽衣問你西行幾日歸著路裏小心呵且須在意省可裏晚眠早起冷茶飯莫吃好將息我專倚著門兒專望你王云到京師服水土趁途節飲食順時自保揣身體荒村雨露宜眠早野店風霜要起遲鞍馬秋風裏最難調護須要扶持董云驢鞭半裯吟肩雙聳休問離愁輕重向個馬兒上馳也馳不動王云四圍山色中一鞭殘照裏人間煩惱填胸臆量這大小車兒如何載得起董云帝里酒釀花濃萬般景媚休取次共別人便學連理少飲酒省遊戲記取奴言語必登高第妾守空閨把門兒緊閉不拈絲管罷了梳洗你咱是必把音書頻寄王云你休憂文齊福不齊我只怕停妻再娶妻一春魚雁無消息我這裏青鸞有信頻宜寄你切莫金榜無名誓不歸君須記若見異鄉花艸再休似此處棲遲董云一個止不定長吁一個頓不開眉黛兩邊的心緒一樣的愁懷王云他在那壁我在這壁一遞一聲長吁氣兩相參玩王之遙董遠矣若董之寫景語有云聽塞鴻啞啞的飛過暮雲重有云回首孤城依約青山擁有云柳堤兒上把瘦馬兒連忙解有云一徑入天涯荒涼古岸地雨打芭蕉葉急煎煎的促織兒聲相接有云燈兒一點甫能吹滅雨兒歇閃出昏慘慘的半牕月有

云。披衣獨步在月明中凝睛看天色。有云野水連天天竟白。有云東風兩岸綠楊搖馬頭。西接著長安道。正是黃河津要用寸金竹索纜著浮橋。前人比王實甫爲詞曲中思王太白實甫何可當。當用以擬董解元李空同云。董子崔張劇當直繼離騷。

曲藻云。偶見歌伯喈者云。浪暖桃香欲化魚。期逼春闌詔赴春闌。郡中空有辟賢書。心戀親闌難捨親闌。頗疑兩下句意各重。後得一善本。乃浪暖桃香欲化魚。期逼春闌難捨親闌。郡中空有辟賢書。心戀親闌難赴春闌。意既不重。益見作者之工。談輅云。嘗見琵琶記草本。醉扶歸。綵筆本潤二句。改作詞源倒流二句。今刻本已從之矣。又見一本三不從。做成災禍。一似天來大改云。三不從。把好事翻成禍。惜未有從之者。改筆皆草書旁注。意必東嘉手筆。秦淮劇品云。曲引之有呼韻。自趙五娘之呼蔡伯喈始也。而無雙之呼王家哥哥。西施之呼范大夫。皆有悽然之韻。

相傳臨川作還魂記。運思獨苦。一日家人求之不可得。遍索乃臥庭中薪上掩袂痛哭。驚問之。曰。填詞至賞春香還是舊羅裙句也。

填詞高手如陳大聲、沈青門之屬。俱南北散套。不作傳奇。惟周憲王所作雜劇名誠齋樂府。往往調入弦索。有金元風範。南曲如四節連環、繡襦之屬。出于成弘間。稍爲當時所稱。嘉靖間陸天池名采者。所撰有王仙客明珠記、韓壽偷香記、陳同甫椒觴記、程德遠分鞋記。惟明珠記行於世。鄭若庸玉玦記游西湖一套。當時膾炙人口。見鶴亭雜訂。

南音三籟云。作曲須先識字。否則往往誤用。如梁伯龍浣紗金井水紅花云。波冷濺片芽溼裙。教數字法。

用平聲然教箭袋也。若衣釵之杖屬去聲。李義山詩十歲去踏青。夫容作韁杖。是爲明證。此其失。自陳大聲散套節節高之蓮舟戲女娃露裙衩始耳。湯臨川懶畫眉。荼蘂抓住裙衩線亦誤。僅陳玉陽玉抱肚云打毬回紛紛衩衣獨是又浣紗劉激帽云娘行聰俊還嬌倩勝江南萬馬千兵不知倩有二音。一顧倩之情作去聲讀。一作茜卽巧笑倩兮之情言美也。此曲字義當作茜音。今卻押庚青韻中他若瘦之爲穎音頸瘤也。鄭虛舟玉玦記卻教愧煞瘦瘤婦是認作平聲矣。又莊子藐姑射之山射音亦巾櫛之櫛音率而汪南溟高唐記與雪滅同押至以纖殲鹽三字並押車遮是徽州土音也。又云招魂未得空歌楚些些音蘇箇切。惟些少之些乃作平聲。今以楚些作平聲何也。伯龍以些與飛同押。又認些字作西字音爲蘇州土音也。又有舉世皆誤而爲不可解之字者。今列戲目而曰第一齣字或作折或作出問從何來則默不能對也。蓋字書從無此字。惟牛食已復出曰鈍音答傳寫者誤寫台爲句以齣作鈍。鈍原作齣。以齣作齣在屈筆毫釐之間。以致展轉傳誤不若古劇第幾折爲妥也。

雋區云傳奇當以張伯起爲第一。若紅拂竊符灌園祝髮四本巧妙悉敵。次則推梁伯龍浣紗梅禹金玉合當與琵琶西廂分路揚鑣。若湯若士之邯鄲夢屠綽真之曇花。別是傳奇一天地。然識者有患其才多之議。裴淑英記彤管流馨是風闌德彩毫紫釵南柯三傳俱出屠湯手筆。而往往以學問爲長。徒令人驚雕績滿眼耳。虎符亦屬張伯起作。而風致視四本大相懸絕。自是詞曲第二流之佳者。幽閨爲元人曲淡而絕眞。他如明珠繡襦投筆四節紅梅葛衣玉環玉玦點綴俱不入俗。玉簪幾于淫矣。而措詞亦有可觀。此外新聲如林吾無暇概及矣。

繡襦記中鵝雪一折及乞兒家常口頭語鎔鑄渾成不見斧鑿痕跡可與古詩孔雀東南飛唧唧復唧唧並驅沈寧庵謂此爲元人筆非鄭盧舟所能辨也然元人鄭元和雜劇無此曲

吳中渠十二三時便能填詞一種情傳奇乃其幼年作也恐爲父呵責託名粲花粲花者其司書小隸也今所傳者四種療姑羹畫中人西園記綠牡丹

務頭者南北同法苟遇緊要字句須揭起其音而宛轉其調如俗所謂做腔處每曲或一句或二三句每句或一字或二三字即是務頭宜施俊語否則便爲不分務頭非曲所貴見九宮譜定論說曲藻云作詞之法一造語二用事三得字四陰陽五務頭六對偶七末句八去上九定格解務頭云要知某調某句某字是務頭可施俊語于上楊用修乃謂務頭是部頭可發一笑

古杭夢遊錄云唱賺在京師只有纏令纏達中興後張五牛大夫遂撰爲賺者誤賺之意令人正堪美聽不覺已至尾聲

吾友談星符名泰江寧人乾隆丙午舉人深於音律之學生平愛牡丹亭詳爲注釋嘗語余曰冥判一齣用胡判官蓋釋典中八月判官姓胡杜小姐八月死故用此也

熙朝名劇三種芙蓉樓廣寒香易水歌芙蓉樓題雙溪鴈山填詞廣寒香題蒼山子編

吾鄉徐又陵號坦庵填詞入馬東籬喬夢符之室所作有大轉輪買花錢拈花笑浮西施胭脂虎珊瑚鞭九奇逢詞評云宋高宗在德壽宮遊聚景園偶步入一酒肆見素屏有俞國寶書風入松一詞嗟賞之誦至明日重攜殘酒來尋陌上花鉢曰未免酸氣改明日重扶殘醉仍卽日予釋褐坦庵買花錢雜劇

本此。

兩紗雜劇題元成子作。一爲紅紗。謂試官閱卷。紅紗照眼也。一爲碧紗。本唐王播木蘭院故事也。紅紗中試若耶美人曉起梳頭詩。主司之式要翻空取言外之神。故天字號秀才。以徵實描寫被斥。地字號秀才。以筆意虛寫見賞。脫盡應試科譚。毛西河作來元成墓志銘云。君諱集之。字元成。自爲誌云。予所著有某書及雜劇之兩紗、秋風三疊而已。案兩紗、三疊史志皆不載。顧子知君事。君以崇禎己巳赴童試。縣斥之。粘其文於門。庚午再試。再斥之。然而府試拔第一。時年二十七。始附學。于是作兩紗劇。一紅紗。謂以紗幃。目眩五色也。一碧紗。則紗蒙其舊所爲詩。貴與賤易觀也。夫通塞之難憑如此。

山水鄰四大癡傳奇。酒癡爲姜應詔得不義之財。遂以酒敗家。色癡爲莊子扇墳。其妻劈棺事財。癡爲臭盧員外一文錢事。氣癡爲黃巢以不第造反事。酒癡一名酒懂。爲武林李逢時撰。一文錢亦刻名家雜劇中。稱破慳道人作。

如是我聞云。吳雲巖家扶箕。其仙稱邱長春。一客問曰。西遊記果仙師所作。以演金丹奧旨乎。曰然。又問仙師作書于元初。其中祭賽國之錦衣衛。朱紫國之司禮監。滅法國之東城兵馬司。唐太宗之大學士。翰林院中書科。皆同明制何也。按邱長春。登州棲霞人。元太祖自奈蠻國。遣侍臣劉仲祿召詣行在。自東而西。故有西遊記。非演義之西遊記。演義之西遊記。本唐元奘西域志。白馬馱經松枝。西指亦有所本。若猿龍等。則目蓮救母戲中亦有之。今揆作者之意。則亦老子場屋者。憤鬱之所發耳。黃袍怪爲奎宿所化。其指可見。尤西堂鈞天樂。奎星始扮鬼狀。如繪畫塑像形。後則白面扮之。稱奎星之位。向爲鬼

奪與西遊記黃袍怪用意正同。

茶餘客話云舊志稱吳射陽性敏多慧爲詩文下筆立成復善諧謔所著雜記幾種名震一時今不知誰記爲何名惟淮賢文目載先生撰西遊通俗演義是書明季始大行里巷細人皆樂道之而前此亦未之有聞世稱爲證道書有合金丹大旨按射陽生修志時不遠未必以世俗通行之小說移易姓氏其說當有所據觀其中方言俚語皆淮之鄉音街談巷弄市井童孺所習聞而他方有不盡然者其出淮人之手尤無疑然此特射陽遊戲之筆聊資村翁童子之笑謔必求得修煉祕訣亦鑒矣

吳興董說字若雨後爲僧號月涵每一出遊有書五十擔隨之著西遊補一書俱言孫悟空夢遊事鑒天驅山出入莊老而未來世界曆日先晦後朔尤奇

關門神雜劇爲茅僧曇孝若撰謂除夕夜新門神到任舊門神不讓相爭也曲中紫花兒序云誰將俺畫張紙裝的五彩冷面皮意氣雄赳豎劍眉闊口鬃慧手擎著加冠進爵刀斧彭排奇哉剛買就遍街人驚駭盡道俺龐兒古怪滿腹精神倜儻胸懷金葉蕉雲俺且眼偷瞧桃符好乖那戴頭盔將軍忒呆只你幾年上都剝落了顏色甚滋味全無退悔小桃紅云少不得將苕帚兒刷去塵埃把舊門神摔碎扯紙條兒滿地踹化成灰非俺沒面情挈帶只你風光過來威權類齡到今日回避也應該

鄭西神名瑜有汨羅江黃鶴樓滕王閣三種黃鶴樓末收江南一曲柳問呂答與徐文長翠鄉夢末同膝王閣則全以王子安一序作曲汨羅江則以離騷經作曲讀原文一段歌曲一段立格甚奇得未曾有義俠水滸二傳本施耐庵水滸小說而施耐庵則本宣和遺事其略云朱勔運花石綱分差楊志李進義

林沖、王雄、花榮、柴進、張青、徐寧、李應、穆橫、關勝、孫立、十二人爲指使。搬運花石至京。楊志在潁州待罪。立不來。貧餓賣所佩刀與惡少交口。志殺之。配衛州軍城。孫立等十一人于黃河岸上刦往大行山爲盜。又宣和二年五月。北京留守梁師寶以十萬貫金珠珍寶使縣尉馬安國賚至京爲蔡太師壽。至五花營堤上歇涼。遇大漢八人。有擔酒者。縣尉與衆買飲。被迷。失去所賚物。獲其酒桶。訴于知縣尹大諒。尹驗酒桶上有酒海花家四字。捉事人王平。捉花家名約者付吏張大年勘問。花約供云。三日前午時。有大漢八人來我家裏喫酒。道是往嶽廟燒香。借去此桶。八人爲首者。鄆城縣石碣村晁蓋。帶領吳加亮、劉唐、秦明、阮進、阮通、阮小七、燕青等。卽下鄆城縣根捉。其押司宋江夜走報晁蓋逃去。邀約楊志等。往梁山濶爲盜。思宋押司之恩。使劉唐以金斂酬謝。宋江以斂子妓女閻婆惜告以來歷值因父病給假歸家。遇捕魚人杜千、張岑與索超、董平飲酒。平因不獲晁蓋被杖。超故爲盜者。宋作書送四人于梁山濶。晁蓋入夥。已而父病愈入城。至閻婆惜家。見閻女與吳偉打暖。憤取刀殺兩人。而題其壁。巡檢王成帥大兵弓手至宋家莊上捉江。江走入屋後玄女廟。于案上得一卷文書。寫云。破國因山木兵刀。用水工。一朝充將領。海內聳威風。又列三十六人。智多星吳加亮、玉麒麟李進、義青面獸楊志、混江龍李海、九紋龍史進、入雲龍公孫勝。浪裏白條張順、霹靂火秦明、活閻羅阮小七、立地太歲阮小五、短命二郎阮進、大刀關必勝、豹子頭林沖、黑旋風李逵、小旋風柴進、金鎗手徐寧、撲天雕李應、赤髮鬼劉唐、一直撞董平、插翅虎雷橫、美髯公朱同、神行太保戴宗、賽關索王雄、病尉遲孫立、小李廣花榮、沒羽箭張青、沒遮攔穆橫、浪子燕青、花和尚魯智深、行者武松、鐵鞭呼延綽、急先鋒索超、拼命三郎石秀、火船

工張岑摸着雲杜千鐵天王晁蓋一行云天書付天罡院三十六員猛將使呼保義宋江爲帥廣行忠義殄滅奸邪江乃同朱同雷橫李達戴宗李海奔梁山滬上時蓋已死遂以江爲首殺牛大會吳加亮稱晁蓋臨終時言政和年間夢寨上得三十六數若果應數須助行忠義衛護國家宋江言今會中但少三人乃花和尚魯智深一丈青李橫鐵鞭呼延綽于是劫掠州縣攻奪淮陽京西河北三路二十四州八十餘縣朝廷命呼延綽爲將領投降海賊李橫等出師收捕屢戰屢敗朝廷督責甚嚴呼延綽李橫乃叛投江江喜三十六人已足遂往朝東嶽賽取金爐心願張叔夜招誘歸順朝廷各授武功大夫分注諸路巡檢使後遣收方臘有功封節度使周密癸辛雜識載襲聖與所作宋江等三十六贊聖與序云宋江事見于街談巷語不足采著雖有高如李嵩輩傳寫士大夫亦不見黜余年少時壯其人欲存之畫贊以未見信書載事實不敢輕爲及異時見東都事略中載侍郎侯蒙傳有書一篇陳制賊之計云宋江以三十六人橫行河朔京東軍官數萬無敢抗者其才必有過人不若赦過招降使討方臘以此自贖或可平東南之亂余然後知江輩真有聞于時者于是卽三十六人人爲一贊而箋體在焉其所列三十六人與宣和遺事小異智多星吳加亮作吳學究玉麒麟李進義作玉麒麟盧俊義赤髮鬼劉唐作尺八腿大刀關必勝作關勝船火工張岑作船火兒張橫沒羽箭張青作張清急先鋒索超作先鋒索超金鎗手徐寧作金鎗班短命二郎阮進作短命二郎阮小二混江龍李海作李俊賽關索王雄作楊雄無入雲龍公孫勝豹子頭林沖一丈青張橫而有兩頭蛇解珍雙尾蝎解寶又宣和遺事三十六人不數宋江此則連宋江爲三十六在宋時所傳聞異詞已如此宋史于宣和三年書淮南

盜宋江等犯淮陽軍又犯京東江北入楚海州界命知州張叔夜招降之又于年書忠州防禦使辛興宗擒方臘於清溪張叔夜傳言宋江降而不言降後之事侯蒙傳亦載其疏招宋江平方臘語而不詳其允否則當時用蒙議命張叔夜降之使隸辛興宗平方臘于清溪未可知也史書建炎二年十二月金人犯汴南府守臣劉豫以城降劉豫傳云金人攻汴南遣人說豫豫殺守將關勝率百姓降金關勝卽大刀關勝耶則已爲守將非以功進秩歟而爲豫所殺則忠義以衛國家者信矣元人劇中多及宋江事李致遠風雨還牢末劇中有宋江劉唐李逵史進阮小五五人康進之李逵負荊劇中有宋江吳學究魯智深李逵四人李文蔚燕青博魚劇中有宋江吳學究燕青三人無名氏爭報恩三虎下山劇中有宋江關勝徐寧花榮四人皆三十六人贊中所有高文秀作黑旋風雙獻功劇宋江白云某姓宋名江字公明綽號及时雨幼時爲鄆城縣司吏因帶酒殺了閻婆惜脊杖六十迭配江州牢城經過梁山滌晁蓋救某上山晁蓋因三打祝家莊身亡衆拜某爲頭領聚三十六大夥七十二小夥施耐庵演義有一百八人及打祝家莊配江州等事蓋本此又錄鬼簿高文秀雜劇黑旋風雙獻頭外又有黑旋風詩酒麗春園黑旋風大鬧牡丹園黑旋風敷衍劉要和黑旋風鬪雞會黑旋風窮風月黑旋風喬敷學黑旋風借屍還魂楊顯之有黑旋風喬斷案紅字李二雜劇有病楊雄板踏兒黑旋風折擔兒武松打虎三種康進之李逵負荊外又有黑旋風老收心一種甕天脞語載宋江潛至李師師家題一詞于壁云天南地北問乾坤何處可容狂客借得山東烟水寨來買鳳城春色翠袖圍香鮫鯛籠玉一笑千金值神仙體態薄倖如何消得想蘆葉灘頭蓼花洲畔皓月空凝碧六六雁行連八九只待金雞消

息義膽包天忠肝蓋地四海無人識閒愁萬種醉鄉一夜頭白見升庵詞品所引。

王昭君事見漢書西京雜記有誅畫工事元明以來作昭君雜劇者有四家馬東籬漢宮秋一劇可稱絕調臧晉叔元曲選取爲第一良非虛美但西京雜記謂王嬌自恃容貌不肯與工人乃醜圖之工人不專指毛延壽所誅畫工延壽而外又有安陵陳敞新豐劉白翼寬下杜陽望樊商同日棄市東籬則歸咎毛延壽一人又本青塚事謂昭君死于江而以元帝一夢作結薛旦反此作昭君夢則謂已嫁單于而夢入漢宮也惟陳玉陽昭君出塞一折一本西京雜記不言其死亦不言其嫁寫至出玉門關即止最爲高妙尤西堂作弔琵琶前三折全本東籬末一折寫蔡文姬祭青塚彈胡笳十八拍以弔之雖爲文人狡猾而別致可觀元人張時起有昭君出塞劇今不傳。

陳玉陽文姬入塞一折南山逸史亦作中郎女雜劇曹瞞不用粉面以外扮亦取其片善之意。

江湖紀聞云檜旣殺武穆向靈隱祈禱有一行者亂言謾檜問其居址僧有家在東南第一山之句檜令隸何立物色立至宮殿見僧坐決事立問答曰地藏王決檜殺岳飛事卒引檜至身荷鐵枷囚首垢面呼告曰東窗事發矣邱氏遺珠云有方士伏章見檜與方侯俱荷鐵枷檜囑方士曰傳語夫人東窗事發矣湖壩雜志云秦檜遇風僧于冷泉亭事不載乘誌余于鴻書見之亦非無因之說至今廚中秦檜齋僧鍋尙存秦徵蘭宮詞注云天啓時上設地炕于懋勤殿御宴演戲嘗演金牌記至風魔和尚罵秦檜魏忠賢趨匿壁後不欲正視錄鬼簿孔文卿有秦太師東窗事犯劇金仁傑亦有之惜不傳費醒狂有陌花軒雜劇凡十折曰倚門四折再醮一折淫僧一折偷期一折督妓一折變童一折懼內一

折皆舉市井敝俗描摹出之。

武進蔣孝廉調號竹塘每日持穢迹金剛咒咒云唵『甕』嘛『必』話『哇』囉『孤』哩『利』摩訶鉢『般』囉『若』摩訶鉢囉很『恨』那『把』喝『戲』吻『奴』汁『則』吻醯『嘻』摩尼微咷『既』微摩那『丫』棲唵『暗』研『勺』急『雞』那『奴』烏深暮『摩』囉『孤』唵『利』吽『哄』吽吽吽吽吽吽莎訶萬紅友作空青石傳奇內有穢迹金剛登場卽念此咒紅友又有風流棒第一齣荆荼郎登場攜考具衣青氈作鄉試入闈狀此從來未有者。

徐文長本古樂府木蘭歌演爲雌木蘭雜劇與狂鼓吏翠鄉夢女狀元爲四聲猿然木蘭歌不詳木蘭之所終而徐文長則有王郎成親之科白考商邱志有孝烈將軍祠在城東南營郭鎮北一名木蘭祠元人侯有造作孝烈將軍祠像辨正記云將軍魏氏本處子名木蘭毫之譙人也世傳可汗募兵孝烈痛父耄羸弟妹皆稚弱慨然代行服甲冑鞬橐操戈躍馬馳神攻苦鈍効戎陣膽氣不少衰人莫窺非男也歷年一紀交鋒十有八戰策勛十二轉天子喜其功勇授以尚書隆寵不赴懇奏省視擁兵還譙造父室釋戎服復閨妝舉皆驚駭咸謂自有生民以來蓋未見也以異事聞于朝召復赴闕欲納宮中將軍曰臣無媿君禮制以死誓拒之勢力加迫遂自盡所以追贈有孝烈之謚也至治癸亥冬歸德幕府官孫思榮來自完州附郡儒韓彥舉所述完志謂古完廟貌凡五今所存者四歲遇四月八日有司率耆士邦民大享祀此故太子贊善劉廷直所撰完碑睢陽郡南東距八十里曰營郭卽古亳方域孝烈之故墟也亦建祠像土人亦以四月八日致祭乃將軍生朝沿習古老之云也元統甲戌曲陽梁君思

溫尹睢陽力贊耆老湯德等捐己財鬻石備工歸德府倅中山馬公德麟謂余言將軍塚廟居完城東者所謂五廟之一孝烈遺骸安厝此塚距吾家九十里其廟刊木爲像烏帽紅顏服紫腰金神目電灼儼然如在其上遇旱澇有禱即應邦人輦致降神盤桓水面驅人風飛吾目擊顯靈如此又云木蘭詩惟先尊縉山先生家藏宋儒陳仁王德翁詩統列于隋詩之下此詩唐朔方節度使韋元甫始得于民間可汗之稱始自突厥突厥世居朔塞將軍譙人譙卽今亳州也按彼去此何啻數千里之遙詩稱黠兵問欲皆云可汗遍考國史隋恭帝義此地突厥立劉武周爲定陽可汗立梁師都爲始畢可汗國號梁改元永隆師都乃迎突厥居河南之地故此境之兵稱隸可汗之繇也又云孝烈追贈乃唐之謚贊咏詩什杜牧之首倡決以將軍之爲隋人按此考辨精確而所傳木蘭之烈則未嘗適人者傳奇雖多謬悠然古忠孝節烈之跡則宜以信傳之因文長有王郎成親之科白而詳之于此

樂府雜錄云明皇朝有章青本是士人嘗有詩三代主綸誥一身能唱歌官至將軍開元中內人有許和子者本吉州永新縣口家女也選入宮卽以永新名之籍于宜春院旣美且慧善歌能變新聲明皇嘗獨召李蕃吹笛逐其歌曲終管裂其妙如此一日賜大酺于勤政樓觀者數千萬衆謳諺聚語莫得魚龍百戲之音上怒欲罷宴高力士請命永新出樓歌一曲必可止謳上從之永新乃撩鬢舉袂直奏曼聲至是廣場寂寂若無一人洎漁陽之亂六宮星散永新爲一士人所得章青避地廣陵日夜憑闌于上河之上忽聞舟中奏水調者曰此永新歌也乃登舟與永新對泣久之青始亦晦其事後士人卒與其母之京師竟歿于風塵此一事也又云大曆中有才人張紅紅者古與其父歌于衢路丐食過將軍

章青所居在昭國坊南門裏。青于街牖中聞其歌者喉音寥亮仍有眉首卽納爲姬。其父舍于後戶優給之。乃自傳其藝。穎悟絕倫。嘗有樂工自撰歌。卽古長命西河女也。加減其節奏。頗有新聲。未進聞。先侑歌于青。青召紅紅于屏風後聽之。紅紅乃以小豆數合記其拍。樂工歌罷。青入問紅紅何如。云已得矣。青出云。有女弟子久曾歌此。非新曲也。卽令隔屏風歌之一聲不失。樂工大驚異。遂請相見。云此曲先有一聲不穩。今已正矣。尋達上聽。翌日召入宜春院。寵澤隆異。尋爲才人。一日內史奏章青卒。上告紅紅。乃咽呼奏云。妾本風塵丐者。一旦老父死有所歸。致身入內。皆自韋青妾。不忍忘其恩。乃一慟而絕。上嘉嘆之。卽贈昭儀。此又一事也。汪廷訥作廣陵月雜劇。以張紅紅、許永新爲一人。名爲張永新。又以樂工爲李龜年。

杜牧之竇烈女傳云。竇氏小字桂娘。父良建中初爲汴州戶曹掾。李希烈破汴州。使甲士取桂娘以去。將出門。顧其父曰。慎無戚。必能滅賊。使大人取富貴于天子。桂娘旣以才色在希烈側。復能巧曲取信。凡希烈之密。雖妻子不知者。悉皆得聞。希烈歸蔡州。桂娘謂希烈曰。忠而勇。一軍莫如陳先奇。其妻竇氏。先奇寵且信之。願得相往來。以姊妹敍齒。因徐說之。使堅先奇之心。希烈然之。桂娘因以姊事先奇妻。嘗間曰。爲賊兒殘不道。遲晚必敗。姊宜早圖遺種之地。先奇妻然之。興元元年。希烈暴死。其子不發喪。欲盡誅老校。以俾少者代之。計未決。有獻含桃者。桂娘白希烈子。請分遺先奇妻。且以示無事于外。因爲蠟帛書。曰。前日已死。殯在後堂。欲誅大臣。須自爲計。以朱染帛如含桃。先奇發丸見之。言于薛育。各以所部謀于牙門。請見希烈。希烈子迫出拜曰。願去僞號。一如李納。先奇曰。爾父悖逆。天子有命。因斬

希烈及妻子函七首以獻。暴其尸于市。後兩月。吳少誠殺先奇。知桂娘謀。因亦殺之。張來宗本此作櫻桃宴雜劇。然必謂桂娘扮男子。爲希烈內官。蓋諱其爲賊寵耳。然桂娘自是息夫人一流。杜牧以權智烈贊之是也。唐書稱李希烈爲先奇毒藥死。雜劇有陳山甫進丸藥科。自本此。

江東樂勝道人作長命縷傳奇。演單符郎與邢春娘重逢故事。本宋王明清摭青雜說。但春娘已落倡家作妓。而傳奇則有懷貞等韻。此亦勸善維持風俗之一端。固不必其事之實耳。按雨村詩話。江夏崔拙圃應階客東京時。亦本此事作烟花債傳奇。盛行於時。

紀伯紫見周樹所作馮驩市義雜劇。攢之行曰。合肥龔宗伯病渴甚。余戒其讀書。屏一切圖籍。然所以祛宗伯疾者。其在此書矣。宗伯得而讀之。果霍然已。以謂孔璋之檄能愈頭風。不是過也。事見此本雜軒著。周延儒被召。阮大鋮以家優來演。自所作賜恩環傳奇。跪泣求昭雪。延儒以逆案難翻。而君意中人爲誰。大鋮以馬士英對。遂于戌籍薦起。爲鳳陽總督事。見流寇長編。

謨觴閣破愁四劇。周元公作。謂酒色財氣也。沈浦者酒化血。宣淫者女化骷髏。慳惜者銀化紙錠。健訟行賄者囚化木。事可解頤。詞頗醒世。

吟風閣雜劇中。有寇萊公罷宴一折。淋漓慷慨。音能感人。阮大中丞巡撫浙江。偶演此劇。中丞痛哭。時亦爲之罷宴。蓋中丞亦幼貧。太夫人實教之。阮貴。太夫人久已下世。故觸之生悲耳。

齊東野語云。三山蘇大璋治易有聲。戊午鄉舉。夢爲第十一人。數爲人言之。以爲必如夢告。旣試。將揭榜。同經人訴于郡。謂其自許之確如此。必將與試官有成約。萬一果然。乞究治之。及申號至十一名。果然。

也。帥攜此狀入院，逼示考官，謂設如此言，諸公將何以自解？不若以待補首卷易之，衆皆以爲然。既折號，則自待補爲正解者，大璋也。由正解而易爲待補者，乃投牒之人也。夏惺齋作廣寒梯，本此。

王澹人工詞曲所著有焚券記、太平園、吉慶敘三種，皆寓微意。而焚券尤佳，曾在京集諸人，陶然亭演之。閨媛填傳奇，古人所少。長安女史王筠，幼閱書，以身列巾幘爲恨，嘗撰繁華夢傳奇，自抒胸臆，以女人王氏登場，生于二齣始出，亦變例也。以上二條出雨村詩話。

葉憲祖，字美度，別號六桐。明萬曆己未進士，生平至處在填詞。一時玉茗太乙，人所贍矣。而粉筐黛器，高張絕絃，其佳者亦是搜牢元人成句。公古澹本色，街談巷語，亦化神奇，得元人之髓。如鶯箇借賈島以發二十餘年公車之苦，固有明第一手。吳石渠袁令昭，詞家名手，石渠院本求公詆訶，然後敢出。令昭則櫟園弟子也。花晨月夕徵歌，按拍一詞脫稿，卽令伶人習之，刻日呈伎，使人猶見唐宋士大夫之風流。櫟園公填詞別號也。見黃梨洲作外舅廣西按察使六桐葉公墓誌銘。

劇說卷六

礪房蛾術堂閒筆云。杭有女伶商小玲者。以色藝稱。於還魂記尤擅場。嘗有所屬意。而勢不得通。遂鬱鬱成疾。每作杜麗娘尋夢鬧殤諸劇。真若身其事者。纏綿淒愴。淚痕盈目。一日演尋夢。唱至待打併香魂。一片陰雨梅天。守得個梅根相見。盈盈界面。隨聲倚地。春香上視之。已氣絕矣。臨川寓言。乃有小玲實其事耶。

陸次云。輶。通判撫州。半載挂冠。重建玉茗堂于故址。落成。大宴郡僚。出吳兒演牡丹亭雜劇二日。解纜去。四方名士爲賦詩紀之。王漁洋詩云。落花如夢草如茵。弔古臨川正暮春。玉茗又聞風景地。丹青長憶綺羅人。瞿塘同櫂三生石。迦葉聞箏累劫身。酒罷江亭帆已遠。歌聲猶繞畫梁塵。

江斗奴演西廂記於句欄。有江西人觀之三日。登場呼斗奴曰。汝虛得名耳。指其曲謬誤。并科段不合者數處。斗奴恚。留之。乃約明日當來。而斗奴不測。以告其母齊亞秀。明旦俟其來。延坐告之曰。小女藝劣。勞長者賜教。恨老妾瞽。不及望見光儀。雖然。尚有耳在。願高唱以破襄愁。客乃抱琵琶而歌。方吐一聲。亞秀卽曰。乞食漢。非齊寧王教師耶。何以給我。顧斗奴曰。宜汝不及也。客亦大笑。命斗奴拜之。留連旬日。盡其藝而去。

一貴官爲母稱觴。演辭朝。始以爲曲文完美。伶人唱至母死。王陵歸漢朝。忽恍然。遂當場易以母在華堂。兒在朝七字。主人大悅。一時名重。今梨園盡宗此。殊不知改者一時權變。其本文固自妙耳。

曠園雜志云。錢唐周通政詩。以嘉靖己酉領解浙閩。年才二十一。榜前一夕。人皆爭踏省門。候榜發周。獨從隣人觀劇。漏五下。周登場。歌范蠡尋春。門外呼周解元者聲百沸。周若弗聞。歌竟下場始歸。又龍游余太史恂順治辛卯發解時。亦登場演蔡邕別親一齣。觀者謂蔡解元雖僞造。余已爲之兆也。

蕭齋日記云。赴龍幼玉山人招供頓清饒劇演繡襦我輩消受一夜。不知山人忙卻幾晝矣。座中楊邦彥年六十餘。欲揮數百金買歌伎。自歎生死無常。爲歎幾何。陳煥宇先生已及耋矣。每詠可惜歡娛地。都非少壯時。淒然久之。

筠廊偶筆云。袁籜庵于令以西樓傳奇得盛名。與人談及。輒有喜色。一日出飲歸。肩輿月下過一大姓門。其家方燕客。演霸王夜宴。輿人曰。如此良夜。何不唱繡戶傳嬌語。籜庵狂喜。幾墮輿。

宋景文公會賓客於廣廈中外。設重幕。內列寶炬。名曰不夜天。相傳阮大鋮長日演劇。亦用此法。阮所著傳奇。有牟尼合。忠孝環。桃花笑。井中盟。獅子賺。燕子牋。春燈謎。雙金榜。西陂類稿云。侯朝宗與貴池吳應箕。宜興陳貞慧。善阮大鋮者。故魏奄義兒。屏居金陵。謀復用諸名士。共爲檄檄大鋮罪。應箕。貞慧。實主之。大鋮愧且恚。然度無可如何。調知朝宗與二人者相厚善也。私念得結交侯生。因侯生以結交於二人事當已。乃屬其客陰交。權朝宗。朝宗覺之。謝客不與通。而大鋮家故有伶一部。以聲伎擅名。能歌所演劇。號燕子箋者。會諸名士。以試事集金陵。朝宗置酒高會。趣徵阮伶。大鋮心竊喜。立遣伶往。而使他奴詞之。方度曲。四座互稱善。奴走告大鋮。心益喜。已而抗聲論天下事。箕踞叫呶。語稍及大鋮。遂戟手罵詈不絕口。大鋮聞之。乃大怒。而恨三人者尤刺骨。

菊莊新話云王載揚書陳優事云陳優者名明智吳郡長洲縣甪直鎮人也爲村優淨色獨冠其部中居常演劇村里無由至士大夫前以故城中人罕知之時郡城之優部以千計最著者惟寒香凝碧妙觀雅存諸部衣冠讌集非此諸部勿觀也會有召寒香部演劇者至期而淨色偶闕優之例凡受值劇十色各自往一色或遘疾或以事不得與則專責諸司衣筭者別徵一人以代謂之拆戲然優人徇名每名部闕人亦必更徵諸他名部無濫拆者是日也適諸名部之爲淨者胥勿暇再徵諸次部亦然司筭者汗面而奔於吳趨之坊遇相識者具告之而陳適在城中相識者因以陳薦筭者急索其人則見衣藍襖攜一布囊貿貿然來筭者不暇審也率之急走而已至演劇家則衣筭俱昇列兩廂九色已先在矣迎問筭者曰淨已拆乎今安在指陳曰此人是也羣優皆愕眙凡爲淨者類必宏嗓蔚跂者爲之陳形眇小言復呐呐不出口問以姓氏里居及本部名又俱無人識者于是羣詬筭者陳弗敢置喙默坐于衣筭而置其布囊于旁少頃羣優飯於廂禮必遜拆色先坐羣優勿陳遜筭者曰爾亦就坐共飽陳勿應未幾堂上張明燈報客齊主人安席訖請首席者選劇則千金記也淨色當演項王爲千金要色其嗚咽咄咤蘿霍騰擲卽名優頗難之于是筭者亦惴恐而闔部之鶻者徠者參軍者狐旦者絃管者主檀板者鳴錘鼓者環叩陳于衣筭前曰君能演楚霸王否第以實告吾等當共籲主人翁諷客易他劇筭人許君貲若干明當悉與汝勿汝客也陳乃起曰固常演之勿敢自以爲善衆曰若是且速汝裝陳始胠其囊出一帛抱肚中實以絮束于腹已大數圍矣出其轡下厚二寸餘履之軀漸高援筆攬鏡蘸粉墨爲黑面面轉大羣優乃稍釋曰其畫面頗勿村旣而兜鍪繡鎧橫稍以出升氍毹演起霸齋起

霸者項羽以八千子弟渡江故事也。陳振臂登場，龍跳虎躍，傍執旗幟者咸手足忙頓而勿能從。聳喉高歌聲出鉦鼓銚角上，梁上塵土簌簌墮肴饌中，座客皆屏息顏如灰，靜觀寂聽俟其齣竟。乃更開堂笑語嗟歎以爲絕技不可得。陳至廂，衆方驚謝忽以盥水去粉墨曰：「某止能爲此齣，恐敗君部名，不敢竟矣。」于是鶴者、狹者、參軍者、狐旦者、絃管者、主檀板者、鳴鉦鼓者共告曰：「吾等負罪深矣，明當謝過。」冀君始終光此劇耳。陳乃竟其劇，明日閩部醵金置酒爲陳壽，坐陳上座，固請其舍村部以就之，而卻其故淨。自此陳遂爲寒香班淨，復冠其部中，聲稱士大夫間，以其來自角直也。謂之角直大淨云。居久之，聖祖南巡江蘇，織造臣以寒香妙觀諸部承應行宮，甚見嘉獎。每部中各選二三人供奉內廷，命其教習上林法部。陳特充首選，越二十年，陳淨以年老乞骸，南返賜七品冠服，瀕行請建普濟堂于吳之虎邱之半塘上，允其請，且預給普濟羣黎扁額，載之以歸。大吏及薦紳皆助之輸鏹施田者恐後陳用是更獲名，謂之陳善人。庚子秋，余偶至郡城，值陳于閨門友人家，見其須髮皓白，舉止方雅，殊不類優人也。友述其本末如是。按吳中傳此事爲小金山。小金山者，優之名也。未識卽陳否？周采岩言：小金山本吳中名，優出遊多年，落魄而歸，笥者故識之，而羣優不知，而共詣其衣貌之不揚，及演項王，始驚異。優之老者曰：「此演法唱法非小金山不能。君得毋爲小金山耶？」何一貧至此？答曰：「然。」衆乃矜服與王載揚傳小異，並記之。

海鹽有優者金鳳，少以色幸于嚴東樓，晝非金不食，夜非金不寢也。嚴敗，金亦衰老，食貧里中，比有所謂鳴鳳記，金又塗粉墨，身扮東樓矣。阮大鋮自爲劇，命家優演之，大鋮死，優兒散于他室，李優者，但有客

命演阮所演劇輒辭不能復語其同輩勿復演詢其故曰阿翁姓字不觸起尙免不得人說每一演其劇笑罵百端使人懊惱竟日不如辭以不能爲善也此人勝金鳳遠矣漁洋云金鳳事較馬伶傳更奇按金優何足道李優有類中文定公家優兒鐵墩可以媲士大夫之寡廉鮮恥者周鐵墩傳鄭桐庵作侯朝宗馬伶傳云馬伶者金陵梨園部也金陵爲明之留都梨園以技鳴者無論數十輩而其最者二曰興化部曰華林部一日新安賈合兩部爲大會遍徵金陵之貴客文人與夫妖姬靜女莫不畢集列興化于東肆華林于西肆兩肆皆奏鳴鳳所謂椒山先生者迨半奏引商刻羽抗墜疾徐并稱善也當兩相國論河套西肆之爲嚴嵩相國者曰李伶東肆則馬伶坐客乃西顧而歎或大呼命酒或移坐更近之首不復東未幾更進則東肆不復能終曲詢其故蓋馬伶恥出李伶下已易衣遁矣馬伶者金陵之善歌者也旣去而興化部又不肯輒以易之乃竟輟其技不奏而華林部獨著去後且三年而馬伶歸遍告其故侶請于新安賈曰今日幸爲開謙招前日賓客願與華林部更奏鳴鳳奉一日歡旣奏已而論河套馬伶復爲嚴嵩相國以出李伶忽失聲匍匐前稱弟子興化部遂凌出華林部遠甚其夜華林部過馬伶曰子天下之善技也然無以易李伶李伶之爲嚴相國至矣子又安從授之而掩其上哉馬伶曰固然天下無以易李伶李伶卽又不肯授我我聞今相國某者嚴相國儔也我走京師求爲其門卒三年日侍相國于朝房察其舉止聆其語言久乃得之此吾之所爲師也華林部相與羅拜而去馬伶名錦字雲將其先西域人當時猶稱馬回云

王弇州史料中楊忠愍公傳略與傳奇不合相傳鳴鳳傳奇弇州門人作惟法場一折是弇州自填詞初

成時命優人演之邀縣令同觀令變色起謝欲亟去弇州徐出邸報示之曰嵩父子已敗矣乃終宴相傳周忠介蓼洲先生初釋褐選杭州司理杭人在都者置酒相賀演岳武穆事至奸相東臘設計先生不勝憤怒將優人捶打而退舉座驚駭疑有開罪明日託友人問故先生曰昨偶不平打秦檜耳極齋雜錄云吳中一富翁宴客演精忠記客某見秦檜出不勝憤恨起而捶打中其要害而斃衆鳴之官官憐其義得從未減專鄉贅筆云楓涇鎮爲江浙連界商賈叢積每上巳賽神最盛築高臺邀梨園數部歌舞達旦曰神非是不樂也一日演秦檜殺岳武穆父子曲盡其態忽一人從衆中躍登臺挾利刃直前刺檜流血滿地執縛見官訊擅殺平民之故其人仰對曰民與梨園從無半面一時憤激願與檜俱死實不暇計真與假也顧彩鬚樵傳云明季吳縣洞庭山鄉有樵子者貌鬚而偉姓名不著絕有力目不知書然好聽人談古今事常激于義出言辨是非儒者無以難嘗荷薪至演劇所觀精忠傳所謂秦檜者出鬚怒飛躍上臺摔秦檜檜流血幾斃衆驚救鬚曰若爲丞相奸似此不毆殺何待衆曰此戲也非真檜鬚曰吾亦知戲故毆若真檜膏吾斧矣

馮南谷吳門博徒善詼諧嘗負博錢十萬勾貸豪門時王弇州在座戲以優人風流帽襲其首云能詩當如所請馮卽朗吟天下風流少區區帽上多鬚邊齊拍手恰似按笙歌弇州欣然贈十金一時座客爲充囊而去風流帽亦稱不倫帽闌如束帛兩旁白翅不搖而自動惟白兔記李洪義八義記樂人戴之此條見朱季美所作桐下聽然又相傳張幼于門客某欲告貸于幼于浼其兄伯起爲言幼于諾之復曰以不倫帽爲題吟詩一首能則與伯起復于客客求伯起代作詩明日客見幼于伯起在坐客言其

情幼于初命題毫不思索隨口詩成幼于曰非汝所能幾不與伯起婉言得如所請恐卽一事而傳聞異耳

宦遊紀聞云嘉靖己丑有遊食樂工乘騎者七人至縣州未詳何省人其所攜服飾整潔鮮明拋戈擲囊歌喉宛轉腔調琅然咸稱有遏雲之態適余憲副至舉城士大夫商賈無不忻悅以爲奇遇搬作雜劇連宵達旦者數日久而情洽一日澆衆曰今日改作雜劇以新視聽遍索富室陳列珍玩器具衣著織金彩服乃令縣城樂工代司鼓樂至夜闌人靜催迫鼓樂喧震作雞鳴度關七人以次入甕久之寂然破甕索之無所得騙銀止數百兩惟司鼓樂者枉受刑罪而已

張南垣精于壘石而善滑稽吳梅村起用士紳餞之演爛柯山傳奇至張石匠伶人以南垣在座改爲李木匠梅村以扇確几曰有竅閨堂一笑及演至買臣妻認夫唱切莫題起朱字南垣亦以扇確几曰無竅滿堂爲之愕眙而梅村失色事見黃梨洲文集

板橋雜記云丁繼之扮張驥兒張燕筑扮賓頭盧朱維章扮武大郎皆妙絕

李如穀官武昌郡守荊州曹叔方以所編樂府投之會李坐黃堂上立取梁州序親自度曲以扇代拍時隸役百十輩皆屏息而聽寂若無人歌罷卽出千金贈曹事見今世說

古夫于亭雜錄云掖縣張大司寇北海忻夫人陳大學士文安公端母也張與胡中丞爲姻家胡故有優伶一部一日兩夫人宴會張謂胡曰聞尊府梨園最佳胡古樸不曉文藝輒應曰如何稱梨園不過老聚樹幾株耳同人因號胡氏班爲老聚樹班

香祖筆記云。兗州陽穀縣西北有塚。俗呼西北塚。有大族潘、吳二氏。自稱是西門嫡室吳氏、妾潘氏之族。一日社會登臺演劇。吳之族使演水滸記。潘族謂辱其姑。聚衆大鬨。互控于縣令。令大笑。各扑一二人。荷校通衢。硃批曰。無恥犯人。然二氏終不悟也。

順治戊子。有呼優人往鄉演戲者。至其地已黃昏矣。座上賓主七人。皆峨冠博帶。非時服式。上座者爲楊解元。廷樞徐翰林。汎而主席則上方五通神也。爲次者將納寵而宴客。坐次談及其事。楊公正言力阻。長者曰。舍弟敢不從命。卽命從人喚回迎親人役。不必到某家去矣。其始衆皆昏迷。乃大鳴金鑼。宮室人物皆不見。箱在曠野中急收拾歸跡。至其家。女方大病。倏然而愈。事見西橋野記。又邊州聞見錄云。康熙初年。有延致伶人者。恍忽引入孟獲城。場上見男婦或無領。又或自揭其首。怪之。乃爲閻羅王及關帝狀。倏忽無所見。歌臺在萬木之顛。皆驚仆。嘔出蟲豸無算。其所與飲食也。

涌虛子言。雜劇有十二科。神仙道化。林泉邱壑。披袍秉笏。忠臣烈士。孝義廉節。叱奸罵讒。逐臣孤子。鎧刀趕棍。風花雪月。悲歡離合。烟花粉黛。神頭鬼面。雕邱雜錄云。傳奇十二科。激動人心。感移風化。非徒作非苟作。非無益而作也。洪武初年。親王之國。必以詞曲一千七百本賜之。

新齊諧云。乾隆年間。廣東三水縣前搭臺演戲。一日演包孝肅斷烏盆。淨方扮孝肅坐。見有披髮帶傷人跪臺間作申冤狀。淨驚起避之。臺下人相與譁然。其聲達于縣署。縣令著役查問。淨以所見對。令傳淨至。囑仍如前裝。如再有見。可引至縣堂。淨領命。其鬼果又見。淨云。我僞作龍圖也。不若引汝至縣。淨起。鬼隨之至堂。令不見鬼。怒欲責淨。淨見鬼起立外走。以手作招勢。淨稟令。令卽著淨同皂役二名尾之。

視往何處淨隨鬼行數里見入一塚中塚乃邑中富室王監生葬母處淨與皂將竹枝插地誌之令乘輿往嚴訊王監生生請開墓以明已冤開未二三尺見一屍顏色如生以詰監生生云其時送葬人數百共觀下土並無此屍卽有此屍必不能盡揜衆口數年來何默默無聞必待此淨方白耶令聽其言復問汝視封土畢歸家否監生曰視母棺下土後卽返家以後事皆土工爲之令曰得之矣速喚衆土工來見其狀貌兇惡喝曰汝等殺人事發覺毋庸再隱衆土工大駭服蓋王監生歸家後有孤客負囊乞火利其囊中物以鋤碎其首埋王母棺上加土填之並無知者令乃盡致之法相傳謀命時衆謂曰要得伸冤除非包龍圖再世故藉淨扮龍圖來伸冤云

嬌嬈記云絳樹一聲能歌兩曲二人細聽各聞一曲一字不亂人疑其一聲在鼻竟不測其何術

王思任作米太僕萬鍾傳云出優童娛客戲兀朮刀械悉真具一錯不可知而公喜以此驚坐客吾鄉江蘇畦恂作令清泉時嘗請禁真刀演戲云一演戲擅用真刀之悍習宜嚴禁也查演戲雖非古禮然民間迎神報賽宴客娛賓亦所不禁第名之曰戲衣冠笑語不必皆真卽遇有鬪武敵愾之劇刀鎗劍戟均不過竹木爲質裏以紙箔存其形似乃近日梨園子弟競尚新奇多有搬演真刀謂爲絕技偶或失手卽致傷生卑職前見邸報內四川省蔣天奇扮演蕭氏忤逆父母破肚抽腸一齣李榮貴扮鬼卒持刀向戳致刀尖誤傷胸膛殞命此演戲用真刀傷命之明證也伏查私藏軍器本有應禁之條雖刀鎗不在禁限但白刃利鋒視爲兒戲無論手足疎虞戕人性命死者枉遭慘斃生者復罹重刑民命所關固當慎重且搬演刀鎗類皆敵武之戲若持此可以殺人之具明助其兇猛之形市井浮囂炫異驚奇

適足以長其悍惡不馴之氣。揆之興感之義，亦有未合。況人心叵測，保無有懷挾私仇，藉此戕害，以妄希矜減者？是更不可不防其漸也。卑職見在出示曉諭，將各戲班內真刀等件，盡行追出銷燬，令其改用竹木，以免意外之虞，不致誤戕人命。如有仍行擅用者，卽嚴拿重處。

帝王聖賢之像，不許扮演。律有明條。牛太守翊祖知徐州時，優有扮孔子者，牛立拿班頭重懲之。吾郡江大中丞蘭每于公宴見有演扮關侯者，則拱立致敬。嘉慶壬戌余在京師，王君引之太夫人壽適演劇，優冠珊瑚頂，扮顯貴副憲陳公嗣龍立命褫去其頂，曰：「名器何可令優伶褻之。」

公宴時選劇最難。相傳有秦姓者，選琵琶記數齣，座有蔡姓者，意不擇，秦急選風僧一齣演之。蔡意始平。歲乙卯，余在山東學幕，試完縣令送戲，幕中有林姓者，選孫臏詐風一齣；孫姓選林冲夜奔一齣，皆出無意。若互相諱者，主人阮公之叔阮北渚鴻解之曰：「今日演桃花扇可也。」懷寧粉墨登場，演閻丁鬧榭二齣，北渚拍掌稱樂，一座盡歡。

見聞錄云：一梨園子弟，腹漸膨大，時轉動，宛如懷孕。一日正演劇，痛甚。下一胞，中有肉長三四寸，似人形。其人以不勝痛楚卒。乾隆壬寅癸卯間，吾邑優人范姓者亦有此事，但未死。事見趙觀察翼甌北詩集。袁中郎云：今人文字不佳，只爲喜人道好，畏人嫌笑耳。昔有禪人爲老衲所嫌笑，羞澀不能出一語。次日請益，老衲曰：「汝見登場傀儡乎？」見曰：「汝不及也。」禪者悚然問故，曰：「渠愛人笑汝，畏人笑耳。又云齊有優娥者，館于泰山之逆旅。龜蒙先生分室而寢，夜半聞娥謂弟子曰：『予初入排場時，村叟有聚觀者，余面若塗血，心若累石，口噓噓不能終折。已游三街六衢，與諸少年狎，視村叟之觀者蔑如也。』又過達人

貴官之家分杯連席謳浪終日歸而見市井少年猶奴隸也已而入京師隸籍樂部出入掖廷聲遍長安王侯公子爭爲挾筭負琴視達官貴人猶家鶩庭鳥也今余又出京十年餘高賢大士游公環賈閱歷既多處萬人場有若幽室籠指撚撥隨手應歌盤旋不拘本腔人無不擊節者何則不見己焉耳不見人焉耳

乾隆二十九年西洋貢銅伶十八人能演西廂一部人長尺許身軀耳目手足悉銅鑄成其心腹腎腸皆用關鍵湊接如自鳴鐘法每齣插匙開鎖有一定準程悞開則坐臥行止亂矣張生鶯鶯紅娘惠明法聰諸人能自行開箱著衣服儼然如生惟不能歌耳一齣演畢自脫衣臥倒箱中臨值場時自行起立仍上戲毯見新齊諧

溫引年坐李元仲席上元仲置酒設劇召賓客四十餘日引年無所避然竟不一觀劇

趙孝子名希乾字仲易南豐河東人家人嘗觀優爲劇見安安事卽用呼希乾小字安安

板橋雜記云嘉興姚壯若用十二樓船于秦淮招集四方應試知名之士百有餘人每船選名伎四人佐酒梨園一部燈火笙歌爲一時盛事

李于田縱橫聲伎放誕不羈女伶登場至雜伶人中持板按拍主人知而延之上座恬然不爲怪又胡白叔幼而穎異以狐旦登場四座叫絕並見明詩綜注板橋雜記言沈公憲以串戲見長同時推爲第一王式之中翰王恆之水部異曲同工

周憲王者定王子好臨摹古書帖曉音律所作雜劇凡三十餘種散曲百餘雖才情未至而音調頗諧李

獻吉汴中元宵絕句云。齊唱憲王新樂府。金梁橋上月如霜。又牛左史恆詩云。唱徹憲王新樂府。不知明月下焚樓。見曲藻及堯山堂外紀。

丹鉛錄云。陳大聲嘗爲武弁。以運事至都門。客召宴集。命教坊子弟度曲侑之。大聲隨處雌黃。其人拒不服。蓋未知大聲之精于音律也。大聲乃手攬其琵琶。從座上快彈唱一曲。諸子弟不覺駭服。跪地叩頭曰。吾儕未嘗聞且見也。稱爲樂王。

元費唐臣有蘇子瞻貶黃州傳。奇謝憲使朝鮮。正德初。以御史陞浙之憲副。始上任。開宴。優人以前傳奇呈。未幾謝入覲。以遺微宴疏。貶黃州判。見真珠船。

李訥尚書夜登越城樓。聞歌曰。雁門關上雁初飛。其聲激切。召至。乃去籍之伎盛小叢也。曰。汝歌何善乎。曰。是梨園供奉。南不嫌女甥。所唱之音。乃不嫌教之。見閒居筆記。

李袞善歌。名動京師。崔昭入朝。密載而至。乃廣延賓客。以爲盛會。袞喉轉一聲。衆大驚曰。李八郎也。盛會之名。實本于此。見徐文長集。

韓邦奇作其弟邦靖行狀。末云。恨無才如司馬子長、關漢卿者。以傳其事。吾友葉霜林嘗云。古人往矣。而賴以傳者。有四。一敍事文。一畫。一評話。一演劇。道雖不同。而所以摹神繪色。造微入妙者。實出一轍。霜林善評話。故有是云。

亦巢偶記云。俗呼薰猪兒爲俏冤家。不知何所取。里巷至今傳之。一日。予同一二友。至虎邱游。行久之。思飲甚切。然所攜杖頭極菲。因思薰猪兒價輕。令僮買之佐酒。不至。一友忽唱云。俏冤家。何時還不到。衆

大曠按葦航紀談云閱烟花記冤家之說有六情深意濃彼此牽縛寧死無二也兩情相繫阻隔萬端心想魂飛寢食俱廢二也長亭短亭臨歧分袂黯然魂銷悲泣良苦三也山遙水遠魚雁無憑夢寐相思柔腸寸斷四也憐新棄舊辜恩負義恨切惆悵怨深刻骨五也觸景悲傷抱恨成疾六也余謂冤家猶呼奴家衰家嗜家方言如是非有義理可尋

巴廬編云丞相胡惟庸畜猢猻十數衣冠如人客至則令供茶行酒能跪拜揖讓吹竹笛聲尤佳又能執干戚舞踏人稱之爲孫慧郎

何元朗早歲入南都隨顧東橋游讌多習舊聞東橋每宴集輒用教坊樂以箏琶侑觴當康陵南巡日樂工頓仁隨駕至北京得金元人雜劇元朗妙解音律令家中小鬟盡傳之置酒留賓恆自度曲有李節者善箏歌元朗品爲教坊第一于時名彥賦詩留贈黃淳父詩所云十四樓中第一聲也其後引歸海上倭亂避地青溪然文酒之會未嘗廢絲竹其買宅句云一須焦革鄰舍二要秦青對門

唐荊川半醉作文先高唱西廂惠明不念法華經一酌手舞足蹈縱筆伸紙文乃成見操觚十六觀露書云琉球居常所演戲文則關中子弟爲多其宮眷喜聞華音每作輒從簾中窺讌天使恆跪請典雅題目如拜月西廂之類皆不演卽岳武穆破金班定遠破虜亦以爲嫌惟荆欽姜詩王祥之屬則所常演每嘖嘖歎華人之節孝云

相傳徐文真之兄少司寇隲假歸朝貴會送江陵與焉酒酣各乘騎而行少司寇以扇叩江陵肩云去時還有張老來相送江陵深銜之又松江郡守生日郡紳集賓館稱祝有一年少太學與座衆不識共問

之答曰當朝宰相爲岳父又金給諫士希本西域人失偶再娶科中相賀曰這回好個風流婿諸史云有公會而分宣子世蕃後至坐間問曰何爲來遲世蕃曰偶傷風耳王元美唱琵琶曲曰爹居相位怎說得傷風

崇禎癸巳吳中諸公習武爲江南撫臣朱鑑塘所訐謂諸公子且反其贈答詩云君實有心追季布蓬門無計托朱家爲謀反確證給事趙完璧因據以上聞時三相皆吳越人疏請行撫按會勘虛實有代爲解者云此拜月傳奇中陀滿興福投蔣世隆蔣因有此句因取坊間刻本證之果然諸公子獄始漸解按今本拜月卽幽閨記無此兩句

贊園雜志云袁籜庵與數客謁合肥公久之不出使人報曰平昔未相識不便接見袁大不擇少頃公出長揖曰從來不認得于叔夜舉座絕倒相傳籜庵在荊州時某巡道謂曰貴府衙中有二聲棋子聲唱曲聲對曰老大人也有二聲天平聲竹片聲某默然未幾籜庵遂挂彈章罷歸流寓金陵落魄不得意吳梅村贈以詩云詞客開元擅盛名蕭條鶴髮可憐生劉郎浦口潮初長伍相祠邊月正明擊筑悲歌燕市恨彈絲法曲楚江情善才已死秋娘老濕盡青衫調不成

康熙朝靳文襄議開十字河督臣董默菴知其不便難以片言而析有山陽鄭公子者豪華喜結納公卿董公令其得開河不便狀公子用訟師徐北山之計遣點奴通靳幕中人陰竊摘由號簿蓋時赴河臣呈告不便者七千餘人其狀皆具於簿董公見此大喜曰是不須口舌爭矣次日會議郡庠尊經閣下先演劇楊椒山寫本一齣伶唱至烈烈轟轟做一場董公拍手大笑點首自唱烈烈轟轟做一場四座

瞪目愕眙。將弁行酒者。相視失色。事詳茶餘客話。

玉劍尊聞云。高則誠居崇儒里。弟名誠。字則明。亦有文名。時號兩難。

堯山堂外記云。楊邃翁壽日。嘉定沈練塘作還帶記。以侑觴。曲中有昔掌天曹。今爲地主等語。邃翁喜。圈

此八字。

楊文襄在正德末。以次揆少傅居丹陽。適武宗南巡。以任寧庶人爲名。幸其第。留車駕。凡三至焉。上賦絕句十二首。賜之。楊以絕句如數。賀上。又有應制篇。刻爲車駕幸第錄。吳中王文恪侈其事。最後一律云。漫衍魚龍看未了。梨園新部出西廂。

邱瓊山過一寺。見四壁俱畫西廂。曰。空門安得有此。曰。老僧于此悟禪。見談芬。又相傳明弘治末。泉州府學教授南海人。頗立崖岸。一日設宴明倫堂。搬演西廂雜劇。翼日有無名子書一聯于學門云。斯文不。幸明倫堂上除來。南海先生學校無光。教授館中搬出西廂雜劇。某出見之。赧然故態頓去。

耳新云。熊潮善戲術。凡梨園子弟至其地。必先禮謁。始多獲利市。否則登場時。以手指之。雖善歌者。啞然失聲。明日來謝過。再四懇求。潮笑曰。偶然耳。曲在若口。他人安能使。絳邪歌者聲即如故。

夢蕉詩話云。優工以髹塑爲神鬼面像。而戴之以弄叫。嘯跕躍。百狀惟怪。望之可爲辟易。然其本來面目。終莫得而揜焉。李若虛嘗于席間戲爲吟云。鐵面虬髯戟似霜。人人到是四金剛。一回戲臉都拋卻。仍是郎當老郭郎。

吾里中徐坦菴作珊瑚鞭傳奇成。邀袁籜菴觀之。作拂霓裳詞云。儘商量。人生萬事熟黃梁。收拾在春風。

錦繡一笑囊英雄啼有淚兒女笑生香杜韋娘趁當筵歌舞拂霓裳風流況是客座上有周郎摧拍了不教絃筦誤宮商調高人語靜燭短酒杯長謾端相繡簾開明月遶歌梁

坦菴姪元美題其叔買花錢雜劇作風流子詞云千秋同抱怨風流事知否幾人經羨座上酒豪佳人意許樓前詩句天子情傾相逢處眼波嬌欲溜眉宇韻偏生雅調唱酬債償閨閣才華灑激價重墀庭借于生佳話傳幽憤不覺彩筆縱橫意近叩壺王子擊筑荆卿愛清商響若九皋唳鶴新詞柔似百囀流鶯咳唾盡成珠玉高調誰賡

吳薦次題尤悔菴清平調雜劇減字木蘭花云仙才供奉豈藉尋常科第重失卻珊瑚只笑唐家結網疎知君寄托掃盡里兒容做作爛醉沈香此後誰堪七寶牀題讀離騷雜劇采桑子云瀟湘千古傷心地歌也誰聞怨也誰聞我亦江邊憔悴人青山剪紙歸來晚幾度招魂幾度銷魂不及高唐一片雲題醉桃園雜劇清平樂云山空石古遮斷桃花櫓采菊東籬杯自舉獨把羲熙留取門生兒子籃輿有時直上匡廬人道賢哉隱者不知禪也仙乎

田山蠻新秋雨夕卞司冠齋中觀尤展成李白登科傳奇詩云四條弦動第三廳一闋霓裳酒未停偶爾

清歌天便妬秋燈寒雁雨淋鈴


新安呂履恆字元素夢月巖詩餘有念奴嬌題秣陵春傳奇云六朝如夢誰解道野老江頭歌哭海思雲愁還寄托舊部霓裳法曲瑤水筵前翠微宮裏夙世仙緣卜非空非色個中人自如玉爭奈身作虛舟心同明鏡形影交相逐刦火雖燒蓮性在不怕罡風顛撲撥盡鶯弦搗殘羯鼓淚斷聲難續曲終人遠

數峯江上猶綠。

龔合肥邀顧黃公看了繼之演水滸赤髮鬼。丁年已八十。顧卽席贈以詩云。左右看君正少年。翠鬟紅袖並花前。按歌傳遍青樓曲。作使當場白打錢。酒態慣撩監史罰。舞腰尤博善才憐。貞元朝士今無幾。卻有民間地上仙。

韓山子朱潮遠四本堂座右編云。豫督張公自德先巡鹽淮揚。以黃梁夢徵詩。予偶投句云。從前熟讀爛柯經。不免邯鄲此道行。桃葉洞中過漢魏。白雲枕上築功名。十年宰相身原在一夢河山飯未成。蛙市蜂衙鳥兔疾。金鞭指我過蓬瀛。公一見卽折節造謝。

吾郡閨秀徐淑則觀演長生殿詩云。細合金釵事渺然。徒勞瀛海問神仙。可憐空有他生誓。何處重逢七夕緣。宮監歸來頭似雪。梨園老去散如烟。今宵聽奏霓裳曲。誰賜開元舊寶錢。



中華民國二十八年二月初版

(82003)

*G四六〇

港

國學
叢書
基劇

說一冊

每册實價國幣叁角

外埠酌加運費隨費

撰者 焦循

發行人 王雲五

印刷所 商務印書館

發行所 各埠
商務印書館

(本書校對者喻飛生)

